

M. ANTONII

MAIORA.

GII

ANTIPARADO.

XON LIBRI

SEX.

*In quibus M. Tullij Ciceronis omnia
Paradoxa refelluntur.*

VIRTUTE DVCE,



CONITE FORTVNA.

APVD SEB. GRYPHIUM
LVGDVNI,

BIBLIOTHECA NAZIONALE
ROMA
VITTORIO EMANUELE
1546.
ASS. IVV.



ИСТОРИЯ

РОССИИ

1800

ОСНАСТКА

1800

1800



ИСТОРИЯ

РОССИИ

1800

M. A N T O N I V S

MAIORAGIVS, AL-

CIATO MAGNO,

S. P. D.

*



ARRO tibi Alciate. Mihi cer-
tè proximè quadam in re videor
insanisse: quæ fortasse tibi prorsus
incredibilis & falsa videbitur,
cùm tamen omnino vera sit: in
qua, si tibi otium est, & si placet,

suauiter licet, & iucundè rideas. Nam ego ille, quem
nōsti, tantus Ciceronis amator, qui Calios, Merulas,
Lucilios, non ita pridem magna in concione Medio-
lani de loco superiore condemnare non dubitavi, pro-
pterea quòd in Ciceronem meum hiscere nescio quid
ausi fuerant, cùm otio nuper abundarem, quia Barto-
los tuos, & Baldos, ut pote Barbaros homines, &
litium tantùm amatores, nescio quàm sapienter con-
tempseram, etiam ipse scribere tandem in Ciceronem
aggressus, eius omnia Paradoxa, quæ pleriq;, ut sa-
cro sancta venerantur, & religioni nostræ maximè
consentanea existimāt, subuertere conatus sum. Quid
credis? hac mea quasi lusione quadam, experiri vo-
lui, quid possit hominum contradicendi cupidorum im-
proba loquacitas, & præclarè sanè intellexi, nihil esse

tam verè, nihil tam sanctè dictum, quod non dicendo conuelli, labefactariq; possit. Hoc planè modo Callicles in Gorgia Platonis multis verbis Philosophiam accusat: hoc modo apud eundem Platonem primo de Repub. Thrasymachus, secundo autem, & quidem multò fortius, Glauco iustitiam improbat, & iniustitiam ad cœlum laudibus effert. Hoc illud esse crediderim, quod in Progymnasmatibus suis Theon ait à Simonide præceptum, ut in rebus omnibus ludamus, nihil autem in vita seriò agamus. Quamuis hoc (ut verum fatear) non consultò planè, ac dedita opera, sed casu potius quodā effecisse videri possim. Cùm enim iampridem, nihil omnino scripsissem, & aliqua in re me hoc tempore exercere statuissem: ne quod in me facultatis est, si modò quid est, in dicèdo penitus exaresceret. Eo animo quasi ludibundus disputationem hanc contra Ciceronis Paradoxa conscribere cœperā, ut exponendis rationibus, quæ contra dici posse viderentur, eas postea refellerem. Sed dicam uerè. Simile quiddam mihi euenit, quod plerisq; Philosophis, ac Theologis accidere solet: qui cùm arduas de Deo, ac de Animorum immortalitate quæstiones proposuerint, quas deinde soluere nesciant, incerti quò ferantur: tandem in Diagora Melij, & Theodori Cyrenaici opinionem delabuntur. Eodem ego ferè modo cùm adductas in Ciceronem à me rationes refellere

non possem, in eam statim disceſſi ſententiam (vide quò nos cæcus rerum noſtrarũ amor trahat) ut meas rationes veras, Paradoxa verò Ciceronis falſa crederem. Quapropter hac opinione ductus, quòd audaciã admireris, & præterea alicuius gloriolæ ſtudio (cur enim vera non fatear?) etiam de edendis his ineptijs meis cogitare cœpi. Hãc enim veram eſſe noſtri temporis Philoſophiam video, ut quoniam noua fingere non poſſumus, vetera diruamus. Et cum per noſtra non poſſimus opera caput altius à terra tollere, ſaltem per aliorum ruinam emergamus. Quin etiam audacior eo factus ſum, quoniam vir ingenio, doctrina, iudicio præſantiſſimus Bartolomeus Terrinus, itemq; maximus ille Ciceronis obſeruator Riccus, meas has nugas nò omnino malas eſſe pronuntiarunt: quas tum demum aliquid eſſe exiſtimabo, ſi tu vir omnium, qui poſt homines natos floruerit, præclariſſimus, non dico id quod ſperare fortaiſſis iniquiſſimum eſt, approbaris. Sed quod, ut ſpero & opto, facies, non improbaris. ut enim nihil aliud hoc in opere aſſequar, ingenia certè multorum, ad hæc, quæ pulcherrima ſunt, diſcutienda concitabo. Nam ex illa ſacraſſima Platonis officina multa ſanè deprompſi, quæ non omnino legentibus ingrata fore confido. Totam autem diſputationem, in trium dierum ſcholas, (ut Græci appellant) atq; in ſex paruos libros quaſi ludens in Dialogo conieci. Quod

opusculum sub tuo potissimum, Alciate, nomine apparere volui, non alia sanè de causa, nisi quia certum habeo, si vnum illud immortale nomen, quod apud eos etiam, qui procul ab omni literarum cognitione remoti sunt, celeberrimum ac sanctissimū est, huic meæ lucubrationi præfulserit: fore, ut tunc demum ea gratior in hominū manus perueniat. Quis enim magnum aliquid in eo libro non contineri putet, qui Alciato sit inscriptus? Quod si deinde legentium spei, atq; expectationi non responderit, nihil inde nomini tuo detrimenti futurum est, sed erit quod ipsi potius se legentes accusare debeant, qui tam præclari nominis inscriptione capti, Ciceronem à me refelli posse temerè crediderint. Te verò, certò scio, quæ tua in me singularis est humanitas, atq; benevolentia, & libentissimè hæc nostra perlecturum, & in locis etiam multis suauissimè risurum. Erunt etiam fortasse quædam, quæ tibi satis acutè disputata videbūtur. Quibus ex rebus fore spero, ut et totum volumen euoluendum tibi censeas, nec omnino id imperitiæ condemnes. Vale: meq; ut facis, ama. Ferraria, Idibus Maijs. M. D. XLV.

M. AN.

M. ANTONII
MAIORAGII AN-
TIPARADOXON, SI-
VE SVBVRBANARVM
QVAESTIONVM
LIBRI
SEX,

*

*In quibus M. Tullij Ciceronis omnia
Paradoxa refelluntur.*



ET V S illa, atq; So-
cratica ratio, Alcia-
te, cōtra alterius opi-
nionem differendi,
maximè mihi sem-
per placuit: semperq;
digna uisa est, in qua
se quisque plurimum
exerceret. Ita enim

facillimè quod verissimillimum esset, inueniri posse So-
crates arbitrabatur. Quæ post eum Academicorum
omnium, atq; etiam Peripateticorum consuetudo fuit,
ut omnibus de rebus in vtranq; partem copiosè dispu-
tarent. Itaq; veterem hanc doctissimorum hominum

consuetudinem secutus, rem quidem arduam atq; difficilem, sed tamen dignam, in qua nervos omnes, atq; aciem mentis intenderem, nuper tentare non dubitavi: ut ea, quæ Græco nomine Paradoxa Ciceroni libuit inscribere, quæ de Stoicorum disciplina sumpta, Cicero ipse voluit, oratorijs ornamentis adhibitis, pertractare: ego multis sanè rationibus, atq; argumentis cùm à Platone, tum etiam ab Aristotele sumptis, refutare contenderem, qua in re nō omnino luisse operam videri possem, nisi gravissimum nobis Ciceronis nomen obijceretur. Sed hoc sanè neq; contra Cicero-nem esse, neq; eius gravitati quicquam detrahere, facile quivis intelligere potest, si quæ ipse de Stoicorum sententia vera esse docere voluit, ego contra de sententia Platonis, non esse vera docuero. Tu igitur hoc tempore, cùm publicis negotijs vacuus sis, audies (ut opinor) libentissimè, quæ duos abhinc annos omnium ingeniosissimi adolescentes, me præsentē de Ciceronis Paradoxis disputarint. Cùm enim ex veteri, atq; usitata, consuetudine quietem tandem, & uocationē à publico docēdi munere, quod annos quatuor Mediolani, non parva sanè cum auditorum frequentia sustinui, Calendis Sextilibus impetrassem: eo ipso die, dimissa concione, cùm hora diei fere secunda esset, relaxandi animi gratia cum tribus concordissimis fratribus, ex Comitū familia, consobrinis meis, me in amœ-

nissim

niſſimum quoddam ſuburbanū conferre ſtatuī: cumq̃;
 nos in viam omnes vnà dediſſemus, nuntiatum eſt no-
 bis ab Adoleſcente quodam, ex auditorum numero,
 veniſſe eodem paulò antè diſcipulum meum M. Fan-
 nianum cum Lancilloto patre ſuo, clariſſimo atq; ho-
 neſtiſſimo viro: nam prædium illud Donatus Fan-
 nianus, Lancilloti frater, non ita pridem magno ſanè
 pretio coëmerat, & iam magnificis atq; pulcherri-
 mis ædificijs exornarat. Mihi autē propter ſummam
 neceſſitudinem, quæ cum tota illa honeſtiſſima Fannia-
 norū familia ab ineunte ætate interceſſerat, ſue præ-
 ſentes ipſi adēſſent, ſue abēſſent, liberè ſemper omnia
 patebant. Itaq; licet in eum locum, non vt Fanniano-
 rum aliquem inuiſerem, ſed eo tantum animo conce-
 dere ſtuiſſem, vt ex maximis caloribus, non enim
 maiores memini, ſumma cum amœnitate loci me reſi-
 cerem. Tamen vt primū Marcum meum ibi eſſe
 audiui, quem multis iam diebus propter eius ruſtica-
 tiones non videram, equidem maiorem in modum le-
 tatus ſum, vt omnem ſtatim moleſtiam, quam ex an-
 ni grauiſſimo tempore, atq; ex diutino labore contra-
 xeram, ille mihi nuntius ademerit. Etenim iſ eſt ado-
 leſcens, & omnium ingenuarū artium ſtudijs mirifi-
 cè deditus, & oratione maximè ſuauiſ, & præterea
 ita moratus, vt præ ſe probitatem quandam, & inge-
 nuitatem ſerat: quem quidem ego propter maximas
 a s eius

eius ingenij suauitates, à prima pueritia mirandum
semper in modum amaui. Is igitur vt primum me ad-
uenisse cum Primo, Antonio, Francisco, consobrinis
meis audiuit: confestim quasi præ letitia gestiens, ad
me ire perrexit. Qui cum maximè hilari uultu me,
atq; socios consalutasset, atq; , vt amicorum mos est,
complexus fuisset, in proximam cœnationem disces-
simus. Tūc ego, Quàm me iuuat, inquam, Marce sua-
uissime, huc hodie venisse, postquam te, quem omniū
maximè diligo, præter spem, atq; opinionem hoc in
regno vestro reperi: putabam enim te hoc tempore in
Cerriano tuo, aut canibus lepores atq; capreolos, aut
accipitre perdicū pullos atq; coturnices insectari. Vt
verò tam propè ad urbem, his præsertim diebus, ac-
cederes, nunquam omnino fore credidissem. Quid, in-
quit ille, an me consuetudinis tuæ oblitum putas? qui
cum primum publici muneris vacationem habere po-
tes, in aliquam te villam procul ab urbe cum amicis
ad te colligendum conferre soles, qua in rusticatione
semper aliquod tuis studijs dignissimum elucubraris:
sicut anno superiore, cum in Carellianum huius Primi-
tui, atq; fratrum, te contulisses, quinque & viginti die-
bus (vt mihi Antonius iste consobrinus tuus iuratus
dixit) quinque & viginti decisiones illas perfecisti,
quibus Ciceronem à Calij Calcagnini criminationi-
bus liberaſti. Quod quidem opusculum tuum cum
proxi

proximè perlegissem, & vehementer mihi placuisset, statim venit in mentem quiddam hoc tempore à te petere, quod mihi te non denegaturum confido. Atq; hoc sanè potissimum in causa fuit, ut ad urbem propius accederem, (nam hodie vesperi in urbem ad te venire decreueram) ut te, si quo modo fieri posset, in Cerrianum meum adducerem, & ociosè, de quibus vellem, tecum ibi colloquerer. Nam si aduentum ad te meum distulissem, verebar, ne aliquò prius profiscisceris, quàm ego voti mei compos fierem. Bene, inquam ego, narras Marce: cras enim unà omnes in Carellianum discedere cōstituimus. Quare siquid est, quod me velis, hodie tibi operam meam polliceor, & defero. Minimè verò, inquit ille: nam si me tātum amas, quantum aut certè amas, aut perbelle simulas, vel in Cerrianum meum cum socijs istis tuis venies: vel si id per aliqua tibi negotia nō licet, hoc in nostro suburbano triduum saltem nobiscum moraberis: neq; enim citius possum, quod à te volo, percipere: nec si possem, citius vellem. Nam tua mihi certè iucundissima consuetudine frui, tres saltem hosce dies, magnopere desydero. Age age, inquit Primus, cōcede hoc Maioragi Fanniano tuo, quod & ipse non sine causa, ut videtur, exoptat: & tu non satis iustè, cū negotijs vacuus sis, recusare potes: sed ea lege, ut cū primum in Cerrianum suum ad venationes redierit, te præda

prædæ participem faciat. Et libentissimè quidem, inquit Marcus, ita mihi Delia faueat, ut Minerua tibi Prime, quæ te omnes ingenuas artes edocuit. Hæc omnes ad hilaritatem conuersi subridere cœperunt, & merogare, ut Marco meo, præsertim in petitione tam honesta, obsequi vellem. Itaq; cùm me nihil recusando proficere posse intelligerem, nisi parum comis atq; humanus videri vellem, dixi me in eorum potestate futurum, modò statim Marcus id explicaret, quod à me se tantopere desyderare prius dixerat.

Quid credis, inquit Marcus, res quædam inanis tibi fortasse videbitur, quippe qui Ciceronem magis quàm te ipsum amas, & ab eo ne latum quidem (ut aiunt) unguem in re ulla discedere potes: dicam tamen quid sit id, de quo dubitem, ut aliquid ex te more solito discam. Proximis diebus eas Ciceronis declamatiunculas legi, quæ Græco uocabulo Paradoxa inscribuntur, quæ quidem Cicero se ait eò libentius scripsisse, quòd sibi uiderentur esse maximè Socratica, longeq; verissima. Nam pluribus in locis horum Paradoxorum Socratem laudat autorem, vultq; ea Stoicos à Socrate accepisse, ut in tertio Tusculanarum ait, Socratem existimasse, Omnem animi commotionem esse insaniam. Et non ita multò post ait, quòd à Socrate acceptum diligenter stoici retinuerunt, Omnes insipientes esse non sanos. Et in quarto Tuscul. ait Stoicos

cos idem dicere quod Socrates, sed alio modo. Et in quinto ait, apud Platonem à Socrate nihil præter virtutem bonum iudicari, & Vitam beatam in vna virtute poni. Mihi autem hæc, ut ingenuè fatear, neq; vera, neq; Socratica videntur: & quod maius est, etiam à Socratis atque Platonis disciplina plurimum abhorrere, neq; cum religione nostra ullo modo posse conuenire. Velim igitur, ut his diebus hoc me errore, si modo error est, liberares: & Ciceronem Socratico more, atq; verè disputasse ostenderes. Quod te facile facere posse existimo: quippe qui & Platonis studiosus sis, & verum à falso distinguere scias, quoniam Dialecticam profiteris. Quo tandem hos inquam, modo fieri potest, ut aliquid à Socratica disciplina atq; à veritate alienū Cicero docuerit? cum & unum ex omnibus Philosophis Platonem, quod satis ex eius scriptis apparet, plurimi fecerit: ut verisimile sit, ipsum & Platonis, & Socratis sententias quàm optimè tenuisse, & res illæ, quæ in Paradoxis disputantur, verissimæ mihi videantur. Quòd autem à nostra religione dissideant, quamuis hoc minimè mirum videri deberet, quia Cicero Christianus esse non potuit: tamen ego, quomodo discrepent, non sanè video: quin potius interdum Ethnicum (ut nostri vocant) hominem tam Christianè locutum fuisse, mirari magnopere soleo. Quomodocunque hoc sit, inquit ille,
nihil

nihil de nostra religione meminero, quoniam ab hoc vinculo Ciceronem absoluis. Tu, quæso, proba mihi, Socratica & vera esse, quæ in Paradoxis à Cicerone scripta sunt: quoniam utrunq; Ciceroni videtur, mihi uerò neutrum. Namq; ego (ut initio dixi) & falsa, & à Socratica doctrina remota, quæcunq; ibi dicta sunt, existimo. Ridiculum uerò, inquam ego, perinde quasi mihi necesse sit, aut conueniat id probare, quod tu nullis rationibus improbas. Hoc cine illud est, quod à me tantopere desiderabas, ut ea tibi probarem, quæ à nullo sunt hactenus improbata? Fac ut rationes tuas, atq; argumenta audiam: deinde si ocium fuerit, aut si placuerit, eis respondebo, atq; Ciceronis sententiam defendam. Nunc planè, inquit ille, me circumuentum, atq; deprehensum video: te enim sperabam pro tuo Cicerone causam hanc libentissimè suscepturum: ut ea vera esse, quæ dicit, ostēderes, etiam si nullas ego rationes afferre possem, cur falsa esse existimarem: atq; ita putabam fore, ut à te tridui disputationem hac ratione elicereim: video enim campum esse dicendi latissimum, si quis ea omnia, quæ in Paradoxis à Cicerone disputantur esse Socratica, & vera, probare contendat. Hoc est, quod à te desiderabam: tu uerò statim à me contra Ciceronem argumenta queris, neq; aliter videris eius sententiam velle defendere: quæ res nullo modo mihi planè satisfacit. Nā si Cicer

*si Ciceronem aliquibus argumētis impugnare volue-
 ro, ut tecum congregiar oportet, cui ne in verissima
 quidem, atque in certissima causa par esse ullo modo
 possum: nedum in hac, in qua licet mihi Ciceronē falli
 quasi certum atque exploratum sit: multa tamen ad
 eius sententiam defendendam, ab homine praesertim
 Dialectico, (qua in facultate tu plurimum vales) ex-
 cogitari verisimilia possunt. Itaq; si me oppugnante,
 atq; accusante, tu defendēdum Ciceronem susceperis,
 me planē oleum (quod aiunt) & operam perditu-
 rum video: nam te pro illo, tanquam pro aris & fo-
 cis, certaturum esse certò scio. neque omnino curatu-
 rum, utrum falsa, an vera fuerint quae dixeris, modò
 Ciceronem tuum tutari, atq; defendere possis. Hic
 ego subridens, O Marce, inquam, tu fortasse me So-
 phistam aliquem esse putas, & fallacium conclusionū
 captatorem: qui, quod aiunt vulgò, in nigrum candi-
 da conuertere possim, & efficere, ut quae falsa est ora-
 tio, verissima esse videatur: qualem in Nebulis Ari-
 stophanes Poëta Socratem, quamuis mehercle imme-
 ritò depingit. Fuit enim vir ille, quantum ex Histo-
 ria colligi potest, vir bonus, & simplicis veritatis
 amicus, fraudis verò inimicus: neq; reliquorum Grae-
 corum similis, quos ait Cicero contentionis cupidiores
 esse, quàm veritatis. Talem igitur me esse puta, nō qui
 velim & iure, & iniuria Ciceronem defendere: sed
 cui*

cui nihil sit veritatis luce dulcius, atque iucundius. Nam, ut Aristotelis dictum illud usurpem, Amicus quidem Plato, sed rebus omnibus veritatem antepone-
 nere decet. Huc accedit, quòd si vera sint, quæ dicturus es, nihil est quod verearis, ne coner ea refellere. Neq; enim præsentem hoc gravissimo, atq; integerrimo viro, Primo Comite, atq; eius doctissimis fratribus Antonio, & Francisco, veritatem impugnando videri ego impudens velim. Deinde non te latet, verissimum id esse, quod ait Cicero, Magnam vim esse veritatis, quæ contra hominum ingenia, calliditatem, solerriam, facile se per se ipsam defendat. Quãobrem audacter contra Ciceronem quicquid volueris per me dicas licet: nam ea lege tibi meam astringo fidem, qua apud Terentium Thaidi Parmeno:

Quæ vera audiui taceo, & contineo optime.

Sin falsum, aut vanum, aut fictum est, continuo palam est.

Plenus rimarum sum, hac atq; illac perfluo.

Proin tu taceri si vis, vera dicito.

Eodẽ modo tu, mi Marce, nisi refelli vis, vera dicito. Nam apud me plus vera ratio valebit, quàm Ciceronis opinio. Modò ita sit, inquit ille, nam illud me primum mordet, quòd me Thaidi compararis: perinde quasi, ut illa suum amatorem Phædriam, sic ego te Ciceronis amatorem decipere velim. Deinde non sine causa

causa scio, cæcum à Poëtis amorem fingi solere: Quoniam nos amor recto iudicio spoliare plerunque solet. Vnde (quemadmodum rectè ait Theocritus) sæpenu-
mero fit, ut præ amore, quæ minimè pulchra sunt, pul-
cherrima videantur. Ut enim cæci colores percipere
non possunt, ita neq; amatores ueritatem. Verùm hoc
perquam sanè commodè accidit, quòd te cùm hos tuos
consobrinos eduxeris: qui quamuis te maiorem in mo-
dum ament, attamen eos spero pro ueritate contra
Ciceronem mihi, tanquam tres Hercules uni Theseo,
auxiliatores fore: cùm præsertim hac in re neq; de di-
gnitate tua, neq; de fortunis agatur. Etiam me ipsum,
inquam ego, tanquam Iolaum auxiliatorem assumas
licet, modò pro ueritate contendas. Sed age, iam ad
istam tandem disputationem aggredere, ut videa-
mus, quæ sint ista tua, quæ dicturus es, Antiparado-
xa, quibus Ciceronem, tanquam Anthem Hercules
quidam, prosternas. Faciam verò, inquit ille, tuo iussu
libentissimè, quod antea mea sponte facturus neuti-
quam fueram. Sed, si placet, in proximos hortos con-
cedamus, ubi in opaco aliquo, atque frigido loco, vel
inambulantes, vel si magis visum fuerit confidentes,
de his rebus inter nos ociosè colloquemur, donec nos
ad prandium famuli reuocent. Hic omnes consur-
reximus, & amœnissimos hortos, qui pulcherrimum
illud ædificium attingunt, ingressi, ad partem eorum.

b quand

quandam, herbescentis plenam viriditatis, quam frequenter arbores, patulis diffuse ramis opacabant, ubi nos tenuis quædam leniter afflabat aura, deuenimus. Atque hîc, inquit Primus, optimè philosophabimur, cœpitq; locum ad sessionem commodum sibi prospicere: cùm statim è Marci familia serui quidam accurrentes puluinos omnibus apposuerunt. Tum Marcus cùm ad eum audiendum nos erectos omnes aduertisset, Incredibile est, inquit, quantopere animû meum commotum esse sentiam, postquam in tali præsertim causa, mihi perpetuam habendam esse orationem intellexi: neq; vnquam ad hanc disputationem descendissem, si quisquam alius præter vos quos mihi omnes amicissimos esse intelligo præsens adesset. Verùm cùm ea vos omnes modestia præditos esse sciam, ut quicquid à me dictum fuerit, in meliorem sitis partem accepturi, non dubitabo coràm vobis quid sentiam explicare: cùm præsertim hæc non impugnandi Ciceronis studio dicturus sim, sed tantùm ut exponendis rationibus, quæ me in contrariam opinionem trahunt, à Maioragio (si modo relicta Ciceronis autoritate, verè ac liberè pronuntiare voluerit) harum rerum vel veritatem, vel aliquam saltem veri similitudinem eliciam. Iam igitur cum bona omnium venia ad Ciceronis Paradoxa discutienda venio: ac primùm illud, quod initiò sibi disputandum proponit, quale sit. videamus,

deamus, Solum id esse bonum quod honestum. Hoc certè mihi, contra Ciceronis sententiam, neq; Socraticum esse videtur, neq; verum. Mitto hoc in loco querere, quibus id Cicero rationibus approbet: nam non ita multò post apertissimè, ut ego quidem spero, declarabo, nullum esse in hoc toto capite argumentum, quod acutè conclusum esse videatur. Nunc ut totius disputationis meæ ratio conslet, faciam quod ab eruditissimis hominibus fieri sapissimè animaduerti, ut causam eam, quam agunt, initio partiantur, deinde sigillatim partes omnes pertractèt. Rectè enim habitata in causa partitio, quemadmodum ait Cicero, illustrè, & perspicuam totam efficit orationem. Primum igitur mihi videtur ostendendum esse, Paradoxon hoc non esse Socraticum: deinde, non esse verum: tum, Ciceronis argumenta non esse necessariò consequentia, neq; rectè conclusa. Quantum enim ego per ætatem, quam videtis, exoluendis Platonis Dialogis, Socratis sententiam indagare potui, intellexi, tria potissimum esse, quæ Socrates bona soleat appellare: & licet ab eodem multa alia bona nominentur, tamen ad hæc tria, quæ dicturus sum, omnia reliqua deduci facile possunt. Nam quæcunque ad humanæ vitæ cultum, atq; dignitatem, accommodata sunt, bona Socrates appellat, quæ Virilia nominantur: & quæcunque ad vitam bonis moribus instituendam, atq; ad exornan-

dum animum attinent, quæ *Honestæ* dicuntur: & denique quorum gratia reliqua omnia parari, atq; acquiri solent, quæ uno *Felicitatis* atq; *Sapientiæ* nomine comprehenduntur. Est igitur celebrata à Platone, siue à Socrate (nam in ijs, quæ ad mores spectant, Socratem ubiq; ferè Plato sequitur) *Bonitatis* ratio triplex: una, quæ ad *Utilitatem* tantum pertinet: altera, quæ ad *Honestatem*: tertia, quæ ad *Felicitatem*.

Quare Bonum à Socrate, tanquam genus quoddam ponitur, sub quo tres diuersæ formæ, siue species continentur: *Vtile*, *Honestum*, *Finis*. Quamvis Bonum nequaquam propriè genus dici potest: nomen etenim est eiusmodi, qualia *Dialectici* *Homonyma* vel potius *Analogæ* nuncupant. Nam tres illæ, quas diximus, *Bonorum* species, nomine tantum inter se, non etiam ratione, atq; definitione conueniunt. Alia est enim *Utilitatis*, alia *Honestatis*, alia *Finis* siue *Felicitatis* ratio. Nam finis ipse bonorum omnium, quæ *Felicitas* est, solum verè atq; propriè bonum appellatur. *Vtile* verò, atq; *Honestum* non primo, ac per se, sed proportionem tantum, atq; comparationem ad finem facta, bona nuncupantur. Semper enim *Utilitas* ad *Honestatem*, *Honestas* ad *Felicitatem* referri debet. Hæc igitur, quæ proposui, Socratis ipsius, hoc est *Platonis*, apud quem Socrates disputat, auctoritate comprobanda sunt. Ac primò quidem ea quæ sunt

utilia,

utilia, ab ipso Socrate bona nominari, declarat illud in Hipparcho, quod multis rationibus Lucrum esse bonum ostendit, atq; concludit: non alia sanè de causa, nisi quia sit utile. Et cum in eodem Dialogo mortales omnes quod bonum est appetere probare contendat: non aliud certè, quàm quod utile videtur, intelligit. Non enim omnes honestatem, sed pleriq; potius utilitatem sequuntur. In decimo autem de Repub. libro, bonum id esse ait, quod servat, et inuat: quod idem esse, ac si diceret, quod utile est, quis non intelligit? De legibus primò, cum duplicia bona esse dixisset, Divina & Humana: in humanis bonis Sanitatem, Robur, Diuitias commemorat, quæ certè bona non ad honestatem, sed ad utilitatem pertinent. In Euthydemo, eodem modo Sanitatem & Diuitias in bonis refert. In Gorgia, Voluptates eas bonas esse dicit, quæ utiles sunt. Sed quid exemplis opus est? quæ penè sunt innumerable: ut mihi veniat in mentem valde mirari, quo pacto factum sit, ut in re tam clara Cicero deceptus esse videatur. Quod autem ea quæ ad bonos mores attinent, quæ Honestæ dicuntur, à Socrate bona vocentur, nihil opus est approbare, quoniam hoc maxime perspicuum est. Quin etiam hanc solam erroris causam Ciceroni fuisse facile crediderim, quod multis in locis apud Platonem legerat, idem esse Honestum quod Bonum. Itaq; putavit hoc etiam vicissim retro

commeare, atq; conuerti, vt quemadmodum quicquid honestum, id etiam bonum est: ita vicissim quicquid est bonum, etiam honestum sit. Quod omnino falsum est: multa enim bona sunt, quæ tamen nequaquam rectè honesta dici possunt. Quoniam, vt ostendere cœpimus, Bonum tanquam genus quoddam est, quod hæc tria complectitur, Vtile, Honestum, Finem. Et de his omnibus Bonum rectè dicitur, quoniam semper genus dicitur in formis suis, non autè contrà: neq; enim rectè de genere formam dices: vt quoniã Coloratum genus est, Candidum species: ita rectissimè dicere poteris, Quidquid candidum, id etiam coloratum est. Quòd si dictionem hanc ita commutes, Quidquid coloratum, id etiam candidum est: id non tantum falsò, sed etiam imperitè, atq; ineptè facias. Quid autem hoc Cicernis ab illo differt? Quidquid honestum est, id etiam bonum: hoc verè dicitur. Sed si cõmutes, falsum erit: non enim quicquid bonum, id etiam honestum: quod non aduertisse videtur Cicero. Quare quod in Alcibiade primò probare nititur Socrates, quòd nihil sit honestum, quin idem etiam bonum: id omnino verissimum est, quamuis aliter imperita multitudo censeat. Vt, pro patria mori, esse decorum, atq; honestum, fortasse concedent omnes: sed idem etiam bonum esse pleriq; negant. Quoniam quod corpori detrimentum affert, id neutiquam in bonis numerandum esse censent.

Sent. Hoc est igitur, quod ibi Socrates Alcibiadi probare cōtendit: Nempe nullam omnino rem honestam esse, quæ non eadem etiam bona sit. Quod Alcibiades, ut imperiti solent, primò pernegabat: nam vulnera, & mortem, etiam si pro patria perferrentur, tamen in malis esse statuebat. Sed tamen postea veris à Socrate rationibus victus, Honestam mortem esse bonam concedit. Quod autem Bonum etiam pro fine, seu felicitate capiatur, manifestissimè Socrates in Philebo declarat, quo in Dialogo Bonum ita definit, ut id esse dicat, cuius gratia fiunt alia omnia: quod longè apertius in Gorgia, his quidem verbis idem Socrates ostendit: Bonorum gratia agenda sunt omnia: atq; hic est finis omnium actionum, ipsum scilicet bonum, cuius gratia cetera omnia facienda sunt: nō autem ipsum gratia reliquorum. Iam igitur profectò videtis, verum id esse, quod superius affirmavi: nempe à Socrate & quod utile, & quod honestum, & quod reliquorum extremum atq; finis est, quò referuntur, & cuius causa sunt facienda omnia, Bonum appellari. Sed nemini dubium esse potest, quin reliquorum omnium bonorum, finis ipse præstantissimus sit, quoniam ipsius gratia reliqua sunt expetēda. Quamobrem non modò non verum est quod ait Cicero, Honestum quod sit, id esse solum bonum, sed ne summum quidem bonum est, quod honestum. Id enim, gratia

cuius alia requiruntur, ut ceteris omnibus excellentius sit oportet: sed propter finem virtus, atque honestas, reliquaquæ omnia, quæ bona vocantur, acquiri solent. Est ergo Finis, ipsa honestate longè præstantius bonum. Sed ut longè clarius etiam, atque manifestius appareat, neque Platonis, neque Socratis hanc fuisse sententiam, Id solùm bonum esse, quod honestum: tria vobis loca recitare constitui, quæ apud Platonem proximè annotavi: in quibus diuerso quodam ordine bonorum distinctio perficitur. Primus est in libro de legibus primo: secundus est in Euthydemo: tertius in Philebo. Igitur in primo de legibus libro sic ait sub Atheniensis hospitis persona Plato: Duplicia bona sunt: alia Humana, Diuina alia: dependentquæ à diuinis humana. Siqua verò ciuitas maiora suscepit, minora quoque possidet: sin autem illis caret, utrisque priuatur. Minorum primum est Sanitas, Forma secundum, tertium Vires ad cursum, ceterosque corporis motus, quartum Diuitiæ, quæ cæcæ neutiquam sunt, sed acutè cernunt, si Prudentiam sequantur: quæ quidè Prudentia diuinorum bonorum dux prima existit: deinde post mentem Temperatus animi habitus, ex his duobus cum Fortitudine mixtis Iustitia tertio emergit: Fortitudo quartum tenet locum, quæ omnia humanis illis natura preponuntur. Quare oportet ut legum quoque lator hunc ordinem sequatur, et mandet omnibus, ut
semper

semper ad hæc respicientes in singulis rebus operentur. Humana enim ad diuina, diuina verò ad mentem principem referenda. Hactenus hospes ille Atheniensis. Ipsius uerò Socratis in Euthydemo quæ sint verba, quæso percipite: sic enim facillimè intelligetis, quid ipse de bonorum distinctione Socrates senserit: nam eo in loco Cliniam Axiochi filium, hoc modo interrogat. Quis est omnium, qui bene viuere non cupiat? Nemo, inquit. Age, inquam, postquam bene viuere volumus, quo pacto id assequi licet? an non si bona multa nobis adsint? Non ne ineptus esset, si quis hoc negaret? hoc enim perspicuum est. Perspicuum, inquit. Bona verò ex omni rerum genere quænam sunt, inquam? an fortè neq; id arduum est inuentu, neq; eleganti homini dubitandum? quis est enim qui neget esse bonum diuitias, atq; diuitem esse? an non ita est?

Maximè, inquit. An non & sanū esse, inquam, & pulchrum, cæterisq; corporis ornamentis præditum? Certè, inquit. Quin etiam nobilitas, inquam, potentia, & in sua cuiq; ciuitate honores sunt boni?

Et ista, inquit. Quæ præterea bona, inquam, restant, si dixerimus Temperantiam, Iustitiam, Fortitudinem esse bona, nunquid rectè dicemus? dubitet enim fortè quispiā: tu verò quid ais? Bona profectò, inquit, dicenda. Sapientiam verò quo in genere locabimus, bonorum ne, an aliter? In bonorum, inquit,

b s genere.

tis sententia? equidem video Socratem in Philebo dicere, Bonum una tantum idea, siue specie, nequaquam comprehendi posse: quare nihil erit unum præter DEVM, quod cum bono conuerti, atq; reciprocari possit, nisi fortasse quis quod summum Bonum est, id solum bonum appellare velit, quod aliquando Socrates factitauit: nam in protagora DEVM solum bonum esse affirmat, quod ita intelligendum est, DEVM esse summum bonum, à quo cetera omnia, quæ bona dicuntur, originem, atq; principium habent: quod etiam infra paulò post enodatiùs explicabo. Homini verò summum bonum esse vult Socrates, quemadmodum in Phædone, atque in Theæteto obseruauimus, DEO quàm simillimum fieri, quod quidem Honestate sola, tanquam instrumento quodam, effici solet. Nihil autem Honestas sola, si fortè sine DEI cognitione fuerit, ad Felicitatem prodesse posset: nam ita Socrates ait in Theæteto: DEI COGNITIO sapientia est, & vera virtus: ignoratio verò stultitia, & vitiositas manifesta. Et paulò superius dixerat, Nulla est alia malorum fuga, nisi ut DEO quoad fieri potest similes efficiamur. Sed iam tempus esse mihi videtur, ut ab hac prima parte discedamus, nam satis omnino mihi probasse videor non satis rectè locutum fuisse Ciceronem, nisi fortè hoc arroganter dicitur, qui dixerit ex Socratis sententia, Quod honestum est, id esse

id esse solum bonum. Sequitur ut hoc etiam à veritate longè alienum esse doceam qua in parte dabitur profecto mihi veniam, si nimis alta sectari visus fuero. Est enim in profundomersa veritas, quæ non nisi cogitationibus altissimis erui potest: deinde res summæ difficultatis est summū illud bonum reperire, ad quod alia omnia referenda sunt, & quod solum eo nomine dignum esse videatur. Sed qua potissimum ratione veritatem hanc inueniemus? equidem ita arbitror, si distinctionem eam secuti fuerimus, quam in rebus omnibus Platonici esse faciendam dicunt, et quæ cum Christiana religione mirificè videtur conuenire. Volunt enim verè diuini Platonici, tria esse, in quibus vniuersa boni natura consistat: Deum, Mentem, & Res creatas. Nam de Mundi anima, quam à Deo, atq; Mente proficisci volūt, quem nostri Sacrum spiritum appellare consueuerunt, nihil attinet hoc loco verba facere. A Deo verò, tãquam rerum omnium autore, atq; prima causa, & summo principio boni naturam omnem proficisci dicunt, quæ in Mente, hoc est in Dei filio, atq; ut nos appellare solemus, in CHRISTO conquiescat. Atque hoc sanè pulcherrimum Mysteriorum est, & religioni nostræ maximè consentaneum. Dicunt enim Platonici, ipsius boni naturam non in Deo esse, nisi tanquam in causa, sed re ipsa bonitatem omnem in Dei filio, quam etiam Mentem vocant, consist

consistere: atq; ab ipsa Mēte rebus alijs creatis omnibus, quatenus eius capaces sunt, communicari. Et hoc est quod Christiani clamant, à Christo solo petendam esse salutem, atq; beatitudinem: nempe quia in solo Dei filio veriſſima illa bonitatis Idea, atq; forma consistit, qua qui participes efficiuntur, soli felices appellantur, quoniam soli benè beateq; vivere possunt.

Tria sunt igitur hæc, quæ in bono spectari debent: Causa, Forma, Communicatio. Causa boni in Deo solo est, Forma in Mente, siue Dei filio, Communicatio in rebus ab ipso Dei filio creatis. Mentem enim volunt esse rerum omnium quasi opificem. Hæc autem tria po. sunt exemplo declarari, quò res clarior efficiatur: Sic enim dicere possumus, Caloris causam in sole esse, quoniam licet ipse Sol calidus non sit, causa tamen caloris est. Formam autem caloris in igne: in lignis denique, cùm accenduntur, caloris esse communicationem. Quid ergo? cùm boni naturam queramus, dicemus eam à Deo produci, in Mente, atq; in Dei filio quasi conformatam, atq; impressam esse. ab Angelis, atq; ab animo nostro participari. Sed quis effectus est huius bonitatis? hoc est, quid habet animus noster utilitatis, cùm eius bonitatis particeps efficitur, quam illi diuina mens elargitur? Nemo sanè non intelligit, sapientem, atq; felicem tum esse animum nostrum, cùm veri boni naturam participauerit, vult enim in

Enthyd

*Euthydemo Socrates, eandem esse Sapientiam atq;
Felicitatem: quare Bonum ita commodè definiri posse
videtur, ut id esse dicatur, quod efficiens est felicitatis
atq; sapientiæ. Quo sanè modo non erit in Deo bonum,
neq; enim eget Deus ulla re, quæ felicem eum,
atq; sapientem efficiat. Mens autem, atq; Dei filius,
si Platonicis credimus, Deo eget autore, ut felix, &
sapiens esse possit, atq; ita quodammodo solus Deus
dici bonus potest: quoniam, ut apud Platonem in Euthyphrone
legimus, ab ipso bona cuncta proficiuntur: quodam etiam modo
nequaquam bonus dici potest, quoniam supra omnem bonitatem
atq; felicitatem collocatus est. Atque hoc est quod Plotinus, &
nonnulli alij sapientes Platonici dixerunt, Deum nihil
sentire, nihil intelligere, nihil agere: sed omnium
harum actionum, sicuti reliquarum etiam rerum omnium,
causam esse: atq; ideo rerum omnium præstantissimum
esse Deum. Quoniam licet in se nihil habeat, modo tamen
quodam eximio, in se omnia habere dicatur, quoniam
omnium rerum causa est. Vnde non sine causa Dionysius ille
Areopagita, qui scriptis suis quam plurima diuina mysteria
euulgauit, ait, Nihil nos verè de Deo affirmare posse: longeque
verius, quid non sit Deus, quàm quid sit explicare posse:
quare neq; sapiens neq; bonus, neq; felix, propriè dici
Deus potest: quæ omnes appellationes Menti, atq;
Dei*

Dei filio rectissimè conueniunt, quoniam præclarissimarum rerum omnium in eo forma est, non tamen eo modo, quo mentes Angelicæ, atq; animi nostri sapientes, boni, atq; felices dicuntur: sed alia quadam ratione longè excellentiore, nomina hæc omnia Dei filio conueniunt, quia bonorum omnium (vt ait Homerus) effector atque largitor Deus. Videmus igitur pulcherrimam quandam Platoniorum cum religione nostra conuenientiam, idem enim nobiscum in hac parte Platonicī sentiunt, à Deo boni naturam omnem provenire, in quo (vt ait Aratus) viuimus, mouemur, & sumus. Omnem autem boni speciem atq; formam in Mente siue in Dei filio sitam esse, in hoc tantum differre videntur, quòd Mentem ipsi creatam dicunt. Nos autem hoc non dicimus, sed tanquam filium à patre genitum. Nos enim CHRISTVM Dei quidem filium esse, sed æternum, & nullo vnquam tempore creatum fuisse credimus. Platonici verò dicunt à Deo mentem quandam perfectam ab initio fuisse creatam, quam eandem Sapientiam, & Rationem sempiternam vocant, in qua rerum omnium species, quas Ideas ipsi appellant, à Deo impressæ fuerint, atq; ab ipsa deinde Mente reliqua omnia fuisse procreata. Quod etiam Theologi nostri confirmare videntur, qui tradunt, à Dei filio, in quo vera boni natura est, & Mundum hunc vniuersum, & quæcunq;
in eo

in eo sunt, esse facta. Quamvis autem Mens illa sempiterna sit à Deo profecta: tamen & nostra, & Platoniorum sententia, etiam ipse verè Deus est, quoniam eandem cum Deo naturam habet: & ratione tantum, non autem substantia differt. Hæc igitur ea natura est, quæ sola bona verè dici potest, quam Cicero fortasse nunquam aduertit. Sed in hac parte fortè vobis videor nimium ultra septa (quod aiunt) transilire, & in alienam messem manum ponere: qui cum me disputatorem fore pollicitus sim, etiam Theologum agam. Scitote tamen me hæc proxima hyeme ab hoc Maioragio nostro didicisse: quæ si putasset me in Ciceronem suum deprompturum, nunquam fortasse docuisset. Atque hæc cum diceret hilari vultu, atque subridenti me aspectabat. Ego verò gaudebam sanè adolescentulum eum, quem propter summum eius ingenium semper plurimum dilexi, tam multa memoriter, & tam obscura dilucidè pronuntiassè: atque ideo cohortari capi, ut audenti animo pergeret, & institutum sermonem ad finem deduceret. Tum ille, Iam igitur, inquit, Boni naturam inuenimus, nempe Mentem illam perfectam, Sapientiamq; , quem nos Dei filium, ac Deum appellamus, omnium rerum, quæ sunt ei subiectæ quasi prudentiam quandam, ut ait Cicero, procurantem cœlestia maxime, deinde in terris ea quæ pertinent ad homines. Hæc autem boni natura
iam

iam mentes Angelica conformatae sunt, atque ideo beatae aeo sempiterno perfruuntur, neq; ullo amplius errore possunt à recto dimoueri, propterea quòd ipsam boni faciem semper intuentur, & ab ipsa continuò perficiuntur: quod etiam tunc animis nostris profectò accidere solet, cùm primùm è vinclis corporis liberati, in domum illam sempiternam euolarint. Eos enim in hac vita, quemadmodum verissimè cecinit Vergilius, noxia corpora tardant, Terreniq; hebetant sensus, moribundaq; membra. Hic metuant, gaudentq;, dolent, cupiuntq;, nec auras Respiciunt, clausa tenebris, & carcere caco. Neq; ullam omnino verae felicitatis partem habere possunt, nisi veram virtutem, atque honestatem amplexi, quae (ut ait in Theateto Plato) DEI cognitio est, illi se quàm simillimos efficere studeant. Hoc igitur modo animi nostri bonitatis participes efficiuntur. Quamobrem illa tria, quae praeposuimus, iam inuenimus: nempe, Vnde bonum oriatur: diximus enim omnem à DEO boni naturam proficisci. Quae sit boni species, atque vera natura. Mens enim, qui (ut initio diximus) Dei filius est, ipsum est verum bonum, quod etiam Angelos, quasi splendor quidam excellentissimus informat. Et denique, Quae sint illa, quae bonum ipsum participant, Nos enim, hoc est animi nostri, qui diuina ea gratia quae semper illis infunditur, naturae quodam instinctu

ad ipsum bonum rapiuntur, si voluerimus felicitatis eius, atque diuini boni fieri participes, possunt. Quæ cum ita sint, omnino iam perspicuum est, Honestum ipsum, quod solum esse bonum Cicero dixit, neq; verè bonum esse, neq; in veri boni rationem cadere. Quid ergo est (inquiet aliquis) Honestum? Dicam planè quod sentio, & quod ego verissimum esse iudico. Cum eius rei gratia Deus homines procreasset, ut eos felices, ac beatos aliquando redderet, vias quasdam illis præmunivit, atq; rationes, & quasi instrumenta præstitit, quæ illos ad ipsum finem, hoc est ad Bonum, atq; ad Felicitatem perducerent. Ergo ita factum est, ut quæcunq; ad beatitudinem acquirendam aliquo modo prodesse possent, ea ab hominibus bona vocarentur: quoq; maius adiumentum, & faciliorem ad beatam vitam aditum præberent, eo maiora etiam bona dicerentur. Itaq; quoniam ad beatam vitam comparandum, nihil est Honestate aptius, nihil accommodatius, nihil deniq; magis necessarium: ideo accidit, ut à sapientissimis hominibus Honestas maximum bonum putaretur: non quòd in se boni naturam contineat, sed quia non nisi per eam possunt homines boni illius veri naturam participare. Est igitur Honestas non absolutè maximum bonum, nam longè maius bonum est Felicitas, cuius gratia querimus Honestatem: sed eorum bonorum maximum, quæ nobis ad felicit

felicitatem quasi viam præmuniunt. Virtutes igitur omnes, quæ vno honestatis nomine comprehenduntur, hæc tantum ratione bonæ sunt, quoniam ad felicitatem nobis viam præparant: tantoq; meliores corporis atq; fortuna bonis sunt, quanto magis sunt ad acquirendam beatitudinem necessaria. Potest enim quis etiam sine corporis & fortunæ bonis per solam honestatem ad eam qua fruuntur Angeli, atq; beatorum animæ, felicitatem peruenire. Sed quia diuitiæ, sanitas, vires, ceteraq; id genus, ijs qui sapientiæ cupidi sunt, ad virtutem adipiscendam plurimum adiumenti conferunt: non enim tam facile pauper, egrotus, & infirmus, quàm qui diuitijs abundat, et corpore sanus atq; robustus est, disciplinis atq; virtuti dare operam potest. Ideo ab Academicis, atq; Peripateticis, etiam hæc bona nominantur. Equidem possem in hanc sententiam multa alia colligere: sed partim quia vereor, ne longa nimis oratione vestras aures offendam, partim etiam, quia satis hæc esse existimo, ad ea quæ proposuimus ostendenda, finem hîc dicendi faciam.

Hoc loco Primus vehementer admiratus quod in tota Marci oratione fecerat, Vnde quæso nobis, inquit, tam repente Marce Platonicus euasisti? vix enim te per ætatem posse Ciceronis opera voluere cum intelligentia credidissim, nam septimum ac decimum te vix annum attigisse certò scio. Maior agium autem

sex annos (ut opinor) totos audisti , cùm nonem natus annos audire cœpisses: quo sanè in tempore vulgatos hos autores, quos Maioragius interpretatur Ciceronem, Demosthenem, Homerum, Vergilium, semper in manibus habuisti. Proximo verò anno scio te ab eodem Dialecticis imbutum esse, neq; ex Philosophia quicquam degustasse te existimo, præter quinque priores Ethicorum Aristotelis libros, quos idem tibi præceptor tuus declaravit. Vnde verò Platoniam istam doctrinam hauseris, mirari non satis queo. Sed incredibilem certè capio voluptatem: primò, quia longè doctiorem, atq; eruditorem te, quàm putaram, esse video. Deinde, quia desinet tandem Maioragius illud suum iactare dictum, Nullum unquam post hominum memoriam fuisse, qui vel minimum errorem, qui excusari non posset, in Cicerone deprehenderit: & siquid ab aliquo reprehensum fuerit, id iniuste factum: seq; paratum, in omnibus ad eius esse defensionem. Nam quid ad ista, quæ dixisti, respondere possit, omnino non video. Tum ille: Scis ne me, Prime, inquit, abundare otio? Quid autem aliud agam, cùm solus sum, quod me magis delectare possit, quàm Platonem euoluere, prorsus non reperio: quem quantum tu facias, nescio: ego certè non miror, à Panatio Deum Philosophorum fuisse appellatum: à Cicerone verò cæteris omnibus Philosophis esse præpositum. Ita me reficit

ficit, atq; recreat eius lectio, ut etiam multa excerpam, & memoria mandem, quæ mihi vsui, atq; ornamento esse possint. Sed de Maioragio non dubito, quin & hæc, & alia quæ in hanc sententiam dici possunt, si voluerit, facile possit refellere. Perge porrò, inquam ego, quamuis enim illud verissimum sit, quod veteri proverbio dicitur, Multos esse discipulos magistris præstantiores: non tamen vereor, ne in tam bona, tamq; facili causa me superior euadas.

Quid pergami, inquit ille: aut quid est, quod amplius à me desyderes? An non satis tibi probatum esse videtur, hanc, quam Cicero Socraticam, atq; veram esse vult, neq; Socraticam, neq; veram esse sententiam? nam neq; Socrates dixit unquam, neq; ratio patitur, ut id solum bonum sit, quod honestum. Tum Antonius: An oblitus es, inquit, Marce, quod initio pollicitus es, te ostensurum, nullum esse in hoc Primo Ciceronis Paradoxo argumentum, quod acutè conclusum esse videatur? hoc est, quod Maioragius te pergere, ac promissa præstare iubet. Imò verò, inquit ille, maxime memineram: sed mehercule iam pigebat ad eam venire disputationem, in qua non tantum falsa docuisse Ciceronem, sed etiam inscienter, atq; imperitè id fecisse mihi demonstrandum esset. Sed quoniam hoc ipse mihi intriui (quod ait Terentius) omne mihi exedendum est. Dicam igitur apud homines fami-

liarissimos quod institui dicere : verum illud à vobis omnibus etiam, atq; etiam peto, ne has meas ineptias efferatis. Sed ad rem redeo. Primum est igitur hoc Ciceronis argumentum, unde tota hac disputatio pendet : Ego neq; pecunias, neq; recta magnifica, neq; opes, neq; imperia, neq; voluptates in bonis rebus esse numerandas duco: Ergo quod rectum, & honestum, & cum virtute est, id solum bonum iudico. Hac summa est totius primi Paradoxi. Quod Enthymema quã vim habeat, pro vestri ingenij acumine vos intelligere arbitror: nam idem est, ac si quis ita concluderet, Ego neq; plumbum, neq; ferrum, neq; argentum pretiosum esse arbitror : Solum igitur aurum pretiosum est. Sed quid gemmas, inquiet aliquis : quid uniones? Vtrum ne tibi pretiosi videntur, an non? Sic ego possum à Cicerone petere : Dic mihi Cicero, vtrum sapientiam, atq; felicitatem, & DEI cognitionem in bonis rebus esse numerandam ducis, an non? Si non: quid tibi prodesse sine felicitate, atq; DEI cognitione poterit honestas? Si etiam: cur igitur solam honestatem dicis esse bonam? Atqui diceret fortasse Cicero: Ego à felicitate, & DEI cognitione honestatem non distinguo. Quid igitur tibi faciam Cicero, si quid distent ara lupinis, nunquam didicisti? ergo tuis istis Paradoxis Socratis nomen prefigere ausus es : cum, quæ Socratis sententia fuerit, penitus ignores? Ergo

tu honestatem à felicitate non separas? Sed dic mihi:
 Qua de causa virtus atque honestas est expetenda?
 certè quia meliorem, & laudabiliorem virum efficit.
 Sed quæ causa est, ut vir bonus, & laudabilis, effici
 quispiam velit? Nemini dubium est, quin id efficiat.
 ut aliquando felix ac beatus esse possit. Honestatem
 igitur, et virtutem, felicitatis gratia nobis comparare
 studemus. Non est igitur eadem honestas, quæ felici-
 tas. Illa enim huius gratia queritur. Quò fit, ut feli-
 citas finis sit, atq; scopus voluntatis nostræ. Nullus est
 enim ex omnibus, (ut docet Aristoteles in Ethicis)
 qui non felicitatem sibi querendam proponat. Hone-
 stas autem tanquam instrumentum quoddam, atque
 via, ad illam est. Tria sunt igitur hæc inter se distin-
 cta, atq; separata, Quod expetit, Quod expeditur, &
 Cuius gratia expeditur. Quod expetit, homo est: Quod
 expeditur, honestas: Cuius gratia expeditur, felicitas.

Est igitur honestas medium quoddam, sine quo nullo
 modo felicitas acquiri potest: ut Architectus, qui sibi
 pulcherrimi ædificij formam in animo proposuerit,
 nunquam poterit ædificium illud substruere, nisi prius
 operarios instrumenta, ceteraq; id genus, quæ ad sub-
 structionem ædificiorum necessaria sunt, præpararit.
 Quòd si quis operarios illos, atq; illa instrumenta putet
 idem esse cum ædificio, cuius gratia comparantur, an
 non insanissimus homo videatur? Nobis autem (si

Dys placer) pulcherrimè, atq; sapientissimè fecisse
Cicero videbitur, qui virtutem, atq; honestatem ean-
dem esse cum felicitate putauerit. Præterea concludit
Aristoteles Ethicorum primo, Felicitatem non esse
natura laudabilem, sed potius venerabilem, quoniam
ea tantum laudari solent, quæ ad aliquem optimum
finem diriguntur, non quæ per se ipsa contenta sunt.
Honestas autem (ut in primo de officijs ait Cicero)
etiam si à nullo laudetur, tamen laudabilis est natura.
Non est igitur eadē honestas, quæ felicitas. Verum
hoc iam perspicuum, atq; apertissimum esse arbitror,
primum illud Enthymema nihil omnino concludere.
Quamuis enim illi concedamus, neq; diuitias, neq; im-
peria, neq; voluptates in bonis rebus esse: non tamen
ideo sequitur, ut quod honestum est, id solum bonum
sit. Nam felicitas honestate longè melior est, propter
quam & honestas, & reliqua omnia expetuntur.

Sed primum illud effatum omnino falsum est, quod
neq; diuitiæ, neq; imperia, neq; voluptates in bonis re-
bus sint. Quod quamuis superius ex Socratis sententia
satis copiosè docuerim: tamen neque hoc in loco mihi
prætereundum esse videtur: Sed prius illud dicam,
quod satis mirari non possum: videtur enim mihi Ci-
cerò maximè negligens hoc in loco fuisse: cum enim
probare aggrediatur, quod honestum est, id esse solum
bonum: ratio differendi postulabat, ut omnia, quæ
vulgò

vulgò bona putarentur, ea non esse bona ostenderet: alioquin nihil rectè concludere potest. Sed nò tantùm ab imperita multitudine, verùm etiam à sapientissimis hominibus, atq; in primis ab Aristotele, Platone, Socrate, nobilitas, & valetudo, & vires, & pulchritudo corporis, in bonis rebus numerantur. Hoc autem loco Cicero de his nullam omnino mentionem facit: sed tantùm diuitias, imperia, voluptates, nominat, quæ quoniam in bonis esse non vult, rectissimè concludi putat, Ergo quod honestum est, id est solum bonum. At si Metrodorus adesset, qui summum in corporis prospera valetudine bonum constituebat, vel Ciceronem irrideret, vel contra se nihil esse conclusum existimaret. Alcibiades autem fortasse putaret, summa se bona consecutum, et ea quæ sola bona dici possint, propterea quòd nobilissimus, atq; pulcherrimus esset: sic enim fortè ratiocinaretur, postquam hoc Ciceronis Enthymema audisset, Diuitiæ non sunt bonæ, neq; imperia, neq; voluptates. Quid ergo? bonum tantùm id est, quod honestum. Sed nobilitas, atque corporis pulchritudo, certè bona sunt: nam si bona non essent, id profectò dixisset Cicero: quoniam reliqua, quæ bona putantur, nec sunt, commemorauit. Ergo nobilitas, et pulchritudo corporis honesta est. Sed quod honestum est, id est solum bonum: igitur nobilitas, atq; pulchritudo corporis sola bona sunt. Quare ex Ciceronis sen-

rentia nihil mihi deest, ad bene, beateq; viuendum.

At contra Therſites, aut Aesopus, hæc eadem audiens, se omnium mortalium miserrimum existimaret, quoniam maximè deformis, atque ignobilis esset. Sed hæc ioci gratia dicta sunt: nam non omnino excusari posse Cicero videtur quin in hac re grauissimè deliquerit. Cetera videamus. Diuitie, inquit, & imperia, & voluptates nequaquam in bonis sunt. Cur Cicero? non enim video, quare bona non debeam appellare, quæ Socrates bona vocauit. Quoniam homines, inquit, his rebus circumfluentes, ea tamen desiderant maximè, quibus abundât: neq; enim vnquam expletur, nec satiatur cupiditatis sitis: neq; solum ea, quæ habent, libidine augendi cruciantur, sed etiam amittendi metu. O mirum acumen Cicero tuum: ergo te his rationibus probasse putas, neq; diuitias, neq; imperia, neque voluptates esse bonas, quoniam improbi homines eis non satiantur? & quamuis eis abundant, tamen et libidine, & metu cruciantur? Sed dic mihi, vitia ista, quæ commemoras, in rebus ne sunt, an in hominibus? Si in rebus, cur non igitur omnes, qui diuitijs abundant, qui imperia consequuntur, qui aliqua voluptate afficiuntur, improbi, atq; scelerati sunt? accepimus enim & antiquo tempore, & patrum nostrorum memoria fuisse, & etiam hoc tempore videmus esse multos, & diuites, et principes, qui honestis
volupe

voluptatibus oblectantur, bonos viros, & sanctos, atq; religiosos haberi, & esse: neq; enim diuitiæ, neq; imperia, neq; honestæ voluptates quemquam impediunt, quo minus virtuti atq; bonis moribus, si voluerit, dare operam possit. Non igitur in rebus vitia sunt, sed in hominibus: quoniam, ut rectè poëta quidam cecinit, Non res in vitium sed malefacta cadūt. Quamobrem etiam ego tecum hominum improbitatem, Cicero, condemno: neque tamen ideo diuitias, & imperia, & voluptates, non esse bonas, rectè concludi arbitror. Quicquid enim aliquo modo potest ad acquirendam felicitatem prodesse, id ego cum doctissimis atq; sapientissimis illis viris Socrate, Platone, Aristotele, bonum appello. Sed diuitiæ, imperia, voluptates, (non belluina, quas etiam nos magnopere condemnamus) plurimum ad virtutem, atq; honestatem acquirendam, quæ felicitatis effectrix est, prodesse possunt. Quis enim nescit, paupertatem, atque mendicitatem, maximum impedimentum esse virtutis atq; sapientie? Quis non intelligit, diuites longè commodius ingenuis artibus, atq; disciplinis, quæ facilem ad honestatem viam præparant, quam pauperem vacare posse? Quod si plerique diuites turpibus se voluptatibus, atq; otio dedunt: id non diuitiarum, sed ipsorum hominum vitium est. Non enim cuiquam dubium esse potest, quin diuitijs bene uti liceat, si quis voluerit. Quod
idem

idem etiam de imperijs, atque voluptatibus dicere licet: Nam optimus princeps viuum Dei simulachrum est: qui priuatorum commodis, atque vtilitatibus studet: iustitiam, atque æquitatem maximè conseruat: nihil aliud vnquam, quàm de communi salute cogitat: quem cùm Aegyptij significare vellent, oculum cum sceptro pingere solebant: quoniam quod oculus in corpore, id princeps in Repub. quòd in cælo Sol, id in terris princeps bonus. Pro Dij immortales, audebit ne dicere Cicero, bonorum hominum imperium non esse bonum? Quid est quod magis in hac vita Dei similitudinem repræsentet? quid est quod propius ad Dei bonitatem accedat, quàm ille conseruator populorum, (vt primo de Repub. Socrates appellat) sanctissimarum legum moderator, communis patriæ parens, facilis, humanus, temperatus princeps? Sed non committam, vt me in communem locum excurrere, detractandæ disputationis gratia, quod facere sæpe Rhetores solent, existimetis. Videtis enim, quàm latus pateat dicendi campus de bono principe, si mihi libeat oratione spatium. Sed redeo ad illud, quod omnes intelligunt, Bonum quidem virum semper esse vtilem: sed longè vtiliorem, si etiam diues fuerit: vtilissimum verò, si principatum fuerit adeptus: nec alia de causa Plato in sexto de Repub. libro, tum deniq; beatas fore Respub. existimauit, si aut sapientes homines eas re-
gere

gere cœpissent : aut qui regerent, omne suum studium in doctrina atq; sapientia collocassent: nisi quia videbat, imperium sicui bono viro obtigisset, rem fore, omnium humanarum maximè diuinam. Sed, vt breuiter hanc partem expediam, dico ex Platonis sententia, Diuitias, imperia, voluptates, ceteraq; huiusmodi, mediam quãdam naturam obtinere: vt benè vtentibus bona sint; malè autem vtentibus mala. Sed quoniam semper ab eo quod excellit tota res appellatur: ideo factum est, vt res id genus mediæ, quoniam aliquod ad honestatem adipiscendam momentum habent, & magnam in vita commoditatem præstant, à Peripateticis atq; Academicis bona vocarentur. Et re vera, quoties ad finem eum, cuius gratia nati sumus diriguntur, vt semper bona sint necesse est. Nam vt libro de legibus nono Plato sanctissimè docet, Optimè sanè, & pulcherrimè viueremus, si vera de diuitijs sententia ubiq; prædicaretur: ea verò est, Quòd diuitiæ corporis gratia sint, corpus autem animi gratia. Quare cum bona ea sint, quorum gratia sunt possidenda diuitiæ, tertium gradum post virtutem animi corporisq; tenebunt. Hæc ergo ratio nos tanquam magistra docebit, non oportere hominem, qui felix sit futurus, diuitias quomodocunq; sed cum iustitia et temperantia querere. Quin etiam ibidem paulò antè docuerat, quæ causa sit, cur diuitiæ sæpenumero nocere soleant:

soleant : quia scilicet ab avaris, atq; improbis hominibus non recto ordine requiruntur. Quippe, inquit, tam Graci, quàm Barbari, diuitias, cùm tertium bonorum teneant locum, in primo ponunt : atque hac sententia seipfos simul, & posteros perdunt, ex quo loco, sicut etiam ex alijs plerisq; perspicuum est, Diuitias in bonis, sed in tertio demum loco à Platone numerari. Eorum enim bonorum, quæ ad felicitatem spectant, primum honestas atq; animi virtus locum obtinet : secundum corporis virtus, ut valetudo, robur, pulchritudo : tertium deniq; diuitiæ, ceteraq; quæ à fortuna donari hominibus ornamenta putantur. Quæ cùm ita sint, nulla erat causa, cur Cicero maiores suos, homines continentissimos, imprudentiæ condemnaret, qui pecuniam atq; diuitias bona putauerint appellanda : quoniam omnino quoties ad humanæ vitæ finem diriguntur, hoc est ad felicitatem, vera bona sunt. Vnde Iurisconsulti, quamuis hoc Ciceronis paradoxon pleriq; videre potuerint, tamen omne genus pecuniarum bonorum nomine appellare non dubitarunt. Hinc illi tituli, atq; inscriptiones, passim in toto iuris corpore sparse leguntur, de bonis quæ liberis, de bonorum possessione secundum tabulas, & contra tabulas, de bonis libertorum, de bonis maternis, de bonis proscriptorum, de bonis auctoritate iudicum possidendis, de bonis vacantibus : hinc dicuntur bona hereditaria, bona aduentitia, bona
cuium

eiuium publicare, ceteraq; huiusmodi propè innumera-
rabilia. Sed vrget nos Cicero valido (vt ipse putat)
argumento: Non potest (inquit) bonum cuiquam malo
esse: neque potest quisquam in abundantia bonorum
ipse esse nõ bonus. Verissima hæc sunt Cicero: quis ne-
get? Sed ista (inquit) omnia talia videmus, vt &
improbi habeant, & obsint probis. Hac ratione de-
monstratum à se fuisse putat Cicero, non esse bonas di-
uitias. Sed nimirum in eo fallitur, quia mediam non
secat viam. Nam si aduerteret, hæc in se neque bona
esse, neq; mala, sed tantum ad aliquem finem collata,
bona, vel mala nuncupari: videret sanè, nullam in ar-
gumentatione sua vim inesse. Verissimum quidem,
nullum bonum, quatenus est eiusmodi, cuiquam malo
esse: sed quoties ad alium finem, quàm ad sapientiam,
& felicitatem, ex ijs aliquid quæ media sunt, dirigi-
tur, non amplius illud bonum est, sed statim malum
efficitur. Ita vnusquisq; in abundantia bonorum ne-
cessariò bonus est, quoniam illa bona omnia ad finem
rectum ordinat: si verò ad alium finem, vt ad prauas
voluptates, ad ambitionem, ad tyrannidem, ad ex-
plendas cupiditates, opes suas aliquis conserat: non
iam eum ego bonis abundare dicam, quoniam ea quæ
possidet, non amplius formam suam, neq; id, cuius gra-
tia possideri debent, intuentur. Quòd autem ait Ci-
cero, Bona hæc probis viris obesse: mirari non satis
possum,

possum, neq; id qua ratione fieri possit, prorsus intelligo: cùm præsertim à Socrate in Apologia sua didicerim, probo viro neq; viuo, neq; mortuo quicquam obesse posse. An hoc fortasse dicit Cicero, quoniam interdum accidit, ut propter diuitias, atq; imperia, bonis viris multæ fiant insidiæ? nihil enim esse aliud opinor, in quo possint hæc dici probis obesse. Sed huius certe nocumenti, si modo bonis viris noceri potest, nō ipsæ diuitiæ, aut imperia per se, nisi fortasse casu aliquo, sed inexplebilis illa prauorum hominum cupiditas in causa est, quæ diuitias, atq;, imperia non honestatis gratia, sed voluptatis atq; ambitionis appetit. Rectissimè autem Bias secum omnia sua se ferre dixit: quoniam nihil est cuiquam suum, nisi quod ad sapientiam prodesse possit: neq; vir intelligēs, hæc de quibus agimus, diuitias, imperia, voluptates appetet, nisi quantum sibi ad virtutem facilius amplectēdam prodesse posse viderit: quoties autem impedimento sibi esse cognoscet, ea statim relinquet. Hinc est, quod Thebanus Crates in mare pecunias abiēcisse dicitur, & Democritus patrimonium suum neglexisse: quamuis hoc nō sapienter mihi fecisse videntur, longè enim melius fuisset, pauperibus, atq; mendicis ea distribuere. Quod autem magnam exemplorum vim congerit Cicero, ut Romuli, Numæ Pompiliū, Bruti, Mutij, cæterorumq; Romanorum: eis exemplis orationem potius suam illustrat,

strat, & splendidiorē reddit, quā id, quod proposuit, aliquo modo confirmet. Quid enim absurdius hac inductione reperiri potest, si ad argumentationis formam hoc modo reducatur? Romulus, Brutus, Decius, ceteriq; multi, nihil in vita prater honestatem sibi expetendum existimarunt? Ergo sola honestas bona est. Hac sanè ratione possem ego solam voluptatem esse bonam argumentari: quoniam Eudoxus, Philoxenus, Xerxes, Aristippus, Epicurus, Metrodorus, Apicius, ceteriq; innumerabiles, nihil prater voluptatem sibi expetendum proposuerunt. Hac ratione avaris solæ diuitiæ bonæ videbuntur, ambitiosis sola gloria, atq; hoc modo possum in singulis procedere: sed non quid in hominum opinione, verum quid in re sit, considerandum est. Nam si isti summi viri ad res illas tam præclaras, ut felices fierent, accedebant: certum est, quod non honestatem solam bonam existimabant, nisi adiungeretur etiam felicitas. Si verò id agebant, ut nomen suum immortalitati consecrarent: honorem etiam, & gloriam, bonam existimabant. Quod si tantum, ut honestè agerent, tam præclarè se gerebant, neq; ad gloriam, neq; ad felicitatem respicientes: (quod nunquam crediderim) non tamen ideo necessariò sequitur, ut quod honestum est, id solum bonum sit, propterea quod illi ita se gesserint: quoniā ex hominū opinionibus, & actionibus, nihil in rerum
d natura

natura necessariò dependet : neque enim aliquid ideo rerum est, quia plurimi verum opinantes, illud omni ratione assequi student. Iam verò quòd in extrema huius capituli parte pluribus verbis voluptatem Cicero damnat, quoniam aliqui summum bonum in ea esse voluerunt: nomen hoc Voluptatis distinguendum arbitror. Nam si voluptatem eam intelligamus cuius auida libidines temerè, & effrenatè ad potiundum incitantur, quam Plato in Timæo escam malorum appellat, & quam in legibus ait Cicero penitus in omni sensu implicatam insidere, & esse quidem boni mutatricem, sed malorum matrem omnium, rectissimè certè hoc in loco à Cicerone, sicut etiam in Catone maiore reprehenditur. Si verò voluptatem eam puram atq; synceram, de qua Socrates in Philebo multa sanè verba facit, & ad beatissimam vitam efficiendam ait cum sapientia permisceri, intelligamus: nulla est causa, cur non eam non tantum in bonis, sed etiam in summis bonis numeremus. Quòd autem ita voluptates distinguantur, ut aliæ bonæ sint, aliæ malæ, quod nusquam aduertisse Cicero videtur, audite quæso Socratis verba, quæ nuper è Philebo decerpimus: nam ibi fingit à se Socrates mentem & sapientiam interrogari, utrum omnes sibi voluptates, & bonas, & malas admisceri patiantur: Mentem autè sibi respondentem fingit, tantum eas, quæ puræ sunt voluptates,

à se admitti: reliquas autem omnes à se se reijcere. Sed præstat eius verba recitare: Nostra, inquit, posthac interrogatio talis erit. Vtrum præter illas veras voluptates vobis etiam opus est vehementissimarum, maximarumq; voluptatum commercio? Fortè sic illæ respondebunt: Minimè verò, ô Socrates: hæ namque impedimenta nobis innumerabilia præbent: animas enim, quas incolimus, voluptates istæ furiosæ perturbant, nec adolescere nos permittunt, nostrumq; genus plerunq; per negligentiam, obliuione illata, penitus corrumpunt. Alias autem illas voluptates veras, ac puras, quas ipse narrasti, fermè nobis esse domesticas existima: & præter has, etiam illas, quæ cum sanitate, & temperantia, cæterisq; virtutibus capiuntur. Has enim, quæ virtutis, tanquam Dææ cuiusdam, pedisequæ sunt, libenter admittimus: quæ verò cum dementia, atque alia improbitate congregiuntur, eas Menti, & sapientiæ permisceri putare, absurdum est.

Quamobrem nulla ratio est cur in eos tantopere Cicero sæuiat, atq; eloquentiæ suæ fulmina iaculetur, qui voluptatem summum esse bonum affirmarunt. Nam si de illa, quæ vera voluptas est, senserunt, optimè sensisse videri possunt: erit enim eadem ferè, quæ grauissimo nomine Sapientia, quæq; Felicitas appellatur: cuius etiam in hac vita partem aliquam eo tēpore percipere solemus, cum res aliquas egregias, atq; honestas

nos effecisse intelligimus. Atq; hoc est, quod in eodem Philebo Socrates dicit, his quidem verbis: Falsis voluptatibus homines pravi plerunq; gestiunt: boni autem homines veris aluntur. Hæc igitur vera voluptas omnino meliorem efficit, & laudabiliorem virum: & qui eam habet, honestissime gloriari potest. Quod cum ita sit, quis non intelligit, totam huius primi capituli conclusionem esse falsam? Sic enim concludit Cicero: Si voluptas, quæ plurimorum patrocinijs defenditur, in rebus bonis habenda non est, eaq; quò est maior, eò magis mentem ex sua sede, & statu dimouet, profectò nihil est aliud benè ac beatè viuere, nisi honestè, & rectè viuere. Possum enim ego, & quidem fortasse longè melius, & verius ita concludere, Cum vera voluptas, qua probi homines delectantur, & aluntur, cum sapientia permixta summum bonum efficiat, eaq; quò est maior, eò magis mētem nutrit, atq; in suo statu corroborat: profectò nihil est aliud benè ac beatè viuere, nisi cum vera voluptate ac sapientia viuere. Quid autem hæc mea conclusio à Ciceronis conclusione differat, satis ex ijs, quæ supra diximus, perspicuum esse arbitror. Hæc cum dixisset Marcus, oculos, quos in dicendo fixos ad terram continenter habuerat, sustulit; & singulorum vultum intuitus illud addidit: Hæc habui, quæ contra primum Ciceronis paradoxon mihi dici posse viderentur: quæ si
forte

forte vobis inania visa sunt, ignoscite adolescentiæ meæ: si aliqua sunt acutè dicta, nec omnino malè conclusa, restat, ut omnes Maioragium obtestemur, (quamvis hoc sua sponte facturum reor, quandoquidem se Ciceronis patronum profitetur) ut hæc mea refellat: neq; hanc, siue imperitiæ, siue negligentia, labem in Ciceronis nomine inueterare sinat. Tunc ego, Habeo quidem, inquam, Marce, quæ respondeam: sed quoniam te, quod nō putaram, ad hanc disputationem paratissimum venisse video, volo etiam mihi spacium ad cogitandum dari: neq; enim ea est in me facultas, ut ex tempore possim tuis tot argumentis respondere.

Tunc Franciscus: Bono, inquit, animo esto Marce, nam ista Maioragij tergiuersatio, atq; fuga, mihi significare omnino videtur, nihil eum habere, quod tibi respondeat. Noui enim eius ingenium, noui animi impetus. Nullo modo silere posset, siquid contra te haberet, quod vel esset verisimile. Sed vis ne tibi dicam, quid in mentem mihi, te dicente, venerit? Quid nam, inquit ille. Ut quoniam, inquit, tu quasi viam ad evertēda Ciceronis Paradoxa nobis præmunisti, nos etiam alij singuli singula subuertamus, ne Maioragio spacium ad sese colligendum, & suum Ciceronem defendendum præbeamus. Nam ex oratione tua quedam annotavi, & quedam etiam alia mihi in mentem veniunt, quæ secundum Paradoxon subvertere facile
d 3 posse

posse videantur. Itaq; quod inter nos facere liceat, qui familiares & penè domestici sumus, ego me polliceor, si vobis audire placuerit, conaturum secundum illud Paradoxorum caput euertere: quod licet ita doctè, atq; ingeniosè, quemadmodum in Marce, efficere me posse non sperem: illud tamen profectò efficiam, ut nos alij incundè postea rideamus, Maioragio verò oculi doleant. Hoc quidem certè, inquit Marcus, nihil mihi optatius accidere posset, quàm ut te quoq; & Antonium fratrem tuum, si voluerit, ineptiarum mearum comites habeam. Nam Primum nullis precibus adduci posse spero, ut nobiscum vir tantus, hoc est cum paulò loquacioribus, & fortasse non imperitiis adolescentibus, vir omnium grauisimus, & doctissimus, insaniat. Quid, inquit Antonius, an hoc indecorum Primo tibi fore videtur, si de ijs rebus, quæ ad eruditionem pertinent, paulò liberius, & quasi iocandi gratia, nobiscum agatur? cum præsertim grauisimos homines etiam puerilibus ludis animi relaxandi gratia delectatos fuisse legamus: nam Socrates cum pueris in foro, Catonem Censorium cum vernis, & seruulis domi ludere solitum accepimus, quod etiam de Archita Tarentino, atq; Heraclito Ephesio memorie proditum est. Nam Amasis Aegyptiorum Rex, qui sapientissimus habebatur, post seria negotia scurrari & Morionem agere solitus dicitur. Magnum verò

Verò illum Agēsilaum cum infante filio palam arundinem equitare non puduit. Quid Alexander Seuerus? an non per dies festos perdicum & catulorum pugna sese oblectabat? Iam verò Augustus alex. lusu frequenter animum relaxabat. Quare nō est quod de Primo Marce dubites, nam eum vel inuitū cogemus contra Ciceronem aliquid, dum in hoc otio sumus, ex intima illa sua scientia proferre: seruabimusq; eam Lacedæmoniorum consuetudinem, quam apud Platonem in Theæteto Socrates commemorat: ait enim, solitos fuisse Lacedæmonios, cū quis adesset in Palæstra, eum compellere, ut vel exueretur & certaret, vel confestim discederet. Itaq; Primus vel eadem agat, que nōs quoq; viderit agere, vel si grauitatem illam suam seruare voluerit, procul eū à nobis relegabimus.

M. ANTONII MA-

IORAGII ANTIPA-

RADOXON LIBER

S E C V N -

D V S.

x



HAEC dum agerentur inter nos, accurrens servus è Marci familia nunciavit, nō mediocriter de nobis coquum iamdiu conqueri, quòd paratum prandium corrumpereetur: et praterea Marci patrem Lancillotum cum duobus fratribus Gaspere, & Donato, ex vrbe rediisse, quòd propter sua quaedam negotia se contulerat, dum inter nos colloqueremur. Age igitur, inquit Primus, ad prandium accedamus, ne viri nobilissimi, atq; optimi, nos diutius expectent: nam me hoc triduo in vestra fore potestate spondeo, ut etiam si nucibus me ludere volueritis, non recusem. illud vnum doleo, quòd omnes in vnum Maioragium conspirasse videbimur, si omnes de Cicerone suo detraxerimus. His dictis statim ipse Primus, ut erat primus exurrexit, deinde nos ceteri omnes, & ad Fannianos, qui nos in porticu quadam ad Aquilonem versa inambulantes expectabant, vnà ire perreximus. Sed inter eundem apprehensa manu mea Mar-

cus, summa quadam comitate, atq; vultus hilaritate, me rogabat, ne ægrè ferre vellem, quòd ipse in Ciceronem quasi declamandi autor extitisset: id enim se fecisse aiebat, non alia de causa, nisi vt aliquid à me eliceret, vnde proficere, atq; eruditior fieri posset: neq; se existimasse futurum, vt cæteri quoq; provinciam eandem impugnandi Ciceronis sua sponte susciperent. Cui cùm ego dixissem, non tantùm non molestam, sed etiam maximè iucundam eius mihi orationem fuisse: quoniam vidissem eum & ingenium, & artem, & doctrinam maiorem, quàm in eo esse putabam, ostendisse, vehementer mihi letari visus est. Interea iam ad porticum veneramus & consalutatis Fannianis maximè hilari vultu ab eis excepti sumus. Sed postquam exempta fames epulis, Quid, inquit Lancillottus, hodie in hortis tandiu cōmorati estis Primè? nam ego urbem ingressus multa negotia expediui: deinde cum his fratribus meis reuersus, in eodem adhuc vos loco sedere audiui. An fortasse vobis molestus fuit Marcus meus, scio enim quantopere soleat in literis esse curiosus, vt sæpenumero non tantùm venationis, armorum, equitationis, quæ studia nobilitatis esse solent, sed etiam cibi, quòd interdum doleam, obliuiscatur: neq; quemquā nactus paulò doctiorem dimittit, donec illum satietate defessum viderit: nam ipse nunquam de literis agēs satiari videtur, atq; hac de causa

d s procul

procul eum ab vrbe remoueo, ne nimio fortasse literarum studio graue aliquid patiatur. Nobis ne molestus Marcus tuus? inquit Primus: quem ego summa cum admiratione, noua quædam, atq; ante hunc diem inaudita, contra parentem illum Romanæ linguae Ciceronem hodie disputantem audiui. Tunc ridens Lancillotus, Fieri ne potest, inquit, ut filius meus contra Ciceronem aliquid dixerit: quem semper habet in manibus, quem vnum auctorem maximè suspicit, quæ ad astra tollit, quo vno nomine se plurimum huic Maioragio debere fatetur, quoniam ab ineunte pueritia nullum ei, præter Ciceronem, per tres annos auctorem interpretatus sit. Quid? quòd omnia Ciceronis volumina quatuor aut quinque typorum generibus excusa coëmit? Et quod interdum perquam suauiter rideo, non eis contentus, etiam manu scripta sibi queri mandat, perinde quasi librorum eiusdem generis multitudo possit eum doctiorem efficere, neque vnum Ciceronis volumen ei satisfacere possit. Tunc Marcus, Dic quæso, inquit, mihi pater, sunt ne equi omnes eiusdem generis, et enses, et ephippia? Quid hoc ad rem? inquit ille. Nihil, ait Marcus: sed responde. Tum Lancillotus, Sunt, inquit, filii: sed quorsum hoc interrogas? Ut à te causam inuestigem, inquit Marcus, cur non eodem modo tu vno e quo, vno ense, vno ephippio contentus sis, quemadmodum me iubes vno Ciceronis volu

voluminē contentum esse. Hic omnes arrisere, atq;
 in primis Lancilloti frater Donatus, qui equorum ma-
 ximè studiosus est, & plures semper, atq; eos nobilissi-
 mos habere studet. Qui cū hæc audiisset, Verum
 est, inquit, Lancillote, nullo modo fieri potest, ut qui
 aliqua re delectatur, is una tantū eius generis con-
 tētus esse possit. Nam si quis sortasse princeps unicum
 tantū equum me habere iubeat, omnino mihi vitam
 esse acerbam putem. Esto inquit Lancillotus, vice-
 ris Marce, modò ne tuum istud tam acre studium, va-
 letudini corporis obsit. Deindè ad me conuersus, Quo-
 modo tandem hoc, inquit, aut quo animo Maioragi
 tulisti? quòd discipulus tuus, quem à te scio amari plu-
 rimum, in ciceronem tuum inuectus sit? Non ègrè
 sanè, inquam ego: quin potius Marci ingenium, atq;
 acumen tacitè mecum exosculatus sum, & incredi-
 bilem ex eius disputatione cepi voluptatem, quod istis
 certè consobrinis meis nunquam persuadere possem.
 Nam ut hoc etiam intelligas Lancillote, decreuerunt
 hoc triduo contra Ciceronem perpetuò declamare:
 quòd non tantum exercēdi ingenij gratia, (quid enim
 Primus exercitationis indigeat? qui iam pridem studio
 & labore tantum effecit, ut in trium linguarum La-
 tine, Græcæ & Hebrææ cognitione nemo superior,
 paucissimi autē pares hoc tempore reperiantur) quan-
 tum, quòd se mihi rem ingratham faciuros arbitrātur,
 ut ipsi

ut ipsi deinde inter se rideant, ego verò solus doleam.

Hinc ille lachrymæ Franciscus inquit : nihil est quod dissimules Maioragi, nam tua te oratio prodit, neq; dissimulatum quicquam, ut ait Cicero, potest esse diuturnum: ego certè quod pollicitus sum, vel in præsentia, vel quando magis Marco libuerit, audenti animo præstabo, & nisi me fallit animus, secundum Ciceronis Paradoxon penitus euertam. Hic Lancillottus suauiter ridens, Forti animo (inquit) esto Maioragi, neq; te perturbet horum adolescentium iuuenilis ardor : sed in præsentia melius est paulum quiescere, donec se calor frangat : ad institutam autem disputationem reuerti poteritis hodie vesperti : nam interim arma Franciscus preparare poterit, quibus Ciceronem confodiat: vos autem reliqui, quoniam id temporis est valetudini operã date. Quæ cum dixisset, exurrexit, & cum fratribus suis ad sua se domestica negotia contulit. Primus autem, & Antonius, proximam in cœnationem, ubi lectus magnificè constratus erat, meridiatum accefferunt. Me verò Marcus, quoniam sciebat meridiari non solere, apposito alueolo, ad latrunculorum ludum inuitauit: quo sanè ludi genere, quoniam ingeniosum est, et pugnae quandam speciem repræsentat, statim à cibo, cum negotiis vacuus sum, delectari soleo. Tres igitur, atq; amplius, horas ludendo & colloquendo cum Marco meo consumpsi : nam

etiam

etiam inter ludendum aliquid à me continenter exquirebat, quod ad eruditionem facere videretur: tanta est in eo adolescente discendi cupiditas. Franciscus verò, ut existimo, non enim aduerti quò proficisceretur, totum illud tempus in meditando, atq; in excogitandis argumentis consumpsit: nam id temporis Dialecticæ studijs, operam nauabat, quamuis iam aliquos in Philosophia progressus, in ea præsertim, quæ ad mores attinet, effecerat: nam fratrem suum Primum in ea re doctissimum præceptorè habuerat. Cùm itaq; Marcus, & ego, ludo relicto, atq; in ambulantes in porticu duo, triaue spatia confecissemus, venere Primus et Antonius, qui postquam aqua recenti faciem, os, atq; manus abluissent, Quid, inquit Primus, nobis agendum est Marce, nam hoc triduo auctoritati tuæ parere decreuimus, etiam si nos iubeas equitare in arundine longa, quod ait Horatius. Quid aliud, inquit Marcus, nisi ut de literis agamus: nullam enim ego maiore voluptatem excogitare scio. Quare vel Franciscum promissa præstare compellamus, vel si magis libet, aliam aliquam disputationem instituamus: nihil enim ego moror, qua de re agatur, modò proficere aliquid atque addiscere possim. Minime verò, inquit Primus, neq; enim aliud agendum arbitror: sed urgenda est illa in Ciceronem disputatio, ne hoc tantum gaudij Maioragio detur, si præter eius spem ab oppugnando

quando Cicerone discefferimus: nisi fortè, dum nos meridianum somnum capimus, te vel munere aliquo, vel pollicitatione subornavit, ut aliquid aliud tractandum proponeres. Quid, inquam ego, Prime? putas'ne, quamvis hætenus tacuerim, me agrè ferre, quòd ab eruditis illis quidem, sed tamen cupidis, & ab ætatis fervore distractis adolescentibus Cicero reprehendatur? An ex tanti viri auctoritate quicquam ab istis adolescentulis detrahi potest? Me certè magis illud mouet, quòd te quoq; pollicitus es contra Ciceronem aliquid esse dicturum: quod si facere conatus fueris, inueniam certè (quemadmodum apud Platonem ait Euthyphron) qua parte debilis infirmusq; sis. Noli enim sperare, te sic impunè abiturum, siquid in Ciceronem hiscere ausus fueris. O' diem, inquit Marcus, mihi letum, & optatum, si duo vos, quos omnium mortalium plurimi facio, & maximè suspicio, congregi videam, & de literis concertare. Nò enim fieri poterit, quin multa pulchra & præclara sum auditurus. At hoc, inquit Primus, tibi Marce nequaquam sperandum est: nam in Ciceronem ea dicturus sum, quæ non modò Maioragius iste noster, sed ne ipse quidem Cicero, si reuiuiscat, defendere possit: quoniam quæ in tertio Paradoxo sunt à Cicerone pertractata, sunt omnia falsa, atq; à veritate longè aliena. Neque verò te præterit, eam esse veritatis naturã, ut quamvis

nis acutis rationibus, atque argumentis verisimilibus oppugnari, nunquam tamen neq; expugnari, neq; labefactari possit. Sed ecce, inquit, frater meus Franciscus alacris venit meditatus alicunde ex solo loco, orationem sperat inuenisse se, qua Ciceronem differat: illum igitur, si libet, audiamus. Iam in me nulla mora est, inquit Franciscus: adsum, ut videris: tu Marce quid fieri vis impera. Sedeamus, inquit Marcus, sic enim commodius & tibi dicere, & nobis quæ dixeris audire licebit. Ibi statim omnes ijs in sedibus, quæ sub porticu erant, cōsedimus. Tum Franciscus: Magnum, inquit, onus, & longè difficilius, quàm putaram, me suscepisse video: nam te dicente, Marce, multa mihi in mentem veniebant, quibus ostendere posse existimarem, nequaquam verum esse, quod in secundo Paradoxo probare Cicero conatur, Seipsa contentam esse virtutem ad beatè viuendum. At verò postea quàm totam rem diligentius animaduerti, cognoui longè difficilius esse, secundum hoc euertere, quàm primum illud, quod tu facillimè Marce refutasti: quod sanè perquam incommodè accidit, ut ego, qui te in disputando longè sum inferior, id quod difficilius est, & longè verisimilius, impugnandum susceperim. Sed quoniam hoc ipse mihi onus, nullo cogente, imposui: quauis ratione, etiam si nemo alleuet: illud perferre contendam. Sequar igitur tuum Marce ordinem

dinem in disputando, quoniam longe mihi pulcherri-
mus videtur, ut primo doceam, hoc Paradoxon, ne-
quaquam esse Socraticum: deinde non esse verum:
tum nullum esse in hoc Ciceronis capite argumentum,
quod acutè conclusum esse videatur. Primum igitur,
quod ait Cicero, Se ipsa contentam esse virtutem ad
beatè viuendum: idem ferè dicere videtur, quòd in
primo Paradoxo dixerat, Nihil esse bonum, nisi quod
honestum. Virtutem enim & Honestatem eandem
esse, nemini dubium est. quòd si tantum ea, quæ ad fe-
licitatem prosunt, bona sunt, & virtus sola beatum
efficit: ergo sola virtus est bona. Quod idem esse, ac si-
quis dicat, Quod honestum est, id est solùm bonum,
quis non videt? Quare quæcunq; Marcus ingeniosè
contra hanc sententiam disputauit ad hoc caput euer-
tendum referri possunt. Sed ne videar Geometrarum
consuetudinem sequi, qui semper antè probatis ad se-
quentium probationem vtuntur, noua quedam alia
mihi sunt proferenda. Illud tantùm dicam, Quòd si
virtus propter finem aliquem expetitur, quod nemo
sanæ mentis negare audeat, nullo modo verum esse po-
test, ut per se sufficiens sit ad beatè viuendum. Differt
enim plurimum (ut ingeniosè Marcus declarauit)
id quod expeti debet, ab eo cuius gratia debet expeti:
virtus autem propter felicitatem quæritur: non igitur
est eadem virtus, quæ felicitas. Quo fit, ut per se
virtus

virtus beatum virum efficere non possit, cum aliud quiddam à felicitate virtus sit. Verum hæc posterius à nobis alio in loco clarius, & copiosius explicabuntur. Nunc illud doceamus, nequaquam hoc effatum cum Socratis sententia convenire. Sed quem huius rei potissimum testem adducam? Primum, ipsum Ciceronem contra seipsum testimoniū dicere cogam: deinde Socratem aliter clamantem, quàm quod ait hoc loco Cicero, audietis. Quid igitur ait Cicero? perlegite librum illum qui Academicarum questionum inscribitur, ibi sanè inuenietis à Cicerone explicatum, quæ Socratis fuerit, & Socraticorum omnium de summo bono sententia. Nam idem omnino esse putat Cicero, Bene, beateq; vivere, & Felicem esse, & summum bonum esse consecutum: quod etiam nos verum esse concedimus. Hæc igitur Ciceronis verba sunt cum de Socraticis loqueretur: Primam partem illam bene vivendi à natura petebant, eiq; parèdum esse dicebant: neq; vlla alia in re, nisi in natura, quærèdum esse illud summum bonum, quò omnia referrentur. Videtis ne, ut Socrates non in virtute, sed in natura summum bonum, atq; felicitatem quærèdam esse existimet? quod quamvis sine virtute fieri non possit, non tamen ideo sequitur ut in virtute sit felicitas. Verum ut in hac re dicam ingenuè quod sentio, non mihi videtur Cicero Socratis atq; Platonis sententiam percepisse: cum
e enim

enim ait Socrates, In natura summum esse bonum: non ita intelligendum est, quemadmodum fecisse videtur Cicero, quasi in ipsius hominis natura sit illud summum bonum: hoc enim apertissime falsum est: nam hac ratione cuncti mortales, quamvis improbi, atque conscelerati sint, beati essent, atq; felices, si in eorum natura summum esset bonum. Sed certè naturam diuinam Socrates intelligit, in qua sine cōtrouersia summa felicitas est, atq; beatitudo: de qua vir sapiens Cato, Naturam, inquit, optimam ducem, tanquam Deum sequimur. Nam sēpissime, apud nostros etiam autores, idem est Natura quod Deus, quod eò carmine declarat Ouidius:

Hanc Deus & melior litem natura diremit.

Quòd longè apertius, atq; explanatius, quarto libro de Beneficijs Seneca docet, his quidem verbis: Natura, inquit, hæc mihi præstat. Non intelligis te, cū hac dicis, mutare nomen Deo? quid enim aliud est Natura, quàm Deus? & diuina ratio toti mundo, & partibus eius inserta? Hoc autem obscurius quidem, sed ita tamen, ut intelligi possit in Sophista Plato ostendit: docet enim cælum, astra, homines, ceterasq; animantes, & quæcunq; è terra gignuntur, non Naturæ fortuitæ opera esse: sed eius Naturæ, quæ cum ratione, scientiaq; diuina operetur, & quæ ab ipso Deo sit orta.

Quamobrem naturam hanc diuinam, quam ortam à

Deo

Deo Socrates ait, ipsum esse Dei filium, de quo Marcus in disputatione sua quædam præclare dixit, intelligendum est: quam Socratici diuinam Mentem, nos Christum appellamus: in hoc enim solo vera felicitas, & summū illud bonum est, quod quærimus: hæc enim ea Natura est, quæ ab immortalī Deo sempiternis seculorum ætatibus progenita, res omnes ex confusione illa inani, de qua Moses initio sui operis meminit, in lucem produxit, & bonitatis, atq; naturæ suæ participes eas effecit. Hanc igitur Mentem, hanc sapiētiā perfectā, hanc rationem sempiternā, hunc Dei filium, hanc Dei providentiā (nam his omnibus nominibus Naturam hanc à Platonicis appellari, me frater Primus docuit) spectare semper, atq; sequi debemus: propter eam quòd in ea sola beatitudo sit collocata: cui si nos quā simillimos efficere studuerimus, tum demū nihil deerit nobis ad benè, beateq; viuendum: hoc autem per virtutem effici commodissimè potest. Quò fit, ut medium quoddam sit virtus, atq; via recta, per quam ad felicitatem veniamus. Et quoniam ad hanc viam, atq; honestè, beneq; viuendi rationem, nonnulla quoq; alia, præter ipsam virtutem, conducere videntur, ideo noluit Socrates virtutem per se esse contentam ad beatè viuendum: sed constituit, (ut ait in Academicis Cicero) extremum esse rerum expetendum, & finem bonorum, adeptum esse omnia è natura,

tura, & animo, & corpore, & vita. Quòd si quaerimus ex Socratis sententia, quanam una res sit, quæ per se contenta esse possit ad bene beateq; viuendum: non eam esse Virtutem inueniemus, sed Sapientiam: nam in Euthydemo clamat apertè Socrates, à sola sapientia felicem ac beatum hominem effici: quod idem in Alcibiade primo confirmat, cùm neminem beatum esse, nisi sapientem concludit. Hæc autem sapientia, quæ eadem cum felicitate, vt in Euthydemo legimus, quæ sola beatos homines efficit, nihil aliud est, quàm Mens illa diuina, Dei q; filius: quæ (vt ait etiam Cicero) perfectæ sapientia nominatur. Atq; hinc est, quod in Phædri postrema parte Socrates concludit, Deum solùm propriè sapientem dici: homines verò, qui Dei cognitionem inuestigant, non propriè sapientes, sed amatores sapientiæ. quod idem est, ac si diceret, Dei amatores rectè nūcupari. Iam igitur profectò videtis, in hoc decipi Ciceronem, quòd ex Socratis sententia virtus seipsa cōtenta sit ad beatè viuendum: non enim in sola virtute, sed in sola sapientia collocatam esse beatam vitam Socrates existimat. Alioquin Mens illa diuina, atque Deus ipse, beatus non esset: quoniam in Deo virtus non est, licet sit sapientia. Quid autem à virtute sapientia differat, nemo vestrum est, opinor, quin intelligat: nam Virtus est habitus animi rationi cōsentaneus: Sapientia verò est

est cognitio diuinarum atq; humanarum rerum. Atq;
 omnis Virtutis laus in actione consistit, ut in officijs
 ait Cicero: Sapientiæ verò tota laus est in cognitione.
 At verò felicitas ea, de qua nos loquimur, nequa-
 quam in actione, sed in sola Dei cognitione sita est,
 quemadmodū apertè declaratum à Socrate in Theæ-
 teto legimus. Bonæ autem actiones, quæ virtutū pro-
 priæ sunt, ad ipsam nos sapientiā perducere solent, quæ
 vera est animi felicitas, quam nobis illa summa Sa-
 pientia (quæ, ut diximus, Deus est) elargitur. Atq;
 hæc quidem de prima parte dicta sint. Sequitur ut
 ostendere aggrediamur, Paradoxon hoc minimè ve-
 rum esse posse: quæ sanè mihi pars longè facillima erit,
 quoniam Socratis sententiam verissimam esse iudico:
 à qua cūm Ciceronis conclusio discrepet, necesse est, ut
 etiam à veritate sit aliena. Quod ut facilius ostēdere
 possim, in arcem statim causæ conscendam. Cūm enim
 omnis nostra vis in animo & corpore sita sit, ut ait
 Sallustius: & corpus cum belluis, animum cum Dijs
 communem habeamus, videndum est, utrum in cor-
 pore, an in animo felicitatem statuamus: & si in ani-
 mo, utrum dum est in corpore, felix esse possit: an po-
 tius illud tempus expectandum sit, donec è corpore,
 tanquam è vinculis, atque carcere migrauerit: &
 in patriam suam reuersus, nihil amplius sit, quod eum
 perturbare possit. Sed neminem esse arbitror tam

*stupidum, tam rerum ignarum, & tam expertem
 veritatis, qui hominis felicitatem in corpore statuatur:
 nam hæc quidem pecudum vox esse videretur, non
 hominum: atq; boves, equos, asinos, sues, quod ani-
 mantium genus plerunque robustius corpus habent,
 quàm homines, essent etiam beatiores: quod quàm ri-
 diculum sit, nihil attinet disputare. Rectè enim Ari-
 stoteles, primo Ethicorum, nec bouem, nec equum, nec
 aliud animal ullum beatum esse posse dicit: quoniam
 nullum eorum eius actionis, quæ virtuti congruat, per
 quam solam ad felicitatem aditus est, particeps esse
 potest: ob eamq; causam ne puerum quidem esse bea-
 tum, quippe qui per ætatē, inquit, ad eam vitæ actio-
 nem nondum sit idoneus. Nequaquam igitur in corpo-
 re felicitas, sed in animo est. Oportet enim eum, qui
 beatus futurus sit, maximam virtuti operam dedisse:
 sic enim beatam vitam facilius assequetur. Sed Vir-
 tutem dicimus hominis, inquit Aristoteles, non quæ
 corpus, sed quæ animū attingit humanum: Beatamq;
 vitam animi actionem nominamus. Nam corpus qui-
 dem quasi vas, atq; animi receptaculum est: & apud
 Græcos id nomen corpus sortitum est, quòd sit quasi
 animi sepulcrum, quemadmodum in Gorgia, atq; in
 Cratylo Socrates declarat: hocq; nomen ab Orpheo
 positum existimat, eo quòd quasi sepultus animus in
 corpore sit, neq; vim suam in eo possit explicare. Atq;
 hoc*

hoc est, quòd ait in sexto Vergilius, Omnes animi perturbationes à corpore provenire, quoniam in corpore sit inclusus animus, tanquam in tenebris & carcere cæco. Et in Phædone Socrates, nobis magnum impedimentum esse corpus, ostendit, ad intelligentiam, atq; prudentiam acquirendam. Quin etiam in eodem Dialogo docet idem Socrates, Quoties à corpore trahitur animus ad hæc commutabilia, & caduca, quæ subiecta sunt sensibus, errare, decipi, obstupescere, et quasi ebrium fieri, ut nullam amplius veritatem, nullam honestatem, nullam deniq; rem se dignam inuestiget. Animus est igitur, qui viget, qui sentit, qui intelligit, qui quò magis à corpore sese abstrahit, eò prudentior atq; sapientior evadere solet. Sed non est quod in hac quæstione diutius commoremur: nam etiam ipse nobis faciliè concedet Cicero, nequaquam in corpore, sed in animo beatam esse vitam. Videndum est igitur, quoniam in animo felicitas est, Vtrum donec huic corpori copulatus est animus, beatus sit: an potius, postquam à corpore discesserit. Atq; huius quidem quæstionis facillima erit solutio, si relicta Aristotelis perversa opinione, Socratem, Platonem, Ciceronẽ ipsum, religionem ac fidem nostram, omnes deniq; sapientes viros secuti fuerimus, omnes enim ad vnum clamant, & aperta voce testantur, nullam in hac vita veram felicitatem esse posse: sed animis nostris ab immortalibus

Deo, cùm ex hac vita discesserint, omnem donari beatitudinem. Audite, quæso viri optimi, quàm sanctas, & religiosas ex Phædone sententias, dum eum Dialogum perlegerem nuper, excerpſi: nam in eò Dialogo Socrates, cùm paulò pòst sibi moriendum esse intelligeret, multa præclarè atq; diuinitus de animi immortalitate disputauit: hæc autem, quæ ad hanc sententiam pertineant, annotaui: Rectissimè, inquit, hoc mihi dictum videtur, quòd Dei nostri curam habeant, & quòd homines vna quedam Deorum possessio sint: nam hoc siquid aliud affirmando ego contenderem moriētes nos ad Deos tanquam ad optimos dominos accedere, longèq; ibi melius esse bonis, quàm malis, sensuū obscura sunt iudicia, & incerta, vt nihil in hoc corpore perfectè audiamus, nihil videamus. Tunc anima veritatem intelligit, quando maximè abstrahitur à corpore. Omnes autem seditiones, atq; pugnae, propter corpus excitantur. Siquid rectè cognoscere volumus, à corpore discedendum, & ipso tantum animo contemplandum. Nihil enim rectè intelligit homo, nisi post mortem: nam mortuorum animæ supersunt, & bonis melius est, malis peius. Cùm animus à corpore trahitur ad ea cogitanda, quæ sub sensum cadunt, decipitur, & conturbatur: cùm autem per cogitationem à corpore seiungitur, & æterna considerat, statim ab errore liberatur. Corpori enim na-

tura

tura præscribit, ut seruiat, & subditum sit imperio: sed animo, ut imperet, ac dominus sit. Si purus, atq; immaculatus, à corpore discesserit, ad sibi simile diuinum numen accedit, ubi beatus cum Dijs æuo sempiterno perfruitur. At verò impurus animus, & inquinatus per insolentiam, quæ sunt æterna videre non potest: sed terrena quadam & graui materia pressus, circa monumenta & sepulchra versatur. Quò fit, ut interdum animorum quædam phantasmata, & simulachra nobis appareant. Nam ad Deos nemo, nisi sapientiæ studiosus, & omnino purus, atq; discendi cupidus accedere potest. Itaq; cum animus sit immortalis, diligentissimè curari debet, non enim mala fugere poterit, nisi sit optimus, & prudentissimus. Qui verò sanctè, atque religiosè vixerit, statim in beatorum sedes aduolat. Hæc omnia Socratis dicta, quasi uno fasce complecti volui, quoniã eò spectant omnia, ut intelligamus, in hac vita, dum affixus corpori animus est, nullam esse beatitudinem: sed cum in æternam illam domum commigrauerimus, tunc demum nos beatos futuros. Nam si velim hoc loco in hominũ vitam declamare, & commemorare, quot misérias, & calamitates viuendo patiamur, quamq; sit incerta, fragilis, & mutabilis ea, quæ prospera videtur fortuna, non sanè me effecturum sperarem, quod Hegesiam Cyrenaicum virum eloquentissimum efficere

e s solitum

solitum tradunt, ut qui eum audirent, pleriq; statim sibi mortem consciscerent: quo nomine prohibitus à Ptolomæo dicitur, ne huiusmodi orationem haberet: sed illud certè efficerem, ut nemo vestrum se felicem, dum viuit, existimare posset. Rideat igitur quantum voluerit impius Aristoteles Solonis eam præclaram & uulgatam sententiã, quam Ouidius his verbis explicuit:

-Sed scilicet vltima semper

Expectanda dies homini est: diciq; beatus

Antè obitum nemo, supremaq; funera debet.

Ego certè verissimam esse semper existimaui. Quod si eadem est Sapientia quæ Felicitas, ut ex Socratis sententia superius probauimus: neq; animus, dum est in corpore, omnino sapiens esse potest, quemadmodum apud Ciceronem Cato maior rectissimè censet, cuius hæc sunt verba: Mihi quidem nunquam persuaderi potuit, animos dum in corporibus essent mortalibus, viuere: cum exiissent ex ijs, emori: nec verò tum animum esse insipientem, cum ex insipienti corpore euassisset: sed cum omni admixtione corporis liberatus, purus & integer esse cœpisset, tum esse sapientem: profectò dum in corpore est animus, beatus esse nullo modo potest. Beatitudinem enim eam appellamus, quæ est, secretis malis omnibus, cumulata quedam bonorum complexio: quemadmodum in quinto Tusculana-

narum

narum quæstionum Cicero definire videtur: quem librum sanè doctissimum, & elegantissimum oratio Marci, & hæc mea totum subuertit. Nihil enim agit ibi Cicero, nisi ut ostendat, Quod honestum est, id esse solum bonum, & Virtutem ad beatè viuendum seipsa contentam esse: quod etiam duobus his primis Paradoxis ostendere conatur: quæ nullo modo vera esse possunt, nisi quis probet, animum dum in hoc corpore uiuit, felicem ac beatum esse posse: cùm enim excesserit è corpore, non amplius iustus, fortis, temperatus dicetur, quoniam hæc ab humanis actionibus nomina proueniunt: Sed vel beatus, si dum esset in corpore virtuti, atq; honestati sese tradidit: vel miser, si vitia secutus est. Animus igitur à corpore liberatus, non amplius virtutem exercere potest, neq; aliquid eiusmodi agere, propter quod vel præmium vel pœnam mereatur: sed si virtutis viam, dum in corpore uiueret, amplexus est: tunc, quasi præmium laborum, post mortem beatitudinem consequitur. Non est igitur in virtute beata vita, sed in virtutis præmio: quam cùm quis semel adeptus est, nunquam amplius amittere potest. At verò dum uiuit homo, plurimis miserijs, & calamitatibus conflictatur: & quamuis vir probus, atq; omni virtute præditus aliquo tempore fuerit, potest tamen (ut ait in Protagora Socrates) immutata voluntate sese improbitati, atq; nequitie dedere: atq;

atq; ita ex beato miser iterum efficietur, quod ineptissimum esse quis non videt? Non enim chameleontem quendam (ut in primo Ethicorum ait Aristoteles) beatum virum esse volumus, sed talem, qui nunquam amplius miser esse possit: quod pluribus in locis, & praesertim in Tusculanis quaestionibus, Cicero confitetur, Nos scilicet beatos eo tempore futuros, cum e corporibus elapsi, spe, metu, latitia, cupiditate carebimus. Et Atheniensis hospes apud Platonem in Epinomide, qui locus maximè nostram hanc sententiam confirmat, non fieri posse, inquit, ut in hac vita homines felicitatem, ac beatitudinem assequantur: bonam verò spem nobis esse debere, ut post mortem ea omnino consequamur, quorum desyderio accensi, vitam optimè pro viribus exegerimus. Nostris autem legibus, idest Christianis, hoc adeo clarum, atq; exploratum habetur, ut si quis de futura vita, atq; aeterna felicitate fortè dubitet, vitamq; beatam in presenti vita constituat, illi statim sacris interdicator, & in numero impiorum, atque sceleratorum habeatur: ab eo omnes decedant, aditum eius, sermonemq; desugiant, nequid ex contagione incommodi accipiant: neq; illi petenti ius reddatur, neq; honos ullus communicetur: quòd si diutius in eadem opinione perstiterit, neque respicere voluerit, publico iudicio condemnatus, igni vivus vidensq; cremandus traditur. Hoc autem genus

nus hominum Græco vocabulo, quod à maioribus nostris accepimus Hereticos appellamus. Statuerunt enim maiores nostri, religiosissimi, atq; sanctissimi viri, ut omne studium, omnem operam, curam, diligentiam, in una quidem honestate ponamus. Sed tamen ut intelligamus, quamvis omnes virtutes quis adeptus fuerit, donec vixerit, eum beatum esse non posse: verum tunc omnes fore beatos, cum ad Deum illum nostræ salutis auctorem, relicto corpore, pervenire poterimus. Quæ nostræ persuasio sic cum Socratis atq; Platonis sententia implicata est, & coheret, ut eadem omnino esse videatur. Si igitur virtus tantum in hac vita reperiri potest, quoniam mortui nequitiam amplius eam exercent, felicitas autem in viventibus esse minimè potest, sed in ijs tantum, qui ex hac vita iam excesserunt: profectò nemo verè concludere potest, in una virtute positam esse beatam vitam. Cur igitur (inquiet aliquis) Plato multis in locis bonos viros beatos, improbos miseros appellat? sicut in Gorgia Socrates affirmat, cuius hæc verba quinto Tusculanarum Cicero transtulit: Tu igitur ne de Persarum quidem rege magno potes dicere: beatus ne sit? an ego possum, cum ignorem, quàm sit doctus, quàm vir bonus? quid? tu in eo sitam vitam beatam putas? Ita prorsus existimo, bonos beatos, improbos miseros, miser ergo Archelaus? Certè, si iniustus. Rursus in
libro

libro de *Repub.* nono, optimum & iustissimum virum, felicissimum esse concludit: pessimum verò miserimum. In *Alcibiade* primo circa finem prudentem solùm atq; bonum virum felicem esse ait: improbum miserum. In *Charmide* hoc idem repetit, Eos scilicet, qui recta, atq; honesta sequuntur, felices esse, quòd etiam primo de legibus observauimus, alijsq; in locis plurimis: hoc idem in suis de *Philosophia* libris in ore semper habet Cicero, nostraq; leges confirmant.

Quòd ita intelligendum esse censeo: quoniam ex ijs, quæ superius à nobis dicta sunt, satis apertè declaratum est, neminem in hac vita felicem esse posse, quoties virum bonum beatum dicimus, improbum miserum, ob spem, atq; expectationem, quam de se concitant, illum felicem, hunc miserum appellari, ut regis filium Principem appellare solemus, non quia sit iam, sed quia futurus est Princeps. Et præterea quoniam ad felicitatem virtus viam præmunit, vitium autem ad miseriam, qui virtutem amplectuntur, rectè beati dicuntur: qui verò vitium, miseri. Ut si quis ad conuiuium aliquod præclarum, atq; regium inuitatus, ad quod non nisi per viam vnā accedere posset, certè cū primū viam illam ingressus fuerit, etiam si nondum sedeat in conuiuiō, iure tamen optimo regius conuiua dicetur, si verò per aliam viam progressus, ad regiam domum nunquam sit peruenturus, in eo sanè quòd

quòd iam aberravit, conuiuio illo priuatus rectè dici potest. Eodem modo Beati dicuntur in euangelio, qui multas perferunt iniurias, quibus pleriq; homines maledicunt, qui propter iustitiam in varias calamitates incidunt: non quia beati iam sint. nam quæ potest in calamitatibus atq; miserijs esse beatitudo? sed quia propter eas, quas honestatis gratia tolerant iniurias, æternam sint felicitatem consecuturi. Neq; tamen quisquam à me existimet virtutem suis ornamentis, atq; sua laude spoliari, quamuis in ea non esse positam beatam vitam ostendere contendam: satis est enim hæc magna virtutis laus, atq; excellentia, quòd nulla via, nullus aditus ad felicitatem, nisi per eam inueniri possit. Sed tamè quemadmodum recta via plurimum ab eo loco, quo progredimur, differre solet: ita etiam virtus, quæ ad beatitudinem una via est, ut plurimum ab ipsa beatitudine differat necesse est: & sicuti ea, quorū gratia solemus aliquid agere, non in ipsis actionibus sita sunt, sed finis ab eo necessariò differt, quod ad finem dirigitur: ita etiam felicitas, cuius gratia virtutem amplecti solemus, nequaquam in ipsa virtute sita esse potest. Ex quibus omnibus illa summa conficitur, hanc Ciceronis conclusionem quòd virtus seipsa contenta sit ad beatè viuendum, neq; Socraticam esse, neq; veram. His dictis paulum Franciscus conquieuit. Tum Antonius, Equidem, inquit,

Franc

Francisce frater, si proximè cū Marco fuisses, hæc inter vos diutius commentatos fuisse crederem, adeo ista tua oratio cum Marci oratione & tantopere conuenit, ut ne ouum quidem (quod aiunt) ouo tam simile videatur. Sed cū per hosce proximos menses nobiscum fueris, & operam Dialecticæ dederis, miror unde tibi ista tam multa, & tam præclara hauseris.

Quasi verò (inquit Franciscus) nescias domi nos Magistros habere præclarissimos, & me non omnino pigrum, neq; inertem. Teneo, inquit Antonius: ab eodem fonte tu hæc hausisti, unde & Maioragius, & ego iampridem plenos haustus excepimus: nam cōmunem omnes Primum hunc fratrem magistrum habuimus: sed ego sanè nihil, neq; (ut opinor) Maioragius, quod ad Platoniam disciplinam attineat, à Primo didicimus: refugit enim, nescio quò pacto, Primus ab istis Philosophorum decretis, atq; in vna Christiana religione conquiescit. Sed quomodocunque tu Francisce didiceris, mihi certè plurimū arrident, et quoties per occupationes licet, in suauissimis illis Platonis Dialogis memet nō mediocriter oblectare soleo: quò tua mihi iucundior oratio fuit, ut hæc nostra collocutio, in qua quasi per iocum in Ciceronem declamare cepimus, non paruam nobis utilitatem allatura videatur, & omnino hæc nugæ (quemadmodum ait Horatius) seria ducent: Ridētem enim dicere verum,
quis

quis vetat? Quàm vera sint hæc (inquam ego) paucis diebus intelligetis. Nam si mihi vita supersit, faciam (ut ait Terentius) ut huius loci, dieiq; semper meminertis: doceboq; vos pueriliter verba consectari, cum rem ipsam potius, & Ciceronis sententiam spectare debeatis. Hic magnus omnium risus est consecutus, & Primus Certè, inquit, captus est Maioragius, habet: sed quid ad hæc respondeat, prorsus non habet: nam in hoc uno maxime Marcum & Franciscum admiratus sum, quod licet eorum oratio, ut potè adolescētium paulò uberior, et quodammodo exultantior mihi visa sit, tamen nulla captione, nulla fallaci conclusione, nullo dolo penitus usi sunt: neq; (ut eos unique reprehendit Maioragius) ulla verba consectati sunt, sed via quadam quasi naturali per totam disputationem suam processerunt, quæ differendi ratio mirifice mihi semper placuit. Tunc Franciscus, Iure nobis, inquit, Marce, letandum esse video, quod nos in hac nostra tam audaci disputatione, tantus vir collaudarit. Itaque longè audacius pergam id etiam exequi, quod mihi reliquum est: sunt enim ipsius Ciceronis argumenta discutienda, quibus se probare putat, in una virtute positam esse beatam vitam. Primum igitur Ciceronis argumentum tale est: Regulus, cum à Pœnis cruciaretur, nec ærumnosus, nec infelix, nec miser unquam fuit: ergo in sola virtute posita est beata

f vita

vita. Hoc profectò Enthymema dupliciter falsum esse videtur: tum quia neq; probabilis, neq; vera assumptio est: tum quia necessario non concludit: nam Aristoteles certè & ærumnosum, & infelicem in eo cruciatu Regulum existimaret: cuius in primo Ethicorum libro verba hæc notauimus: Neq; enim planè ad beatitudinem aptus est is, qui omnino deformis sit, aut ignobilis, aut qui vitam in solitudine degat, aut sit sine liberis, ac multo etiam minus forsan, sicui sint liberi improbi, vel amici boni è vita excesserint. Ergo (vt diximus) has prosperitates vita beata requirit. Et non ita multò pòst: Opus est enim, inquit, vndique (vt dixi) perfectæ, completæq; vita: multæ enim in vita mutationes, varijq; euentus versantur: fieriq; potest, vt qui secunda fortuna sit vsus, is in maximas incidat calamitates in senectute, quod de Priamo ferunt fabulæ. Qui autem casus eiusmodi senserit, misereq; è vita migrarit, eum nemo duxerit in beatis. Hæc Aristotelis verba sunt, quibus intelligi facile potest, miserum esse eum, qui in maximas calamitates inciderit. Sed Aristotelem in hac parte relinquamus, cuius à sapientissimis viris de summa felicitate reprobata sententia est: eam enim Aristoteles in præsentī vita constituit: cùm tamen manifestum sit, Neminem omnino, dum viuit, beatum esse posse. Quare concedamus, Regulū dum à Poenis cruciaretur, siquidem

vir

Vir bonus erat, neq; infelicem, neq; miserum fuisse: quoniam & in Menone, & in nono de Repub. & in secundo de Legibus, & in Gorgia, & multis alijs in locis à Platone miseros eos appellari video, non qui calamitatibus oppressi sunt, sed qui sese vitijs atque improbitati dediderunt. Veruntamen non statim sequitur, ut qui neq; miser, neq; infelix est, ille felix atque beatus sit. Est enim inter felicitatem & miseriam medium quiddam, in quo qui cōstitutus est, neq; miser, neque beatus dici potest. Non erat igitur miser Regulus, quippe qui virtutum præsidio munitus, magnitudine animi cruciatus illos superaret. Sed neq; beatus erat: nam quæ in tormentis, & cruciatibus esse beatitudo potest? Siquidem Beatitudo est, ut antea diximus, secretis malis omnibus cumulata bonorum complexio. Cruciatibus autem, & calamitates, & tormenta, vel Platone teste, mala sunt. Nemo igitur in tormentis, quoniam in malis est, beatus esse potest. Video enim in Gorgia Socratem affirmare, eum qui facit iniuriam infelicem esse: qui verò patitur minus quidē eo qui facit infelicem, sed infelicem tamen. Sed quoniam, ut dialectici nostri docent, quæ media sunt, utriusq; extremi naturam participant: verissima potest illa esse distinctio, quòd vir bonus, cū in tormentis est, quadam ex parter miser, et quadam etiam ex parte beatus sit: quatenus enim tormentis crucia-

enim is, in quo virtus sit, neq; ex fortuna pendeat, neq; mortis aut exiliij minis terreatur, neq; inimicorum La befactetur iniuria : nunquam tamen his rationibus efficiet, vt in sola virtute sit beata vita. Quòd autem tam acriter in improbos inuehitur, quòd eos miserie & ærumnæ premât omnes, quòd à libidinibus noctes & dies crucientur, quòd eos conscientie stimulent maleficiorum, quòd eos iudiciorum metus exanimet, quòd quocunq; aspexerint vt furie, sic illis suæ sibi occurrant iniuriæ : id quidem assequitur, vt eorum nemini bene esse posse existimem. Sed tamen hac ratione non cõcludit, quòd se demonstraturum proposuit. Itaq; totam illam extremam partem Ciceroni facile, & libenter sanè condonarim, Bonum virum, & fortem, & sapientem, posse miserum esse neminem : & eius virtutem, & mores esse laudandos ; & quicquid est laudabile, idem & beatum, & florens, & expetendum videri debere. Sed his argumentis contendo, nequaquam ab eo conclusum esse, virtutem seipsa contentam esse ad beatè viuendum : quoniam quod se ipso contentum est, nihil ultra amplius quærit : Sed virtus sapientiam, et Dei cognitionem quærit, vt antea probauimus : Non igitur virtus se ipsa contenta est. Præterea Socrates ait in Gorgia, Neminem esse, qui id solum velit, quòd alterius gratia sequitur, sed vnũ illud omnes expetere, cuius causa reliqua etiam quærun.

Verum omnes viri prudentes, ut felices aliquando fiant, virtutem sequuntur: Non igitur ipsam per se virtutem assequi volunt, sed per virtutem beatitudinem expetunt, atque illius tantum gratia recte, atque honeste viuunt. Quos fit, ut eodem semper reuoluamur, concludamusque contra Ciceronem, se ipsa virtutem ad beatè viuendum nequaquam esse contentam.

Habetis meam de secundo Paradoxo sententiam, quæ ad Marci disputationem, quasi corollarium quoddam accessit: in qua vereor, ne fortasse me nimis dialecticum egisse putetis, quoniam ei studio vehementer (ut scitis) deditus sum. Recte tu quidem (inquam ego) Franciscæ commemoras, nam Dialecticorum more probabilia tantum sectatus es, nihil autem eiusmodi protulisti, quod mihi non facile refelli posse videatur. Sed si placet iam ab ista disputatione discedamus, nam audiendi satietate defessus sum. Tum ridens Primus, Nulla est, inquit, tam iucunda, nulla tam vera oratio, quæ non cuius molesta atque falsa videatur, si eam inuitus audiat. Nihil enim mihi horum adolescentium oratione, iam pridem iucundius accidit, neque verius visum est: tu autem Maioragi defessus es audiendi satietate: tibi nihil, quod verum sit, dictum videtur: tu rogas, ut ab hac disputatione discedamus, cur? nisi, quia molestè fers, accusari Ciceronem, & nihil habes quo possis eum defendere: cum te (si Dijs placet)
eius

eius patronum ubique fore prædices. Verùm age, quoniam hodie satis videmur esse Philosophati, simul etiam ne Maioragium hodie postremum videamus, quæ reliqua sunt in crastinum diem reponamus, & simul exurgens in ambulare capit in porticu, me autem solita sua comitate Marcus adiit: quippe qui vehementer timebat, ne fortasse gravius ego ferrem, quòd non tantum accusaretur Cicero, sed etiam me Primus quodammodo deridere videretur. Et ne eo nomine minus hilarè me haberem, qui cùm benignè salutasset, omnia tibi, inquit, Maioragi hoc tempore societatis amore perferenda sunt, aliàs cùm volueris, tua illa dicendi spicula in unumquemque nostrum distringito: nunc, quæso, te comem atq; hilarem præbe.

Ita faciam, inquam ego: neque enim aliter facere possum, cùm mihi tecum & cum his consobrinis meis esse licet. Eamus igitur, & quod huius diei reliquum est, in hac suburbani ruris amœnitate consumamus: cras verò Primum, & Antonium, sequentia duo capita impugnantes audiemus. Quandoquidem ita vobis placet ita fiat: quin ut hæc, siue Tragœdia, siue Comœdia dici debet, omnes actus suos habeat, cuperem duos alios ingenuarum artium amatores viros, siue adolescentes, adesse: qui duorum extremorum, quæ Primo et Antonio supererunt, Paradoxorū euerrendi provinciam susciperent. Quod certè si auditum

in vrbe fuerit, nos hac hodie, hoc in loco pertractasse, crastino mane aliqui ex auditoribus meis huc aduolabunt: sunt enim (vt te non praterit) hoc tempore plurimi Mediolanenses valde ingeniosi iuuenes, qui literarum amore, atque cupiditate mirifice flagrant, & qui iam plurimum in vtraq; lingua, atque in disserendi facultate profecerunt. Scio, inquit Marcus: atque vt verum fatear, seruo meo mandavi, qui statim à prandio profectus in urbem est, & Octavianum Arcimboldum, & Constantinum Abduensem auditores tuos omnino cras ad nos adducat: nullos enim huic disputationi duobus his aptiores fore arbitror: quamuis enim Octavianus iuri civili sit initiat, tamen ex te Dialecticam didicit, & aliquam Philosophiæ partem attigit. Constantinus autem cum ingenio polleat, & iam tres amplius annos te audiat, non fieri potest, quin multum profecerit. Bene (inquam) narras Marce, nam vtrunque plurimum ego diligo, itaq; eorum aduentus mihi gratissimus est futurus: neque me latet & acuminè ingenij, & dicendi facultate, & scientia vtrunque præstare: vt non dubitandum sit, quin huic ambo disputationi plenè satisfacere possint. His dictis, cum iam Sol ad occasum inclinaret, domo egressi, spaciandi gratia per viam regiam urbem versus, vespertinam captantes auram, ad fossam vsq; peruenimus, quæ urbis moenia circund

circundat, deinde iterum idem iter otiosè emensi, cum iam hora noctis prima, æris campani pulsu significata nobis esset, cubitum omnes discessimus.

M. ANTONII MA-
IORAGII ANTIPA-
RADOXON LIBER
TERTIVS.

*



POSTERO igitur die, quàm illa erant acta, cum etiam tum ego in cubiculo essem, & apud me Marcus sederet, peteretq; nonnulla ut explanarem, quæ in Topicis Ciceronis sibi obscura videbantur, Primus autem cum Antonio & Francisco inambuleret in porticu: ecce nuncius quidam à Sfrondato, viro illo clarissimo, atq; eminentissimo, quò plurimùm in serijs negotijs suis eo tempore Carolus quintus Imperator utebatur: nunc autem ob singulares, atque eximias virtutes suas, à Paulo tertio Pontifice Romano in Cardinalium collegio summo cum omnium favore adscriptus est. Is igitur cum ibi Primum nobiscum esse audiui, statim ad eum misit, ut ad se veniret, habere enim se quædam haud levia dicebat, quæ cum eo communicaret. Atque is certè nuntius animos omnium

f s nostr

nostrum, atq; in primis Marci perculit, quippe qui speraremus eo die Primum, se dignam orationem, hoc est doctissimam, et sanctissimam habiturum: est enim vir ita eruditus, ut nulla sit homine libero digna disciplina, quam ille non plenè perceperit: ita religiosus, & veræ honestatis amator, ut ab omni tamen superstitione sit alienus: ita deniq; oratione suavis, ut ab eius ore, quod de Nestore Homerus prodidit, melle dulcior fluat oratio. Itaq; pleriq; omnes, qui Mediolani sunt viri principes, senatores, nobiles, quicunq; aliquid audire, atq; discere student, eius consuetudine mirificè delectantur. Atque ea de causa tum ad se Sfrondatus eum accersebat, ut quoniam à publicis negotijs vacuus erat, eius colloquio frueretur. Quod ubi ego audiui, commotus surrexi, & Magna, inquam, de spe deiecti sumus Prime, quòd tibi discedendum intelligo: cupiebam enim mehercule, quod tu fortasse nequaquam existimas, te contra Ciceronem, siue potius contra Stoicos, de peccatorum aequalitate differentem audire. Non enim dubito, quin ex sacris literis, qua in facultatè neminem hoc tempore tibi parem inueniri arbitror, esses multa deprompturus, quæ & audientibus nobis iucunda, & discantibus utilissima essent futura. Tum ille, Nihil, inquit, detrimenti facitis Maioragi, neque enim ego quicquam eram novi dicturus: quippe qui nō temerè sacra mysteria putem esse

esse diuulganda, cùm de alijs rebus, & praesertim iocantes agimus, sed eo tantùm tempore cùm id vnum agimus: & Antonium hunc fratrem meum mihi substituam, qui longè feliciter illas Ciceronis lecythos, & pigmenta illa orationis, quàm ego sectari solet.

Tum Marcus iuuenili quodam desyderio stimulatus, quoniam in spem audiendi Primi erectus totam ferè noctem illam insomnem egerat, flens perquam familiariter: neq; enim lachrymas oculis obortas continere potuit, tanquam attonitus Primus fixis oculis identidem aspectabat, neq; quicquam effari poterat. Quod ubi Primus aduertit, adolescentis illius tristitia quadam cum miseratione delectatus, Quæso, inquit, Marce iucundissime, ne tantopere discessione meâ doleas: scis enim, necesse mihi esse, principibus viris obsequi. Sed omnino tibi polliceor, his testibus, qui praesentes sunt, omnibus, me breui in Cerrianũ tuum cum Maioragio esse venturum: ubi dies aliquot ab vrbe remoti, neq; tale quid timentes, quale nunc accidit, commorabimur. Nunc obsecro te, latus esto, teq; cum Maioragio, atq; fratribus meis, duobus hisce diebus oblecta. Deinde ad nos cõuersus, Facite, inquit, vt ne disputationem inceptam relinquatis: & cùm adolescentes illi venerint, quos Marcus accersiri iussit, illis salutem ex medice. Tu verò Marce, cùm ad te venero, quod breui fore spero, omnia mihi, quæadmodum gesta

gesta erunt, enarrabis, *His dictis, ille discessit: nos autem Marcum blandis verbis consolari cepimus: neq; enim præ merore quicquam discedenti Primo respondere potuerat. Cùm verò proximum ad templum Victori Deo consecratum, Marci adhortatione commoti, proficisceremur: ut matutino sacrificio, quam nostri Missam vocant, interessemus: venientes ad nos Octavianum Arcimboldum, & Constantinum Abduensem, quos pridie eius diei Marcus, ut advenirent, per servum rogauerat, vidimus. Adduxerant hi secum Hieronymum Cardanum, Medicum, ac Philosophum sanè egregium, atq; in disciplinis omnibus eruditissimum virum, mihiq; in primis amicissimum: qui cùm me ibi adesse audiisset, cum eis adolescentibus venire non recusavit. His igitur nos obuiam facti, ut noster usus ferebat, amicissimè consalutavimus: deinde ego Cardani dextra apprehensa, Gratissimum, inquam, nobis omnibus, atq; in primis mihi fecisti Cardane, quòd ad nos familiariter, ut amicitia nostra postulabat, adueneris. Imò verò, inquit ille, si tibi nota causa esset, quæ me huc adduxit, nullo modo mihi persuadere posses, tibi gratum esse aduentum meum. Quid, inquam ego, an aliquis fortasse ex nostris gravius egrotare cepit? Melius quæso omninare, inquit ille: nam tui omnes rectissimè valent: tibi autem omnino malè esse existimo, quoniam ab his*
adolesc

adoleſcentibus audiui, multa heri contra Ciceronem tuum, à duobus ingenioſiſſimis adoleſcentibus Marco Fanniano, & Franciſco Comite conſobrino tuo fuiſſe diſputata: magnamq; etiam diſputationis illius partem in hodiernum diem eſſe reiectam. Hæc ſanè cauſa fuit, quæ me huc venire impulit, ut audirem diſertos adoleſcentes, et diſcipulos tuos, contra Ciceronem, hoc eſt Deum tuum, diſputantes. Quantopere falleris, inquam ego, Cardane et tu, & reliqui omnes Mediolanenſes: qui quoniam ego iam tertio pro Cicerone contra eius obtreſcatores arma cepi, putetis adeo me ei addictum eſſe, quaſi in illius verba iurauerim. Ego certè virum excellentiſſimum, et penè diuinum fuiſſe Ciceronem exiſtimo: ſed tamen hominem, hoc eſt talem, qui errare, labi, decipi potuerit. Proinde ſecurus ego quæ contra eum dicuntur audio: quòd ſi fortè ab aliquo iniuſtè accuſari intelligo, eum defendo: Si verò iuſtè, taceo. Quamobrem poteris etiam tu, ſi volueris, cum bona mea venia Ciceronem hodie accuſare: quoniam ſubitum fuit Primo noſtro diſcedere, cuius erant hodie primæ partes in diſputando. Videbimus hoc, inquit ille: ſed prius Antonium audire conſtitui, nam mihi Primus, frater eius, cum in urbem redeunti factus obuiam eſſem, partes ei ſuas ſe demandaſſe, narrauit. Eamus igitur, inquit Antonius, quoniam ita placet, & in hortis Fannianis conſideamus, ut me penſum

pensum meum (quod aiunt) absoluentem audiat: vi-
deo enim etiam tribus vobis, qui nunc aduenistis, se
singulis singula Paradoxa subuertenda distribuuntur,
necessariò esse dicendum. Hæc cùm ille dixisset,
vnà omnes ad eum locum, vbi pridie mane disputare
Marcus ceperat, ire perreximus: quo postquam per-
uenimus, appositis puluinis consedimus. Tum Anto-
nius: magnum mehercule, inquit, Ciceronis ingenium
fuit, magna doctrina, magna industria: sed quæ ma-
gis in forensi vsu, atq; in iudicijs, tum in sententia di-
cenda, & concitandis, atq; sedandis audientium ani-
mis, & quo vellet impellendis, quàm in Philosophicis
rationibus, & disputandi acumine vim suam expli-
caret. Quantus enim ille orator vbiq;? quàm eloquens?
quàm grauis? quàm vehemens? quàm suavis? nam in ijs
etiam, quæ de Philosophia tractauit, maxima apparet
eloquentia. Sed profectò, quantò in dicendi facultate
ceteris omnibus, non Latinis tantum, sed etiam, meo
quidem iudicio, Grecis antecelluit: tantò in differen-
di ratione Aristotele, ceterisq; Peripateticis infe-
rior est. Quamuis enim de ea Philosophiæ parte, quæ
ad mores honestè conformandos attinet, multa præ-
clare scripserit: tamen rationes suas approbandi, atq;
alienas refellendi laudem Aristoteli Magistro relin-
quat, suas ipse causas forenses agat. Vt enim hoc tem-
pore reliqua prætermittam, quæ certè plurima sunt:
quàm

quàm ineptè si cum Aristotele conferatur, eam Dialecticæ partem tractauit, quæ Topica dicitur? ut mihi non tantum Aristotelem, quem se vnum imitatum fuisse profitetur, referre: sed etiam multa inania, pleraq; (quod peius est) falsa docere videatur. Sed de hac re libellum propediem me editurum spero, in quo viginti amplius errores notatu dignos in Topicis à Cicerone commissos luce clarius ostendam. Nuper etiam quartum de Finibus librum eius perlegi, quo in libro se Catonem Stoicum Philosophum, & cum eo Stoicos omnes refutauisse credit: sed, Dii boni, quos mihi risus ineptijs illis suis excitauit: nullum enim ex tot eius argumentis inueni, non solum quod acutè conclusum videretur, sed ne quidem quod vrgeret aduersarium. Quòd si fortè sub alterius persona librum eum edidisset, ut tertium sub Catonis persona, in quo Stoicorum dogmata recenseret: fortasse posset aliquis suspicari, deducta opera factum esse, ut tam ineptè disputaret. Sed cum ibi ipse se loqui, & disputare palàm profiteatur, nulla est penitus ei fuga, neq; excusatio. Quòd si quis vestrum mihi non credat, librum eum perlegat: & siquid præter aduersariorum delusiones quasdam inuenierit, quasi res in foro agatur, non cum acutissimis Philosophis: aut si vnum acutè conclusum argumentum viderit, tunc me quauis pœna dignum existimet. In hoc autem tertio, quod mihi discutiendum est, Paradoxo,

radoxo, quamvis aliqua videantur acutè dicta: tamen efficiã profectò hodie, ut intelligatis, aliud esse Orare, aliud Disputare. Mihi igitur certa quadam de causa mutandus est ordo ille, quem vos heri Marce atque Francisce in disputatione vestra secuti estis. Nam primò Ciceronis argumenta refutare statui: deinde probare, Paradoxon hoc neq; Socraticum esse, neque verum. Quòd si hæc prima pars vobis paulò spinosior visa fuerit, mihi ignoscatis velim, non enim aliter Ciceronis argumenta possum evertere. Verùm illud vobis polliceor, in alijs partibus me talia disturum, quæ vobis omnino & erudita, & iucunda videantur.

Quid igitur ait Cicero? Peccata sunt equalia. Quãobrem quæso? non enim causam video. Quia peccata (inquit) non rerum euentu, sed vitijs hominum metienda sunt. O' probationem mirificam & artificiosam, sed quam tamen dilucidius explanari mihi velim. Peccata vitijs hominum sunt metienda: quomodo hoc ais Cicero? aut quæ tandem est ista mensura, quæ peccata dimetiatur? Vitia (inquit) hominum.

Audio: sed dic mihi, Vtrum vitia hominum peccata sint, an non? Sunt: quis enim negare potest, quin vitia hominum sint peccata? Sed (ut ais) vitijs hominum peccata sunt metienda? Sic est. Ergo peccatis peccata sunt metienda, quoniam etiam hominum vitia peccata sunt: quo quid ineptius, aut absurdius dici

dici potest? quid enim est, quod per sui ipsius dimensionem, quantum sit, intelligi possit? aut quenam ista est tandem communis mensura, quæ peccata hominum dimetiri possit? Equidem video, cum aliquid metiri homines volunt, mensuram aliquam habere diuersam ab ijs rebus, quas metiuntur: nõ enim triticum tritico metiuntur, sed medio, aut medimno: neq; vinum vino, sed metreta; neq; agrum agro, sed decempeda: atq; hoc in reliquis rebus omnibus videmus, vt mercatores ementes, ac vendentes, suas singulis rebus mensuras à rebus ipsis diuersas habeant, vnde res singulas, quantæ sint, facile intelligant. Quare nullo modo fieri potest, vt hominum vitijs peccata metiantur: verum ipsa Ratio est, quæ peccatorum magnitudinem, atq; paruitatem diiudicat: habet enim preparatam mediocritatem, quæ & virtutum, & vitiorum communis mensura est. Itaq; quoties videt ab actionibus hominum ipsam mediocritatem negligi, ita vt ab eis vel exuperetur, vel non adæquetur, statim in eis peccatum esse intelligit: quoque magis mediocritas ab vtrauis parte distat, tantò maius peccatum illud esse iudicat. Primum igitur hoc Ciceronis effatum non tantum falsum est, sed etiam absurdum atq; ineptum. Quod autem statim sequitur, totum contra ipsum est. In quo peccatur (inquit) id potest aliud alio maius esse. Quid ais Cicero? Peccata sunt equalia, & id,

g in quo

in quo peccatur, aliud alio maius esse potest? Hoc certe monstri mihi simile videtur, ut si in partem hominis peccet, & digitum vulneres, id quidem peccatum est: sed quoniam id, in quo peccatur, paruum est, non video, quare magnum debeat esse peccatum. Quod si manum abscindas, id in quo peccasti, maius est: tu verò peccatum non vis augeri. Quis non hoc insani esse hominis iudicet? Quid enim, si penitus hominem interficias? erit ne maius peccatum, quam si digitum tantum vulneres? Nequaquam, inquit: quoniam peccata sunt equalia. Hocce te ratio docet, Cicero? Imò verò necessitas cogit, ut peccati quantitas, eius rei quantitati, in qua peccatur, proportionem respondeat. Quantitatem autem eam intelligimus, quæ in virtute, atq; in potestate rei constituitur, & magnitudinem atq; parvitatem, non corporis, aut molis, sed potestatis hoc loco querimus: ut Deum immortalem Maximum appellare consuevimus, non quia molem corporis aliquam, sed quia potestatem summam habeat: ita res potestate atq; virtute æquales dicuntur, cum unius vis ac potestas alterius potestatem non exuperat, neq; exuperatur. Cum igitur æqualitatem peccatis attribuat Cicero, quæ (ut Philosophi docent) quantitatis est propria: de ea quantitate, atq; æqualitate intelligendum est, quæ ad potestatem, non quæ ad corporis molem refertur. Necesse est igitur, cum pec-

cata

cāta sint equalia, ut res aliqua, in qua peccari possit, peccato ipsi equalis inueniatur: alioquin aut peccata res omnes, in quibus peccatur, exuperabunt: aut à rebus ipsis exuperabuntur: aut partim exuperabunt, partim exuperabuntur. Quòd si peccata res omnes exuperant, in quibus peccatur: ridiculum quiddā eueniet, ut cū in aliqua re peccatur, sit aliqua peccati illius pars, quæ in re non sit, quoniam rem peccatum excedit. Vbi igitur extans illa peccati pars locum habebit, si in re non habet? num in aëre? Quòd si res ipsæ peccata excedunt, cū in aliquam rem peccatur, non in totam illam peccabitur, sed erit aliqua pars eius rei, quam peccatum non attingat: ut, si quis hominem interficiat, erit aliqua corporis illius hominis pars non interfecta, quoniam peccatum totum corpus illud non occupat. Idem accidet, si res ipsæ partim peccata exuperabunt, partim ab eis exuperabuntur. Quæ si ridicula sunt & inepta, dicendum est, res aliquas peccatis ipsis esse æquales: quin potius res omnes, in quibus peccatur, peccatis æquales esse necesse est. Quòd si peccata sint equalia, res etiam æquales esse oportet: quod cū aperte falsum sit, non erunt equalia peccata. Aut si plurima res peccatis ipsis & maiores, & minores reperiuntur, quoniam non omnes res eandem habent potestatem: fiet, ut quoties in minori aliqua re peccamus, rem eam peccatum excedat. Dicat igitur

mihî Cicero, ubi pars ea peccati, quæ rem excedit, existere poterit? non enim sine aliqua re subiecta peccatum existere potest. Neesse est igitur, ut ad eius rei quantitatem atq; potestatem, in qua peccatur, peccatum contrahatur, atque ipsi rei adæquetur, atque ita paruum necessario fiet. Rursus si quis in re aliqua maiori peccet, res ipsa quoniam peccato maior est, ipsum peccatum tantò magis excedet, quantò maior eo fuerit; non ergo in tota illa re peccatum erit. Quæro igitur à Cicerone, utrum in totam rem illam peccari possit, nec ne? Si non, erit igitur pars eius rei debilis atq; infirma, in quam peccari possit: pars autem sancta, atq; firmissima, in quam peccari minimè possit: quo quid ineptius dici potest? Quòd si in totam rem peccari potest, quantò maior res illa potestate fuerit, atq; virtute, ut tantò etiam maius peccatum sit, quod in illam committitur, neesse est. Nullo igitur modo verum esse potest, quod ait Cicero, quòd cùm id, in quo peccatur, possit aliud alio maius esse, ipsa sint inter se peccata equalia. Sed urget Cicero tali axiomate, Ipsum quidẽ illud Peccare, quoquò te verteris, Vnum est. Equidem hoc non video qua ratione verum esse possit, quod tanquam notissimum, & ab omnibus concessum, sine ulla probatione necessaria Cicero sumit; Ipsum quidem peccare est vnum. Quomodo quæso vñ? nos enim ab Aristotele didicimus, Vnum multis modis

modis dici: nam primò dicitur *Vnum* numero: quod licet diuersa nomina habeat, tamen idem per ea nomina semper significatur: vt, Cicero, Tullius, Pater patriæ, Latine eloquentiæ princeps, Catilinæ coniurationis vindex: his enim tot nominibus vnus homo significatur. Secundò dicitur aliquid *Vnum* esse specie: vt, Cicero & Hortensius, & Pompeius, quatenus ad speciem attinet, vnum atq; idem sunt: tam enim Cicero, quàm Hortensius homo est. Itaq; hac ratione omnes homines (vt ait Phorphyrius) vnus est homo: quod idem est, ac si diceret, sub vna specie continentur. Tertiò dicitur *Vnum* atq; idem genere, vt homo, Cereus, Equus, Leo, licet diuersas species atq; formas habeant, tamen sub vno genere continentur: tam enim homo dicitur animal, quàm Cereus, quàm Equus, quàm Leo. Dicat igitur mihi Cicero, cum ipsum peccare velit vnum esse, quomodo vnum sit, an vnum numero, an specie, an genere? Si vnum numero dixerit esse, certè fiet vt idem sit fur, & sicarius, & proditor patriæ, & libidinosus, & superbus, & tyrannus, & auarus: atq; ita Cædes (exempli gratia) si peccatum sit, poterit etiam dici Auaritia, & Superbia, & Inuidia, & Ebrietas, & reliqua id genus: quæ maximè ridicula esse, quis non intelligit? Si verò specie velit vnum esse, ponamus aliquam peccati speciem, vt Auaritiam, quæ sub se numero diuersas

continet auaritias, vt auaritiam Craſſi, Caroli, Pauli. Peccata igitur omnia, te iudice, Cicero, ad hanc ſpeciem deducētur: atq; ita fiet, vt vno auaritiæ nomine peccata omnia comprehendantur, ſicuti vno hominis nomine, quicunq; ſunt rationis participes: quod quoniam absurdum eſt, & ineptum, reſtat vt peccatorum diuerſas eſſe ſpecies neceſſariò concludendum ſit, quæ ſub vno genere vitioſitatis contineantur. Non igitur aliter hoc Ciceronis dictum verum eſſe poteſt, Quòd ipſum peccare vnum ſit, niſi vnum eſſe genere intelligamus. Quod cùm ita ſit, nulla nos omnino neceſſitas cogit, vt æqualia eſſe peccata credamus: neq; enim neceſſe eſt, vt alicuius generis ſpecies inter ſe ſint æquales: vt homo, quamuis ſub vno genere cum equo ſit, non tamen neceſſariò ſequitur, vt etiam illi æqualis ſit: & arbores, herbæ, frutices, licet ſub vno genere, quæ planta eſt, comprehendantur, non tamen ideo viburno cupreſſus æqualis erit. Quid igitur valeat ea Ciceronis propoſitio, Quod ipſum peccare vnum ſit, iam proſectò videtis. Sed auri nauem (inquit) euertat gubernator, an paleæ: in re aliquantum, in gubernatoris inſcitia nihil intereſt. Itã ne Cicero, cum rem tantam probandam ſuſceperis, noſtrorum oculorum aciem ſimilitudinibus falſis perſtringere conaris? Sed videamus, quam vim habeat iſta tua ſimilitudo. In gubernatoris inſcitia nihil intereſt, auri nauẽ euertat,

euertat, an palea. Hoc certè idem mihi videtur, ac si
 diceres, Insciens, atq; imperitus gubernator, siue auri
 nauem, siue palea subuertat, semper est insciens, atq;
 imperitus. Hoc verè dicitur, quid tum postea? Ergo
 tantum peccat, cùm palea nauem euertit, quàm si au-
 ri nauē euerterit. Quis hoc tibi concesserit? aut qua id
 ratione probas? Vt enim tam in hac re, quàm in illa
 sit imperitus: non ideo tamen sequitur, vt tantum in
 hac peccet, quantum in illa: nihil enim prohibet, quin
 imperitus magis in vna re peccare possit, quàm in alia:
 vt ne à tua similitudine discedam, Si Medicus aliquis
 imperitus sit, & eodem tempore seruo alicui, et opti-
 mo principi medeatur, atq; ita accidat, vt per insci-
 tiam suam vtrūq; interficiat: in hoc certè idem dice-
 re possumus, quod ipse de gubernatore dicit: nempe in
 Medici inscitia nihil interesse. Sed quis erit omnium
 tam rerum ignarus, tam demens, tam ab omni ra-
 tione alienus, qui tantumdem ab eo medio peccatum
 esse in seruo nequam interficiendo putet, quantum in
 optimo principe? Sensus communis abhorret ab hac
 sententia, refugit ratio, mens auersatur: nam quia le-
 uis est serui nequam iactura, quamuis cognitus error
 Medici fuerit, non tamen ideo punitur. At verò cùm
 optimum principem per apertam inscitiam interficit,
 quis non ei maledicit? quis nō execratur? quis non omni
 supplicio dignum existimat? Sed fac gubernatorem

illum tuum, aut Medicum hunc, consultò & dedita opera peccare, ut ille sua sponte auri nauem euertat, hic optimum principem interficiat: erit ne æquale hoc peccatum, ac si ille per inscitiam paleæ nauem euertērit, hic autem seruum interemerit? Quid ad hoc respondebis Cicero? Medicus est aliquis excellentissimus, qui tamē equis mederi nō didicit, sed hominibus tantum: is cū equo mederi vellet, per inscitiam illum interemit, qua in re sine dubio peccauit: deinde idem Medicus, cū optimus princeps ægrotaret, & eum facile curare posset, tamen eum dedita opera veneno sustulit: in utrō horum factō maius est peccatum? Prò Deum atq; hominum fidem, hæcne res adeo obscura est, ut de illa dubitare quisquam mortalium possit? poteris ne dicere Cicero æquale hoc illi peccatum esse? quis istam tuam orationem æquis auribus admittere posset? Sed addit, Lapsa est libido in muliere ignota, dolor ad pauciores pertinet, quàm si petulans fuisset in aliqua generosa ac nobili virgine: peccauit verò nihilominus. Qua de causa Cicero? an quia semper cum aliqua muliere concumbere, præterquam cum uxore propria, peccatū est? Sic opinor. Quid tum? tantum ne peccasse dices, qui cum meretricula consuetudinem habuerit, quàm qui pudicissimam atq; honestissimam Matronam violarit? tibi certè necesse est hoc dicere. Sed quid facias sanctissimis Legibus, quæ adulteris,

atq;

atq; pudicitie expugnatoribus, poenam capitis irrogarunt? meretriciam verò consuetudinem adeò non puniunt, ut ferè ne reprehendant quidem: aut sicubi reprehendunt, id leniter faciant. Tot'ne igitur sapientissimos homines legum latores imperitiæ condemnabitis? qui, cùm peccata sint æqualia, tamen adulteris maiorem poenam, quàm meretricum sectatoribus irrogarint? Sed quæ causa fuit, ut Romani tui Vestales virgines stupri condemnatas in terra viuas defoderent? quæ quamuis se constuprari passæ fuissent, nihilo tamen magis, te autore, quàm si vulgare meretrices fuissent, omnino peccauerant? Aut igitur dementes, aut iniustissimi maiores tui fuerunt, qui peccatum æquale tantopere vindicandum in vestalibus censuerint, in meretricibus verò ne reprehendendum quidem, aut tu egregiè insanis, qui peccata omnia putes esse æqualia. At quantò rectius maiores nostri religiosissimi ac sanctissimi viri statuerunt, qui gradus quinque peccatorum in mulieres, alterum altero maiorem & grauiorem annotandos esse censuerunt. Rem enim habere cum Meretrice, peccatum quidem est: sed horum omnium, de quibus loquimur minimum: cætera omnia grauiora, atq; hoc ordine disposita, ut cum vidua rem habere grauius peccatum sit, quàm cum meretrice: cum virgine grauius, quàm cum vidua: cum muliere viro copulata grauius, quàm cum

virgine: quoniam hoc adulterium dicitur, quod legibus grauissimè vindicatur: deniq; cum ea, quæ sacris initiata sit, quas vulgò Monachas appellamus, omnium grauissimum. Hic ordo, atq; hæc peccatorum distinctio: rationi maximè consentanea est. Illud verò tuum quis ferat, ut tantum peccetur in meretrice, quantum in Vestali virgine? Verum peccare est (inquit) tanquam transire lineas, quod cum feceris, culpa commissæ est, quàm longè progrediare, cum semel transieris, ad augendam transeundi culpam nihil pertinet.

Equidem vix risum continere possum, cum ista lego: nam quàm bella est, & quàm appositæ hæc similitudo? Verum videamus quàm vim habeat, Peccare est tanquam transire lineas. Sit ita sanè: Sed dic mihi, quæ sunt istæ tandem lineæ, quæ in peccado transeuntur? nempe si verum respondere volueris, atq; ex Socratis sententia, dices eam esse Mediocritatem: omnes enim virtutes in mediocritate constitutæ sunt. Itaque cum aliquis mediocritatem transiit, ut à virtute discedat necesse est, & in vitium, atq; in peccatum statim incidat. Transire igitur lineas, est à mediocritate discedere: quod cum quis fecerit, culpa commissæ est. Concedo. Sed quis illud concesserit, Quàm longè progrediare, cum semel transieris, ad augendam transeundi culpam nihil pertinet? Imò cum semel mediocritatē transieris, quantò longius ab ea discedis, tantò

in maio

in maiorem errorem ut incidas oportet. Quoniam nihil aliud est, A mediocritate discedere, quàm ab ipsa virtute discedere, à qua quantò quis longius abscedit, quis non videt, in tantò maius crimè incidere? Rectissime enim dixit Aristoteles, Paruum errorem in principio solere in fine maximum fieri. Sed peto à te Cicero, quoniam peccare est tanquam transire lineas, utrum cum quis transiuerit, Longius progredi, peccatum sit, nec ne? Si nò: ergo cum quis semel transiuit lineas illas, quamuis semper in eodem peccato perseueret, nihil tamè amplius peccabit: ut si quis fortè nummum furto subripuerit, quoniã lineas transiuit, quamuis progrediatur in furando, & primò viginti sester tia, deinde centum, atq; ita deinceps, postremò etiam fana diripiat, hæc non amplius erunt peccata: quòd si hoc ut est, ita etiam falsum & absurdum videtur, necessitas cogit, ut concedas, eum qui lineas transiuit, si longius progrediatur, etiam peccare. Quo concessò, illud necessario sequitur, ut quantò longius progressus fuerit, tantò etiam magis peccet. Falsum est igitur illud, quòd Longius progredi, nihil ad augendam transiundi culpam pertineat. Quid deinde? Peccare, inquit, certè licet nemini. Sit ita, verè enim dicis. Quod autem non licet, id hoc vno tenetur, si arguitur non licere. Etiam hoc tolerari potest. Id nec maius, nec minus unquam fieri potest. Vnde hoc? non enim video,

quare

quare tibi cōcedi debeat. Quod enim non licet, ut ali-
quid sit, & aliquo nomine vocetur, necesse est. Pone
igitur nobis ante oculos exemplum aliquod eius quod
non licet, ut videamus, utrum maius & minus esse
possit, nec ne. Furari non licet: quis autem adeo insa-
nus est, ut non intelligat, maius esse furtum centum
millia sestertiorū rapere, quā vnum tantū sester-
tium? Cadem facere non licet: tamen longē maius pec-
catum est, optimum virum interficere, quā nequis-
simum seruum: etiam si utrunq; iniuria facias. Cur
autem quod non licet neq; maius, neq; minus fieri po-
test? Quoniam (inquit) in eo peccatum est, si non li-
cuit. Hæc profectō ratio nullum omnino pondus ad
probationem habet: quamuis enim tibi concedam Ci-
cero, peccatum in eo esse quod non licuit: quid tibi hoc
proderit ad id efficiendum, quod contendis? nam quid
absurdius erit hoc Enthymemate tuo, si conformetur
ad hunc modum: Peccatum in eo est, quod non licet:
ergo quod nō licet, neq; maius, neq; minus fieri potest.
ita'ne à Diodoto tuo argumētari didicisti? Crede mihi
Cicero, verissimum illud est, quod vulgari prouerbio
præcipitur, Quam quisque norit artem, in ea se exer-
ceat: & Ne sutor ultra crepidam. Valeas plurimum
in causis, regnes in iudiis, summam in dicendo lau-
dem assequaris: differendi verò rationem, atq; acu-
men, alijs concedas. Quā enim ineptum hoc argu-
mentum?

mentum? quàm ab omni ratione alienum? nam peccato tantum nomen mutas: idem est enim peccare, & quod non licet facere. Itaq; cum dicis, Quod non licet nec maius nec minus esse potest: idem est ac si diceres, Peccata sunt æqualia, quod tibi non sumendum, sed probandum est. Id enim quod non licet in omni vitiorum genere rectè dicitur: ut, furari non licet, eadem facere non licet, patriam prodere non licet, atq; ita de reliquis. Neq; tamen hac ratione probatur, Furari, et Patriam prodere, æquale peccatum esse. Hoc autem captiosæ conclusionis genus, quo vitur hoc loco Cicero, vitiosissimum est, & à Dialecticis nostris Petitio principij nuncupatur, quoties idem ad eiusdem probationem sumimus: nam (ut dixi) Peccatum, & Quod non licet, idem est. Quare cum ait Cicero, Quod non licet, neq; maius, neq; minus esse potest; idem est, ac si diceret, Peccatum aliud alio maius esse non potest: quod unum in tota hac disputatione probandum sumitur: unde id etiam quod sequitur ineptissimum est. Quod semper unum & idem est, quæ ex eo peccata nascantur æqualia sint oportet. Nam prius illud falsum esse dico, nempe, Id quod non licet semper unum atq; idem esse: neq; enim idem est, Patriam prodere, quod Furari: cum utrumq; in eo arguatur, quod non licet: nisi fortè ita intelligat Cicero, quemadmodum initio diximus, Omnia quæ non licent sub uno vitij genere

genere contineri: quod quidem verissimum est. Sed tunc nequaquam id consecrarium erit, ut peccata sint æqualia: quamvis enim idem in genere nomen, atque eandem definitionem habeant: unaqueq; tamen species, suas ut habeat differentias atq; proprietates oportet, quibus ab alijs formis distinguatur. Itaq; forma, quæ generi alicui subiecta sit, alteri formæ sub eodem genere collocatæ, neq; par, neq; æqualis necessariò est: alioqui sequeretur, ut culex, quia animalis species est, Indico Elephanti, qui sub eodem genere collocatur, necessariò par, atq; æqualis esset. Non igitur, quia semper unum genus, atq; idem est quod non licet, ideo necessarium est, ut peccatorum species sint æquales: neq; si ab uno, quod semper idem sit, omnia peccata nascantur, ut æqualia sint oportet. Ponamus enim, unum esse oceanum, unde flumina omnia deriuntur: quis tam parum sane mentis est, ut quoniam ab uno, quod semper idem est, omnia flumina nascantur, necessariò consequi putet, ut omnia flumina sint æqualia? quid autem illud Ciceronis ab hoc differt? ut interdum pudeat, tam egregium autorem in tam puerilibus argumentis refutare. Sed quid ago? dum singula Ciceronis verba discutio, non satis videor mihi vestri rationem habere: nam hæc mea curiositas, atq; hæc Dialecticorum spinæ, vobis fortasse molestæ sunt. Itaque si placet ab eis discedamus, & aliqua alia, quæ sint utiliora, atque iucunda

fecundiora, de hac eadem re dicamus. Minimè verò, inquit Cardanus: perge porrò Antoni qua capisti, nam & mihi, & adolescentibus his omnibus, gratissima est ista tua disputatio: vides enim, quàm te attentè omnes audiant, quantam in vnoquoq; argumèto significationem approbationis dederint: quin etiam ipse mihi Maioragius assentire tuis argumentis videtur, cùm nihil contradicat, & tam attentè audiat.

Non rectè colligis (inquam ego) Cardane: neque enim omnino dictis assentior, quæ video facile refutari posse: sed ideo non contradico, ne institutam disputationem impediam: quoniam hoc omnibus his adolescentibus (ut video) maximè displiceret. Ideo autem attentè audio, quoniam mihi videtur Antonius longè maiores in Dialecticis progressus fecisse, quàm vnquàm existimassem: ita acutè distinguit: ingeniosè definit, callidè argumētatur. Id quidem (inquit Marcus) etiam ego iamdudum vehementer admiror: existimabam enim, mansuetioribus his tantùm musis, quæ ad oratoriam facultatem attinent, Antonium delectari: sed, ut video, nō tantùm Francisco fratri cedit in Dialecticis: sed eum etiam (pace eius præsentis dixerim) longè superat. Tum Franciscus, Ego verò libenter, inquit, hanc palmam Antonio fratri concedo, qui & maior me natu est, & longiori etiam tempore studijs omnium ingenuarū artium operam dedit.

Itaq;

Itaq; perge Antoni, musis approbantibus, infirmas eas, ut satis apparet, Ciceronis rationes labefactare, atq; euertere. Pergam, quoniam ita placet, inquit Antonius: sed si fortè longior vobis visus fuero, ne me accusetis, verum vos potius ipsos, qui tam minutè me disputare volueritis: quamuis posthac ita moderabor orationi meæ, ut cum se mihi occasio obtulerit, in Platoniam aliquam amœnitatem excurram: reliqua igitur accipite. Quod si virtutes (inquit) pares sunt inter se, paria etiam esse vitia necesse est. Hoc tibi concedi Cicero potest, quoniam ab Aristotele didicimus, contrariorum eandem esse rationem atq; doctrinam: sed quod assumis postea, quis tibi concedat? Atqui pares esse virtutes, nec bono viro meliorem, nec temperante temperantiorem, nec forti fortio rem, nec sapiente sapientio rem posse fieri facile perspicitur. Imò verò difficile perspicitur, vel nullo potius modo: nā quæ falsa sunt, ea qua ratione perspicias? at verò contrarium potius facile perspicitur. Quis enim adeo bonus est, ut melior effici non possit? aut quis adeo temperans, ut non possit esse temperantior? Nullus enim homo penitus reperitur, qui dum in hac vita est, perfectam bonitatem acquirere possit: sed aliquid semper super est, quod ad eam, quam vir bonus virtutē adeptus est, etiam addi possit. Si quis enim vndiq; bonus atq; perfectus reperiretur, iam non mortalis homo, sed

Deus

Deus aliquis potius iure optimo dici posset. Hoc est enim quod in Phædone pulcherrimè Socrates disputat, Paucissimos homines inueniri, qui vel boni vel mali propriè vocari possint: plurimos autem, atq; adeo maiorem partem, quodāmodo medios esse, ut nec omnino boni, nec omnino mali propriè nominentur. Videbat enim acutissimè Socrates, summam quandam esse bonitatem, cui nulla possit omnino fieri accessio, & ad quam mortalium nemo possit aspirare, quæ in sola Mente diuina reperitur; atq; ideo sapientissimè dixit in Protagora, Solum Deum rectè bonum vocari posse: & quemadmodum summa bonitas in Deo est, ita etiam ut summa malitia Deo contraria sit oportet: nullo enim modo fieri potest, ut mala penitus extirpentur. Nam (ut ait in Theæteto Socrates) bono oppositum aliquid esse semper necesse est: neq; tamen mala apud Deos locum habere possunt, sed naturam mortalem, regionemq; inferiorem necessariò circumeunt. Quare conandum est (inquit) ut hinc ad illum locum quam celerrimè fugiamus: Fuga autem est, ut Deo similes pro viribus efficiamur: Deo verò similes efficit iustitia, et sanctitas prudentiæ copulata. Quamobrem ex Socratis sententia summam in Deo bonitatem constituemus, summam autem malitiam in hac inferiori regione: ipsos autem homines in medio quodāmodo collocatos, ut arbitrato suo vel ob bonitatem

b illam

illam summam, vel ad hanc extremam malitiam iter dirigere possint. Ad illam bonitatem nos virtutes, ad hanc autem malitiam peccata perducere solent. Itaque quò quis diligentius virtutibus, atque bonis actionibus incumbit, tantò propius ad illam bonitatem accedit, atque ita melior fieri dicitur: ut quò magis ad ignem quis accedit, tantò fit calidior: contrà verò, quantò quis pluribus vitijs inquinatur, tantò magis ad extremam malitiam tendit, & deterior efficitur. Atque hac sanè ratione facile fieri potest, ut bono viro melior, & temperante temperantior inueniatur: cum enim nullus homo perfectè bonus esse possit, quoniam hoc solius Dei proprium est, ut in Protagora Platonis legimus: potest tamen aliquis tantum in virtute proficere, ut Deo quasi similis effectus longè melior cæteris dicatur, qui ad eandem virtutem nituntur: quod idem etiam de illo, qui malitiam amplectitur, intelligendum est. Itaque de ijs, qui vel probitate, vel malitia cæteris antecellunt, loquitur in Meno Socrates: ubi confirmat, Virum bonum similem esse Deo, & rem omnium sacratissimam: Malum autem hominem contrà rem esse prophanissimam. Cum igitur perspicuum sit, neminem esse mortalium qui perfectè bonus dici possit: necesse est, ut vel nullus omnino bonus dicatur, vel si quis dicitur, alius alio melior sit: Bonus enim ille tantum, sine dubitatione dicitur, qui per virtutem

tutem Deo similis effici studet. Quod cum alius alio studiosius, atq; diligentius efficiat: certè melior ille rectè dicetur, qui pluribus virtutibus instructus fuerit: alioquin nihil studium illud acrius adipiscēda virtutis, huic qui reliquos antecellit omnino prodesset, si nihilo melior propter illud efficeretur. Possem equidē in hac parte disertus videri, si in communibus locis expatiari velim, & exemplorum multitudine probare, quanta semper fuerit inter bonos viros differentia: ut quamvis plurimi & boni essent, & diceretur, alius tamē alio longè melior, atq; præstantior fuerit: sed hoc probationis genere, non nisi cum opportunum mihi visum fuerit, ut statui: ut hanc ipsi Ciceronis, eiusq; sectatoribus, gloriam relinquam: qui cum planiciem aliquam apertam vidēt, in qua facile exultare possit oratio, eam statim arripiunt: me verò hoc in genere disputationis breui: & acuta delectant. Dico igitur, quamvis illud Ciceroni concedamus, nec bono viro meliorem, nec temperante temperantiorem, nec sapiente sapientiore inueniri, quod omnino falsum est: non tamen rectè concludi posse, pares inter se virtutes omnes esse. Quid enim si quis Fortitudinem cum Iustitia conferat? audebit ne dicere Cicero, Iustitie parem esse fortitudinem? atqui si hoc diceret longè sapientiore Agésilauum existimarem, qui cum aliquando interrogatus fuisset, vtra maior esset virtus

h 2 iusti

virgine: quoniam hoc adulterium dicitur, quod legibus grauissimè vindicatur: deniq; cum ea, quæ sacris initiata sit, quas vulgò Monachas appellamus, omniū grauissimum. Hic ordo, atq; hæc peccatorum distinctio: rationi maximè consentanea est. Illud verò tuum quis ferat, ut tantum peccetur in meretrice, quantum in Vestali virgine? Verum peccare est (inquit) tanquam transire lineas, quod cum feceris, culpa commissæ est, quàm longè progrediare, cum semel transieris, ad augendam transeundi culpam nihil pertinet.

Equidem vix risum continere possum, cum ista lego: nam quàm bella est, & quàm apposita hæc similitudo? Verum videamus quàm vim habeat, Peccare est tanquam transire lineas. Sit ita sanè: Sed dic mihi, quæ sunt istæ tandem lineæ, quæ in peccado transeuntur? nempe si verum respondere volueris, atq; ex Socratis sententia, dices eam esse Mediocritatem: omnes enim virtutes in mediocritate constitutæ sunt. Itaque cum aliquis mediocritatem transiit, ut à virtute discedat necesse est, & in vitium, atq; in peccatum statim incidat. Transire igitur lineas, est à mediocritate discedere: quod cum quis fecerit, culpa commissæ est. Concedo. Sed quis illud concesserit, Quàm longè progrediare, cum semel transieris, ad augendam transeundi culpam nihil pertinet? Imò cum semel mediocritatē transieris, quantò longius ab ea discedis, tantò
in maio

in maiorem errorem ut incidas oportet. Quoniam nihil aliud est, A mediocritate discedere, quàm ab ipsa virtute discedere, à qua quantò quis longius abscedit, quis non videt, in tantò maius crimē incidere? Rectissime enim dixit Aristoteles, Paruum errorē in principio solere in fine maximum fieri. Sed peto à te Cicero, quoniam peccare est tanquam transire lineas, utrum cū quis transiuerit, Longius progredi, peccatum sit, nec ne? Si nō: ergo cū quis semel transiuit lineas illas, quamuis semper in eodem peccato perseneret, nihil tamē amplius peccabit: ut si quis fortē nummum furto subriperit, quoniā lineas transiuit, quamuis progrediatur in furando, & primò viginti sester tia, deinde centum, atq; ita deinceps, postremò etiam fana diripiat, hæc non amplius erunt peccata: quòd si hoc ut est, ita etiam falsum & absurdum videtur, necessitas cogit, ut concedas, eum qui lineas transiuit, si longius progrediatur, etiam peccare. Quo concesso, illud necessario sequitur, ut quantò longius progressus fuerit, tantò etiam magis peccet. Falsum est igitur illud, quòd Longius progredi, nihil ad augendam transeundi culpam pertineat. Quid deinde? Peccare, inquit, certè licet nemini. Sit ita, verè enim dicis. Quod autem non licet, id hoc vno tenetur, si arguitur non licere. Etiam hoc tolerari potest. Id nec maius, nec minus vnquam fieri potest. Vnde hoc? non enim video,
quare

mentum? quàm ab omni ratione alienum? nam peccato tantum nomen mutas: idem est enim peccare, & quod non licet facere. Itaq; cùm dicis, Quod non licet nec maius nec minus esse potest: idem est ac si diceres, Peccata sunt equalia, quod tibi non sumendum, sed probandum est. Id enim quod non licet in omni vitiorum genere rectè dicitur: ut, furari non licet, eadem facere non licet, patriam prodere non licet, atq; ita de reliquis. Neq; tamen hac ratione probatur, Furari, et Patriam prodere, equalia peccata esse. Hoc autem captiosæ conclusionis genus, quo vititur hoc loco Cicero, vitiosissimum est, & à Dialecticis nostris Petitio principij nuncupatur, quoties idem ad eiusdem probationem sumimus: nam (ut dixi) Peccatum, & Quod non licet, idem est. Quare cùm ait Cicero, Quod non licet, neq; maius, neq; minus esse potest: idem est, ac si diceret, Peccatum aliud alio maius esse non potest: quod unum in tota hac disputatione probandum sumitur: unde id etiam quod sequitur ineptissimum est. Quod semper unum & idem est, quæ ex eo peccata nascantur equalia sint oportet. Nam prius illud falsum esse dico, nempe, Id quod non licet semper unum atq; idem esse: neq; enim idem est, Patriam prodere, quod Furari: cùm utrumq; in eo arguatur, quod non licet: nisi fortè ita intelligat Cicero, quemadmodum initio diximus, Omnia quæ non licent sub uno vitij genere

genere contineri: quod quidem verissimum est. Sed tunc nequaquam id confectarium erit, ut peccata sint equalia: quamvis enim idem in genere nomen, atque eandem definitionem habeant: unaqueque tamen species, suas ut habeat differentias atque proprietates oportet, quibus ab alijs formis distinguatur. Itaque forma, quae generi alicui subiecta sit, alteri formae sub eodem genere collocatae, neque par, neque equalis necessario est: alioqui sequeretur, ut culex, quia animalis species est, Indico Elephanti, qui sub eodem genere collocatur, necessario par, atque equalis esset. Non igitur, quia semper unum genus, atque idem est quod non licet, ideo necessarium est, ut peccatorum species sint equalis: neque si ab uno, quod semper idem sit, omnia peccata nascantur, ut equalia sint oportet. Ponamus enim, unum esse oceanum, unde flumina omnia deriuntur: quis tam parum sane mentis est, ut quoniam ab uno, quod semper idem est, omnia flumina nascantur, necessario consequi putet, ut omnia flumina sint equalia? quid autem illud Ciceronis ab hoc differt? ut interdum pudeat, tam egregium autorem in tam puerilibus argumentis refutare. Sed quid ago? dum singula Ciceronis verba discussio, non satis videor mihi vestri rationem habere: nam haec mea curiositas, atque haec Dialecticorum spinæ, vobis fortasse molestæ sunt. Itaque si placet ab eis discedamus, & aliqua alia, quæ sint utiliora, atque iucunda

fecundiora, de hac eadem re dicamus. Minimè verò, inquit Cardanus: perge porrò Antoni qua capisti, nam & mihi, & adolescentibus his omnibus, gratissima est ista tua disputatio: vides enim, quàm te attentè omnes audiant, quantam in vnoquoq; argumèto significationem approbationis dederint: quin etiam ipse mihi Maioragius assentire tuis argumentis videtur, cùm nihil contradicat, & tam attentè audiat.

Non rectè colligis (inquam ego) Cardane: neque enim omnino dictis assentior, quæ video facile refutari posse: sed ideo non contradico, ne institutam disputationem impediam: quoniam hoc omnibus his adolescentibus (ut video) maximè displiceret. Ideo autem attentè audio, quoniam mihi videtur Antonius longè maiores in Dialecticis progressus fecisse, quàm unquàm existimassem: ita acutè distinguit: ingeniosè definit, callidè argumètur. Id quidem (inquit Marcus) etiam ego iamdudum vehementer admiror: existimabam enim, mansuetioribus his tantùm musis, quæ ad oratoriam facultatem attinent, Antonium delectari: sed, ut video, nō tantùm Francisco fratri cedit in Dialecticis: sed eum etiam (pace eius presentis dixerim) longè superat. Tum Franciscus, Ego verò libenter, inquit, hanc palmam Antonio fratri concedo, qui & maior me natu est, & longiori etiam tempore studijs omnium ingenuarū artium operam dedit.

Itaq;

Itaq; perge Antoni, musis approbantibus, infirmas eas, ut satis apparet, Ciceronis rationes labefactare, atq; euertere. Pergam, quoniam ita placet, inquit Antonius: sed si fortè longior vobis visus fuero, ne me accusetis, verum vos potius ipsos, qui tam minutè me disputare volueritis: quamuis posthac ita moderabor orationi meæ, ut cum se mihi occasio obtulerit, in Platoniam aliquam amœnitatem excurram: reliqua igitur accipite. Quod si virtutes (inquit) pares sunt inter se, paria etiam esse vitia necesse est. Hoc tibi concedi Cicero potest, quoniam ab Aristotele didicimus, contrariorum eandem esse rationem atq; doctrinam: sed quod assumis postea, quis tibi concedat? Atqui pares esse virtutes, nec bono viro meliorem, nec temperante temperantiorem, nec forti fortio rem, nec sapiente sapientio rem posse fieri facile perspicitur. Imò verò difficile perspicitur, vel nullo potius modo: nã quæ falsa sunt, ea qua ratione perspicias? at verò contrarium potius facile perspicitur. Quis enim adeo bonus est, ut melior effici non possit? aut quis adeo temperans, ut non possit esse temperantior? Nullus enim homo penitus reperitur, qui dum in hac vita est, perfectam bonitatem acquirere possit: sed aliquid semper super est, quod ad eam, quam vir bonus virtutē adeptus est, etiam addi possit. Si quis enim undiq; bonus atq; perfectus reperiretur, iam non mortalis homo, sed

Deus

Deus aliquis potius iure optimo dici posset. Hoc est enim quod in Phædone pulcherrimè Socrates disputat, Paucissimos homines inueniri, qui vel boni vel mali propriè vocari possint: plurimos autem, atq; adeo maiorem partem, quodāmodo medios esse, ut nec omnino boni, nec omnino mali propriè nominentur. Videbat enim acutissimè Socrates, summam quandam esse bonitatem, cui nulla possit omnino fieri accessio, & ad quam mortalium nemo possit aspirare, quæ in sola Mente diuina reperitur: atq; ideo sapientissimè dixit in Protagora, Solum Deum rectè bonum vocari posse: & quemadmodum summa bonitas in Deo est, ita etiam ut summa malitia Deo contraria sit oportet: nullo enim modo fieri potest, ut mala penitus extirpentur. Nam (ut ait in Theæteto Socrates) bono oppositum aliquid esse semper necesse est: neq; tamen mala apud Deos locum habere possunt, sed naturam mortalem, regionemq; inferiorem necessariò circumcunt. Quare conandum est (inquit) ut hinc ad illum locum quam celerrimè fugiamus: Fuga autem est, ut Deo similes pro viribus efficiamur: Deo verò similes efficit iustitia, et sanctitas prudentiæ copulata. Quamobrem ex Socratis sententia summam in Deo bonitatem constituemus, summam autem malitiam in hac inferiori regione: ipsos autem homines in medio quodāmodo collocatos, ut arbitratus suo vel ob bonitatem

h illam

illam summam, vel ad hanc extremam malitiam iter dirigere possint. Ad illam bonitatem nos virtutes, ad hanc autem malitiam peccata perducere solent. Itaq; quò quis diligentius virtutibus, atq; bonis actionibus incumbit, tantò propius ad illam bonitatem accedit, atq; ita melior fieri dicitur: ut quò magis ad ignem quis accedit, tantò fit calidior: contrà verò, quantò quis pluribus vitijs inquinatur, tantò magis ad extremam malitiam tendit, & deterior efficitur. Atq; hac sanè ratione facile fieri potest, ut bono viro melior, & temperante temperantior inueniatur: cum enim nullus homo perfectè bonus esse possit, quoniam hoc solius Dei proprium est, ut in Protagora Platonis legimus: potest tamen aliquis tantum in virtute proficere, ut Deo quasi similis effectus longè melior cæteris dicatur, qui ad eandem virtutem nituntur: quod idem etiam de illo, qui malitiam amplectitur, intelligendum est. Itaq; de ijs, qui vel probitate, vel malitia cæteris antecellunt, loquitur in Menoë Socrates: ubi confirmat, Virum bonum similem esse Deo, & rem omnium sacratissimam: Malum autem hominem contrà rem esse prophanissimam. Cum igitur perspicuum sit, neminem esse mortaliū qui perfectè bonus dici possit: necesse est, ut vel nullus omnino bonus dicatur, vel si quis dicitur, alius alio melior sit: Bonus enim ille tantum, sine dubitatione dicitur, qui per virtutem

tutem Deo similis effici studet. Quod cum aliis alio
 studiosius, atq; diligentius efficiat: certe melior ille
 recte dicetur, qui pluribus virtutibus instructus fue-
 rit: alioquin nihil studium illud acrius adipiscenda vir-
 tutis, huic qui reliquos antecellit omnino prodesset, si
 nihilo melior propter illud efficeretur. Possem equidem
 in hac parte disertus videri, si in communibus locis
 expatiari velim, & exemplorum multitudine pro-
 bare, quanta semper fuerit inter bonos viros differen-
 tia: ut quamvis plurimi & boni essent, & diceretur,
 alius tamen alio longe melior, atq; praestantior fuerit:
 sed hoc probationis genere, non nisi cum opportunum
 mihi visum fuerit, ut statui: ut hanc ipsi Ciceronis,
 eiusq; sectatoribus, gloriam relinquam: qui cum pla-
 niciem aliquam apertam videt, in qua facile exultare
 possit oratio, eam statim arripiunt: me vero hoc in ge-
 nere disputationis brevia & acuta delectant. Dico
 igitur, quamvis illud Ciceroni concedamus, nec bono
 viro meliorem, nec temperante temperantiorem, nec
 sapiente sapientiore inueniri, quod omnino falsum
 est: non tamen recte concludi posse, pares inter se vir-
 tutes omnes esse. Quid enim si quis Fortitudinem cum
 Iustitia conferat? audebit ne dicere Cicero, Iustitiae
 parem esse fortitudinem? atqui si hoc diceret longe sa-
 pientiore Agésilao existimarem, qui cum ali-
 quando interrogatus fuisset, utra maior esset virtus

iustitiâ ne, an fortitudo: respondit, Nulla esset fortitudinis utilitas, nisi præsens adesset iustitia: quòd si iusti mortales essent uniuersi, nihil omnino fortitudinis egeremus. Videtur ne Rex sapientissimus illis verbis ostendisse, longè maiore fortitudine virtutem esse iustitiam: quod Aristoteles tertio Topicorum his quidem verbis affirmat; Quæ seipsis cōtēta sunt, meliora sunt quā quæ egent alijs: quod in iustitia et fortitudine cernere licet. Nā si iusti omnes essent, nihil loci esset fortitudini: at si fortes essent, iustitiā tamen requirerent.

Quòd si nihil à reliquis virtutibus iustitia differt, cur eam igitur primo de Officijs libro ipsemet Cicero dominam & reginam virtutum omnium appellat? eius enim hæc verba sunt, cū de Iustitia loquitur: Hæc una virtus sola domina omnium, et regina, virtutum. Quod ab Aristotele ex quinto Ethicorū sumpsisse videtur, cuius hæc sunt verba: Ob eamq; causam hæc una virtus omnium est domina, & regina virtutum: neq; Hesperus, aut Lucifer, tantam sui excitant admirationem: ex quo factum est iam tritum sermone prouerbiū, Iustitia una omnes reliquas virtutes cōtineri. Quamobrem vel necesse est, ut sibi ipsi contradicat Cicero, & probet, iustitiam non esse virtutum omnium præstantissimam: vel si hoc concedit, quod nullo modo, si constare sibi vult, negare potest: illud statim totum huiusce disputationis fundamentum ruit,

ruit, Vinciturq; neutiquā inter se virtutes esse pares, quoniā reliquas omnes iustitia supereminet. Quid igitur iam prodest illud tibi Cicero si concedamus, nec temperante temperantiozem, nec forti fortiozem esse virū? Sed hoc tibi nemo paulò doctior concesserit: fuit enim bonus vir (ut accepimus) Aristides Atheniensis, sed eo longè melior Socrates: fuit temperans Plato, verū Xenocrates multò temperantior, & adhuc Xenocrate temperantior Epictetus Stoicus: fuit fortis Themistocles & Epaminondas Thebanus, sed longè fortiores duo Scipiones Africani, maior, & minor: fuit sapiens Solon & Lycurgus, verū Socrates ab oraculo sapientissimus omnium iudicatus est. Quamvis enim nemo perfectè sapiēs esse possit, quoniam hoc diuinitatis est proprium, ut in Apologia sua Socrates fatetur, & Metaphysicorum primo comprobatur Aristoteles: tamen quoniam diuinarum atq; humanarum rerum cognitionem sapientiam esse, unā cum ipso Cicero volumus: haud dubium esse potest, quin quotiescunq; aliquis vel modicā de Deo, aut de rebus humanis cognitionem habet, ex ea parte sapiens dicatur: quantoq; maiorem de diuinis, atq; humanis rebus cognitionem adeptus fuerit, tantò etiam sapientior rectè dici potest: atq; hoc est, quod in secundo Metaphysicorum dixit Aristoteles, Veritatis cognitionem, quæ sapientia est, partim quidē esse facilem, partim autem

difficilem. Est enim ideo facilis, quoniam omnes eam aliquo modo participant : difficilis autem, quia nemo potest eam perfectè consequi. Sed quis est omnium quin intelligat, in acquirenda rerum præclarissimarum cognitione, quamvis duo vel plures multum excellent, alium tamen alio præstantiorem esse posse? Qui ergo iam multum in sapientia profecit, is rectè sapiens vocari potest. Sed si quis eum, qui multum iam profecit, longè antecellat, quis est ad cò rerum ignarus, quin videat, rectissimè sapientiorem appellari? Deinde cùm in Theæteto Socrates doceat, Dei cognitionē summam esse sapientiam : facile potest intelligi, aliquam etiam esse sapientiam, quæ summa non sit, ut rerum humanarum scientia. Quãobrem inter ipsas sapientias gradus reperiētur, ut altera maior, altera minor sit: ergo etiam homines qui eas adipiscuntur, alius alio sapientiores esse possunt. Sed nimium immoror in re clara, ac minimè dubia: reliqua videamus. Probare conatur Cicero, Bono viro nullum esse meliorem, neq; temperante temperantiorem, sed qua ratione? audite obsecro validissimum argumentum, Crisum continete, si potestis: An virum bonum (inquit) dices, qui depositum nullo teste, cùm lucrari impunè posset auri pondo decem, reddiderit, si idem in decem millibus non idem effecerit? aut temperantem eum, qui se in aliqua libidine continuerit, in aliqua effuderit? O' plumbeum

pugionem ! hac igitur te ratione probare putas Cicero bono viro nullum esse meliorem ? quo tandem modo ? nullam enim hic ego probationem video : nam qui depositum reddit, bene facit : qui non reddit, male facit, etiam si impune lucrari possit : ergo vir bonus semper depositum reddet, malus autem fortasse aliquando reddet, aliquando non reddet. Tu igitur mali viri nobis exemplum proponis, qui auri pondo decem sibi deposita reddat, decem millia non reddat : nos autem de bono viro loquimur. Quorsum igitur exemplum istud ? aut quid tandem in hac parte conaris ostendere ? video enim te à proposito longè discedere : cum enim proposueris, Bono viro nullum esse meliorem, postea nobis improborum exempla commemoras : vir enim improbus in aliqua se fortasse libidine continet, sed in alia deinde se effundet : at qui verè temperans est, nunquam se libidini tradet : nihil igitur aliud ista tua exempla probant, nisi bonum virum esse bonum, & temperantem esse temperantem : quia bonus vir semper depositum reddit, temperans à libidinibus semper se continet. Scio hoc ego Cicero, sciunt omnes, Bonum esse bonum, de hoc non dubitamus : proba nobis illud, quod proposuisti, Nullum esse bono meliorem : non enim hoc credimus, non fit nobis verisimile. Videmus cum, qui se à libidinibus continet, bonum existimari : sed qui præter hoc etiam sapientissimè Rempub. administrat, longè

potest, quò magis virtus sit: nihil demi, ut virtutis nomen relinquatur. Sit ita sanè: quid tum sequitur? pares esse virtutes? quomodo? non enim hoc illi consecrarium esse video: ut si quis ita argumentetur, Nihil arbori addi potest, quo magis arbor sit: nihil demi, ut arboris nomen relinquatur: igitur æquales inter se sunt omnes arbores. An non acutissimè videtur hoc esse conclusum, ut altissimæ populo Corylus humillima æqualis sit? Videtis ne mirificum in disputando Ciceronis acumen? & profectò sibi placebat in his Paradoxis, cùm ad Brutum scribens inquit, Nihil tam incredibile esse, quod non dicendo fiat probabile. Cui hoc probabile est Cicero? Nihil homini addi potest, quo magis homo sit: ergo omnes homines sunt æquales? ut breuissimus nanus, quia homo est, cuius longissimo giganti æqualis sit. Quid autem hoc illi tuo dissimile? Nihil virtuti addi potest, quò magis virtus dici possit, ergo virtutes inter se sunt æquales. Quòd si tibi hoc modo respondeã, caue Cicero putes isto tuo argumento aliquid esse conclusum. Concedo enim virtuti nihil addi posse, quò magis virtus sit: neque tamen id sequitur, quod ipse vis effici: profectò harebis, & quò te veritas non habebis. At verò si illud ego adiunxero, Nihil virtuti addi potest, quò magis virtus sit, sed ut maior virtus sit, plurimum addi potest: ut populo parvæ, aut pinui, nihil addi potest, quò magis populus, aut pinus sit: sed

ut sit maior, quis non videt, quāta fieri possit accessio?
& puero nihil addi potest, ut magis homo sit: sed ut
maior homo fiat, quis ignorat ad plenam pūbertatem
usq; semper augeri posse? Certè non dubium est, quin
se victum in hac parte Cicero ipse fateatur, cum suum
illud Enthymema falsum omnino, meum autem ma-
ximè probabile, atq; adeò verum esse videatur. Nam
res omnes, quo ad naturam suam attinet, neq; magis,
neq; minus dicuntur: hoc enim non substantiæ, siue
(ut ita dicam) essentiæ ipsius, sed euentorum proprium
est, ut vel magis, vel minus dicantur. Verum ut me-
lius animi mei sensum vobis exprimam, hac utar di-
stinctione, quam verissimam esse intelligetis. Dico igitur
euenta tribus potissimum modis consyderari posse,
vel quod ad naturam suam attinet, vel quod ad quan-
tatem eius rei, in qua sunt, vel quod ad ipsorum com-
municationem, quæ in rebus perspicitur. Quòd si na-
tura ipsa euentorum spectetur, neq; magis, neq; minus
in eis dicetur: ut candor non magis ille est, qui in niue
reperitur, quàm qui in cygno: neq; magis virtus ea di-
citur, quæ in Platone est, quàm quæ in Xenocrate. Si
verò quantitas eius rei, cui candor inest, aduertatur,
maior & minor rectè dicetur: ut si totum aliquod
ædificium candidum sit, maior erit ille candor, qui in
toto ædificio est, quàm qui tantum in aliqua ædificij
parte. Deniq; si euentorum communicationem spe-
ctauer

Etauerimus, tunc rectissime magis et minus dicemus: ut si Thaidi, atq; Phryne candor communicatus sit, sed maiorem Thais candorem, minorem Phryne sortita sit, Thais magis candida, Phryne verò minus rectè dicetur. Eadem est etiam virtutis, & vitij, & reliquorum id genus ratio, ut si virtutis naturam spectes, non magis una virtus sit, quàm altera: si verò magnitudinem rerum gestarum ab eis, in quibus virtus inest, spectare volueris, certè maiorem exempli gratia virtutem in Pompeio, quàm in Crasso, & in Cesare quàm in Bibulo reperies. Deniq; si communicationem virtutis aduertas, magis etiam & minus in ea rectè dices: ut si Curio & Fabricio virtus communicata sit, sed maior in Fabricio, minor in Curio videatur: certè Fabricius magis virtute præditus, Curius verò minus verissime dici poterit. Quamobrem ita de virtute concludo, quod etiam de cæteris qualitatibus, atq; euentis: eam aliquo modo neq; magis, neq; minus dici, quoties eius natura spectatur: aliquo modo & maiorem, & minorem rectè dici, quoties earum rerum, quæ per virtutem geruntur, quantitas attenditur: aliquo deniq; modo & magis & minus inesse dici, quoties eos consideramus, quibus virtus communicata sit: nam alius alio iustior, alius alio prudentior appellatur. Quæ cùm ita sint, quis iam nõ illud merito videat quod sequitur: Etenim si benefacta rectè facta sunt,

sunt, & nihil recto rectius: certè nec bono quidem melius quicquam inueniri potest. Ad benefacta recurris Cicero? quid est quod aduersarius tuus magis exoptare possit? Nam si in nomine tantum virtutis constitisses, fortasse tibi difficilius respondere possem: cum verò ad virtutis effecta venias, facillima mihi te conuincendi, atq; refellendi ratio proponitur. Non enim quemquam tam impudentem esse arbitror, quin mihi benefacta alijs alia maiora concedat. Sed ne longius abeam, à te peto Cicero, fuerit ne illud benefactum, cum tibi Fulvia coniurationis inita consilia patefecit? certè non negabis. Rursum à te peto: fuerit ne benefactum illud tuum, cum expulso Catilina, atq; profligato eius nefario conatu, salutem patriæ penè amissam restitueris? quo tuo facto tantopere gloriaris, ut etiam ad nauseam usq; tuis in scriptis identidem illud inseras. Etiam hoc, & maximè benefactum esse dices. Hæc igitur cum à te concessa accepero, tuis istis rationibus ita concludam: Si benefacta rectè facta sunt, & nihil recto rectius, certè Fulviæ benefacto Ciceronis benefactum non erit melius, cur igitur Fulvia non Mater patriæ, sicut tu pater patriæ fuit appellata? aut cur tu benefactum tuum tantopere extollis, de Fulviæ verò benefacto ne meministi quidè usquam, quod sciam? Aut igitur inuidus, atq; improbus fuisti, quòd non æqualem Fulviæ laudem impartiueris: aut si
longè

longè maius tuum benefactum fuit, hoc in loco sine ratione garrire te profectò vides. Nam qui ciuem seruat, certè benè facit: qui verò centum, longè melius facit. Quid si quis exercitum? quid si urbem? quid si totum imperium? non'ne hæc quò maiorem afferunt utilitatem etiam eò maiora benefacta sunt? Quid igitur valet illud tuum, Sequitur vt etiam vitia sint paria siquidem prauitates animi rectè vitia dicuntur. Quod in te sanè conuerti hoc modo potest: Quoniam virtutes non esse pares declaratum est, sequitur vt ne vitia quidem sint paria: contrariorum enim contraria sunt cōsequentia: virtutes autem vitij contrariæ sunt, siquidem virtutes animi æquitates, vitia verò prauitates rectè dicuntur. Illa verò duo quæ sequuntur effata, non tantum falsa, sed etiam absurda sunt. Quoniam (inquit) pares virtutes sunt, rectè etiam facta, quando à virtutibus proficiuntur, paria esse debent. Perinde quasi iam viceris, Cicero, Pares esse virtutes: aut si id concesserimus, necessariò sequatur, vt etiam rectè facta paria sint. Nam & illud falsum est, vt ostendimus: & hoc nullo modò consequens esse potest. Non enim necesse est, vt quæ à paribus rebus proficiuntur, etiam ipsa paria sint: vt si duo paria sint animalia, nō ideo necessariò parem sortum emittunt: neq; pares arbores necessariò stolones pares generāt. Quòd si dixeris, hoc non in rebus naturalibus, sed in voluntarijs

tarijs accidere. Neq; hoc verum est: nam saepenumero accidit, ut par virtus nequaquam parem effectum edere possit. Plurimum enim ad facilitatem, aut difficultatem, & ad magnam, aut parvam gloriam momenti habent res illae, in quibus virtus exercetur: sicuti duo eiusdem artis, atq; pari prudentia opifices, si alter ferrum sculpendum, alter aurum sumat: quis non videt, quanta sit inter eorū opera differentia futura? Eodem modo, si duo pari iustitia praediti viri fuerint, quorum alter, exempli gratia, rebus venalibus praeficiatur, alter autem Rempub. administret: poterit ne verè dicere Cicero, quæ uterq; rectè fecerit, quoniam pari virtute praediti sunt, ea inter se paria esse? ut si hic civitatem ab ingenti calamitate fortè liberarit: ille verò nequis in cōtractibus deciperetur, effecerit? Quamvis igitur pares inter se virtutes essent, non tamen necessario sequeretur, ut rectè facta essent paria. Quod etiam de vitijs atq; peccatis intellectū volo, ut quamvis essent paria vitia, non tamen ideo sequeretur, ut malefacta aequalia esse necessario cōcludendum esset. Et gloriaris Cicero te à Philosophis ista sumere? à quibus quaeso Philosophis? num à Platone? num ab Aristotele? equidem in horum Philosophorum scriptis tales ineptias non reperio. Quòd si unquam tale genus argumentorum apud eos, qui Philosophiam profitentur, reperissem, eos profectò vel tardipedi Deo (ut ait Ca-
tullus)

*rullus) dedicasset, vel omnem eorum Philosophiam
 fortasse meritò contempsisset. Quod est enim hoc in
 tertio Paradoxo argumētum Philosopho dignum? Imò
 potius, quæ conclusio est, quæ nō pinguis & crassa sit?
 Et audes dicere, Socratem isto modo disputare soli-
 tum? Vbi, quæso, genus istud, aut istam differendi for-
 mulam apud Platonem, ubi Socrates acutissimè dispu-
 tat, reperisti? Profer, quæso, locum ubi Socrates isto
 modo disputet. Magnam verò Socrati laudem attri-
 buis, quòd eum isto disputandi genere, quo tu vteris,
 vti solitum dicas. Non possum equidem nō indignari,
 quòd hanc Socratico nomini labem inurere tentes Ci-
 cero: non enim tibi satis est, quòd istorum Paradoxo-
 rum Socratem fingis autorem, à cuius doctrina peni-
 tus abhorrent, & absunt quàm longissimè: sed cùm
 magnam inanium argumentorum farraginem colle-
 geris, adiungis deinde, Socratem isto modo disputare
 solitum. Quid hoc aliud est, quàm dicere, Socratem
 isto modo delirare, atque mentiri solitum? Nam quæ
 hætenus dixisti, sine dubitatione falsa sunt omnia.
 Scilicet isto modo Socrates disputabat, cùm Gorgiam,
 Polum, Calliclem, Hippiam, Phædrum, Alcibiadem,
 Critonem, ceterosq; plurimos, qui passim apud Plato-
 nem leguntur, etiam inuitos, & repugnantes, in sen-
 tentiam suam adducebat. Quis non eum obsecro molli
 (quod aiunt) brachio repulisset? quis non irrisisset, ac
 penitus*

penitus contempsisset, si isto modo disputasset? Sed nimirum longè alia est apud Platonem differendi ratio, quam incertè Cicero, quod satis apparet, nullo modo percepisti. Nihil enim eiusmodi Socrates sumit, quod ab aduersario non facile concedatur: atq; ita semper progreditur, ut positis quibusdam & concessis, aliud quiddam, quàm ea quæ posita sunt, ex ijs ipsis quæ posita sunt, ostendat effici necessariò. Tu verò Cicero sumis ea plerunq; quæ tibi nemo concesserit: & ex eis deinde concludis, quæ minimè necessariò consequuntur. Non igitur Socrates isto modo disputabat, quem frustra in hoc loco dilaudas, & doctum atq; sapientem fuisse dicis, nihil enim eius tibi doctrina atq; sapientia prodest ad id, quod conaris ostendendum, quoniam ab ea penitus alienum est. At si Djs placet, in hac parte facetus esse voluisti, cùm te nò à lenonibus, sed à Philosophis ista sumere dicas: & non pugnis, sed verbis contendere: neq; querendum esse, quid batiuli, atq; operarij, sed quid homines doctissimi senserint. Sed quinam sunt isti viri doctissimi, qui hac tam inania, atq; inepta senserint? Nunquam certè probabis, Socratem, Platonem, Aristotelem qui verè doctissimi fuerunt, in hac fuisse sententia, ut equalia essent omnia peccata: quin potius (ut infra docebimus) longè aliter senserunt, & grauioribus peccatis, grauiores etiam poenas irrogandas censuerunt, quem-

admod

admodum ipse communis sensus, et vera ratio dictare videtur omnibus. Iam verò, quasi viceris, sententiam istam esse veram, conaris etiam ostendere, longè utilissimam esse. Sed qua tandem ratione? Quoniam (inquis) nulla vis est, quæ magis arceat hominēs ab improbitate, quàm si senserint, nullum in delictis esse discrimen. Ego autem longè aliter euenturum intelligo, si hæc in aliquorum opinione sententia sederit. Nam improbos longè deteriores efficeret: probos autem ad rectè agendum multò tardiores. Quis enim paulò avarior cum intelligat nullum in delictis esse discrimen, non malit talentis mille, si possit, sociū fraudare quàm talento vno? Nunc enim improbi, cum ad maleficiū accedere cupiunt, sæpenumero à grauioribus abstinēt, leuiora committunt: quòd si crederent, peccata esse equalia, cum eis, dum improbi sunt, peccare quasi necesse sit, grauiora potius quàm leuiora perpetrarēt: ut si quis omnino decreuit alicui nocere, si grauius existimet esse interficere, quàm vulnerare, fortasse tantum vulnerabit: at si nihil interesse credat, haud dubium est, quin potius sit interfector: atq; eadem est etiam in reliquis ratio. Quid autem de benefactis dicam? quæ si omnia paria sunt, magnam certè nobis ad ignauiam ansam præbent. Quis est enim, qui pro patria, pro communi salute, pro humano genere, magna pericula adire, magnos labores sustinere, magnas

i subire

subire molestas, mortem deniq; pati velit, cum intelligat, etiam si omnia hæc præclare gesserit, nihilo tamen se maiorem virtutem adeptum, aut nullum rectius factum edidisse, quam si domi suæ quietus & otiosus sine improbitate vitam egisset? & tam bene segesse, si petenti medico cibum aut potionem dederit, quam si patriam suam à cæde atq; incendijs liberarit? Pro Deum immortalem, hæcine sunt tandem, quæ nos ista tua sententia Cicero docet? Lapsa est libido alicuius in meretrice, statim ille secum inquiet, quid egi miser? peccaui, lineas transiui: sed postquam ita accidit, age iam quam longè progrediar, ad augendam culpam nihil attinet: possum ergo matronas violare, virgines constuprare, vestales contemnerare: nihilo enim hoc maius peccatum est, quam id quod in meretricem commisi. Hæc summa est illa utilitas, quam ab ista sententia tua possunt homines percipere, ut deteriores improbi fiant, boni verò segniores. Neq; enim id verum ullo modo esse potest, quod ais, arceri magis ab improbitate homines, si senserint nullum in delictis esse discrimen. Nam qui probi sunt, nequaquam delictorum paritate à peccando abstinere, sed quia rectum & honestum id esse iudicant: qui verò sunt improbi, pœnæ formidine sæpenumero quidē peccata relinquunt, et quæ maiora putant plerunq; refugiunt: sed si intellexerint, nullū in malefactis discrimen esse,

nemini

nemini dubium esse potest, quin libidini totas habenas laxaturi sint, & in omne sceleris genus prolapsuri: ut ne ab exemplo Ciceronis recedamus, si quis magistratum aliquem, aut Regem, aut Pontificem, aut Sacerdotem inimicum habeat, fortasse propter dignitatem eam qua præditus est inimicus illi parceret, neq; etiam si possit, interficere audebit, quia persuasum habeat, gravissimum esse crimen publicam personam quæ maxime Reipub. sit utilis, aut qua sacris præsit, interficere. Quod si intelligat, nihilo maius esse peccatum, talem personam è medio tollere, quàm si quemlibet privatum atq; abiectum hominem è medio sustulerit: nulla certe erit mora, quin quacunq; ratione possit, interficere conetur. Eodem modo, si quis vestalis virginis amore captus sit, & exploratum habeat, maximum flagitium, atq; scelus esse, talem virginem violare, fortasse etiam si possit, ne tantum in se flagitium admittat, non violabit. At verò si quis ei persuadeat, non esse hoc maius peccatum, quàm coire cum meretricula: non erit dubium, quin omnes machinas admoturus sit, ad expugnandam virginis illius vestalis pudicitiam. Videtis igitur, quam utilitatem apporatura sit hæc Ciceronis sententia, qua nullam utilitatem esse censer. Verùm fortasse iam defessi estis tot nugis meis audiendis. Defessi nos (inquit Octavianus) imò verò plurimum ista tua me oratio delectat,

in qua non tantum singulas Ciceronis clausulas discutis, verum etiam multa docta atq; erudita interponis. Sed (ut ingenuè fatear) nimium ad viuum (quod aiunt) mihi refecare videris: neq; dum omnia dicta vis expugnare Ciceroni parcis, cum quo fortasse modestius agendum erat: nam inter nos omnia profecto licet dicere. Sed si hæc nostra disputatio vulgata fuerit, & intellexerint ij, qui magis quam seipsos Ciceronem amant, ab Antonio Comite Ciceronem suum, imperitum, ineptum, fallacem, nugatorem fuisse appellatum, vide ne te odio plusquam Vatiniano prosequantur, et in te dentatam (ut aiunt) chartam exerceant: atq; etiam tibi cauendum erit, nequis paulò audacior cominus tecum rem gerat, & à te ne manus quidem abstineat. Tunc ridens Antonius, Equidem nullum, inquit, hominem Ciceronis studiosum, præter hunc Maioragium pertimesco: quid enim reliqui de me dicturi sint, non curo. Hunc autem scio, si voluerit, posse meam hanc loquacitatem suo illo disputandi artificio, quod tibi Octauiane, qui ab eo didicisti notissimum est, reprimere, atq; refellere. Sed quæ causa est, ut mihi irascantur Ciceronis amatores? an non illis concedo summum oratorem esse Ciceronem? an non fateor eum mirifica, ac penè diuina eloquentia præstare? quid amplius volunt? an ut etiam summum eum fuisse Dialecticum, atq; Philosophum dicam? equidem hoc in eo

non

non video. Quòd si ineptus est is, qui ea tractare ag-
greditur, quorum vsum non habet: videat Cicero, ne
meritò possit ineptus in hac parte vocari. Perge porrò
inquam ego, Antoni: sed vide, ne ista tua audacia in
neruum (ut aiunt) erumpat: nam à me nullo modo po-
teris impunè discedere, quòd tam nefariè sanctissimos
illos Ciceronis manes violare non dubitaris: quòd nisi
mihi tanta esses affinitate cōiunctus, aut nisi te tanto
amore prosequerer, excitare profectò in te disertissi-
mos iuvenes Ciceronianos, Paulum Manutium, Octa-
uianum Ferrarium Sebastianum Conradum, fortasse
etiam quamvis grandiore iam natu Barptolomeum
Riccium, summum illum Ciceronis amatorem, qui
omnia illa longè verius in te conuenterent, & te verè
ineptum, imperitum, fallacem, nugatorem ostende-
rent. Tum ille ridens, Ne scui quæso, inquit, Maiora-
gi: sed æquo animo patere quæcunq; eueniunt: nam
etiam ego prompto animo pati paratus sum, si quis me
audacem, atq; imperitum appellet: modò rationes has
meas, quas in Ciceronem protuli diluat omnes: &
ostendat, iniuste Ciceronem à me accusari. Sed dum
hæc argumenta mea fuerint irreprehensa, atq; inex-
pugnata, faciet omnino ille ineptè, atq; imperitè, qui-
cunq; me audaciæ, atq; imperitiæ condemnare volue-
rit. Sed his ne contenti estis, quæ hæcenus dixi: an
etiã addi vultis alia, quæ reliqua sunt? Absoluenda

(inquit Cardanus) tibi disputatio est, Antoni: scis enim Hesiodi præceptum esse, cum quis domum extruere cœperit, ne illam imperfectam relinquat: nam nos etiam reliqui, qui hodie venimus, in Ciceronem aliquid omnino dicere decrevimus: hi enim mihi adolescentes in via se paratos esse dixerant. Ego autem licet adhuc nihil excogitarim, tamen hodie spatium aliquod ad cogitandum sumam. Pergratum hoc, inquit Antonius, mihi futurum est: nam si forte ab istis Ciceronianis condemnatus fuero, calamitatis mee socios habiturus sum. Sed audite, quibus ea, quæ contradici possunt, argumentis refellat Cicero: Nihil ne igitur interest (nam hoc dicet aliquis) patrem quis necet, an servum? Expecto Cicero, quid ad hanc obiectionem respondeas. Sed memento de peccatorum equalitate te verba facere: ne fortasse aliquid respondeas, (ut soles) quod nihil ad propositum faciat. Nuda (inquit) ista si ponas, iudicari qualia sint non facile possunt. Qua de causa obsecro? aut quid est tandem quod iudicium impediatur, si constet utrunq; peccatum esse? nos enim de peccatis institutam à te disputationem videmus. Sit ego peccatum, patrem interficere: sit peccatum, servum necare: deinde responde mihi, Nihil ne inter hæc peccata interest? Patrem, inquit, vita privare, si per se scelus est, Saguntini qui parentes suos liberos emori, quàm servos vivere maluerunt, paricide fuerunt

fuerunt. Hoccine modo mihi respondes? quid hoc ad propositam questionem? an non vides te aliam quandam, & quidem difficilem disputationem ingredi? Vtrum Saguntini peccarint, nec ne, quod parentes suos emori liberos maluerint, quam seruos viuere? Nos autem hoc à te non petimus, vtrum illud Saguntinorum factum peccatum fuerit, nec ne: disputetur alio tempore, quoniam nihil ad propositum facit: nos enim de ijs, quæ constat esse peccata, querimus, vtrum paria sint, nec ne: solue igitur propositam questionem. Parenti, inquit, nonnunquam adimi vita sine scelere potest, & seruos sæpe sine iniuria non potest. Prò bone Iupiter, quam importune, Cicero, questionibus accumulas, neq; vllam soluis. Quid enim hoc loco prodest intelligere, vtrum parenti nonnunquam adimi vita sine scelere possit, nec ne? an non vides à scopo te longè aberrare? Sed dic mihi Cicero, quoniam te sine ratione vagantem reuocare durum oportet, cum parentis sine scelere, si modo hoc accidere potest, vita adimitur, est ne hoc peccatum? Minimè vero: quod enim sine scelere, ac sine iniuria fieri potest, quæ causa est, ut id peccatum appelletur? vide igitur tandem, quo modo mihi respondeas: cum enim inter se peccata comparamus, non querimus ea, quæ peccata non sunt: ut si fortè queram ab aliquo, vter acutius, et ingeniosius. Aristoteles ne, an Plato disputat:

Et is ita mihi respondeat, interdum Aristoteles non disputat: possent ne auditores risum continere, qui tam absurdam responsionem audiant? Quid hoc Cicero tuum ab illo differt? Vtrum maius peccatum est, patrem ne interficere, an seruum? Interdum, inquit, patrem interficere peccatum non est. Sed quid hoc ad rem? non enim quero, quando non sit peccatum: sed cum utrunq; peccatum est, utrum maius sit? Causa, inquit, hæc, non natura distinguit: quæ quando alteri accessit, id fit propensius: si utriq; adiuncta sit, paria fiant necesse est. Hæc mera fuga est, & aperta fallacia: nam quæ tandem est ista causa, quæ peccata distinguit? potest ne esse iusta aliqua peccandi causa? Certè non tam amens eris Cicero, ut hoc dicas: quoniam nulla unquam tanta causa reperitur, propter quam debeat aliquis ab honestate recedere. Quæro igitur, quæ sit ista causa: nam si quis parentem propter aliquam iustam causam, quam leges, & ratio probet, interfecerit, nullum est peccatum: si verò non iusta de causa quis et parentem & seruum interficiat, eodem reuoluimur: quæram enim, utrum maius peccatū sit. Sed cum utriq;, inquit, adiuncta causa est, paria fiant necesse est. Quibus nos præstigijs ludis Cicero? certè ne te quidem satis aduertisse arbitror, quid hoc loco diceres. sed id unum studuisse, ut in falsa, & nugatoria causa, aliquid dicere videreris. Quod facile sanè tulissem,

tuliffem, nisi grauiffimum Socratis, & veritatis nomen nobis obieciſſes: vt qui iſtas tuas ineptias legerent, eas & Socraticas, & veras exiſtimarent. Sed explica, obſecro, nobis cauſam illam, quæ vtriq; ſceleri adiuncta, faciat tam graue peccatum eſſe, ſeruum necare, quàm parentem: cur eam nobis abſcondis? cur non patefacis? an eam tanquam Cereris myſteria vulgare nefas eſt? Maximam proſectò cauſam iſtam eſſe oportet, quæ cum peccatis adiungitur, ea neceſſariò paria faciat: ſed eam cupio mihi declarari, neq; enim aliter vt iſti tuæ conſuſioni credam, adduci poſſum, niſi prius illius cauſam mihi demonſtraris: nam ab Ariſtotele didici, nullam conſuſionem neceſſariò veram eſſe, quæ non à cauſis ſuis deducatur. Sed ipſe ais, neceſſariò peccata eſſe paria: fac igitur, vt cauſa nobis appareat. At proſectò nulla penitus excogitari vera poteſt: neq; enim quæ falſa ſunt, cauſam vllam, vt ſint, habere poſſunt. Cum igitur nulla ſit cauſa, quæ nos tam abſurdæ conſuſioni fidem habere cogat, merito te poſſumus irridere Cicero, qui pluribus in locis hoc in paradoxo te neceſſariò concludere putes. Sed tandem ad propoſitum redi, atque in cauſa propria præuaticaris. Concedis enim in ſeruò necando, ſi adſit iniuria, ſemel peccari: in patris vita violanda, multa peccari: quoniam violatur is, qui procreauit, is qui aluit, is qui erudiuit, is qui in ſede, ac domo, atq; in

Repub. collocavit : itaq; multitudine peccatorum præ-
stare, eoq; maiore pœna dignum. Hoc est; quod à te vo-
lebam, Cicero: neq; enim mihi persuadere poteram, te
in tam absurda sententiâ esse, ut eadem pœna dignum
putares, qui servum interfecisset, cum eo, qui patrem
paricidiosè vita privasset. Maiore igitur pœna di-
gnus est parricida. Quid ita? quia in patris vita vio-
landa, multa peccavit. Siquis igitur probaret, unum
tantum scelus atq; peccatum esse, patrem interficere:
an non, quia maiore pœna dignum est, etiam gravius
peccatum esset? Certè de hac re nemo dubitare potest.
Agè ergo, quoniam tecum hac in parte mihi iocandum
est, qui patrem per iniuriam interficit, an non male fa-
cit? Nemini dubium id quidem est. Quid si illum vno
ictu transfodiat? an nò hoc unum factum erit? Ne hoc
quidem dubium esse potest. Ergo qui patrem interficit
hoc modo, quia malefacit, et id vno ictu facit, id unū
malefactū erit? Ita profectò est. Sed mihi quæso dic Ci-
cero, Malefacta pectâ sunt, an non? iam à te concessum
est, esse peccata : igitur si malefacta pectâ sunt, etiam
unum malefactum unum peccatum erit. Sed iniuria
patrem interficere, unum est malefactum: ergo etiam
unum peccatum est, gravius autem punitur & maio-
ri pœna dignus est parricida, quam qui servum neca-
vit, ergo patrem interficere maius peccatum est, quam
necare servum. Nam si ratio illa admittatur, quod in

An facta multa peccata sint, nullum peccatum inue-
 niatur quod unū sit. itaq; neq; illud verum erit, quod
 in seruo necando semel peccetur, possum enim ita di-
 cere, violatur is qui nobis seruit, qui nostra curat, qui
 domesticus est, qui nostram effigiem prae se fert, qui
 vitam suam pro nobis profundere paratus est, qui de-
 niq; homo est. Age verò, quid ad hoc respondebis Ci-
 cero, Seruum & parentem per iniuriam interficere,
 peccare est: sed quia qui parentem interficit, maiori
 poena dignus est, necessarium est, ut etiam magis pec-
 cet, aliòquin iniusta leges essent. Sed qui magis in re
 aliqua peccat, maius peccatum committit: non igitur
 paria sunt peccata. Sed, inquis, nos in vita non que-
 cuiq; peccato poena sit, sed quantum cuiq; liceat, spe-
 ctare debemus. Quare Cicero? nullam enim rationem
 video, cur ea quae grauius vindicantur, non maiora
 scelera existimem: affer ergo rationem. Sed nulla est.
 Vis igitur ut tanquam oraculis quibusdam tuis effatis
 sine ratione credamus? saltem aliquam rationem ine-
 ptam, falsam, excogitasses, ne planè nobis illudere vi-
 dereris. Nò debemus spectare, quae cuiq; peccato poena
 sit? cur? Nescio, inquit: peto ut hoc mihi credas. An
 non te pudet Cicero, ea quae nemo cōcesserit, tanquam
 axiomata quaedam omnibus nota sumere, ut verita-
 tem subuertat? An te praeterit, nihil omnino turpius
 esse, quam sine ratione verba profundere? imò verò
 solent

solent omnes, contra istam sententiam tuam, quæ cuiq;
 peccato pœna sit spectare: atq; ex ea de peccati gra-
 uitate, vel leuitate, iudicare. Sapientissimi enim legû-
 latores, & maiores, & minores pœnas delictis irro-
 garunt, ut rectam proportionem obseruarent: maiora
 enim peccata maioribus pœnis, minora minoribus
 vindicari iustissimū est. Sed, inquit, quicquid nō opor-
 tet, scelus esse: quicquid non licet, nefas putare debe-
 mus. Esto ita, ut quicquid contra honestatem perpe-
 tratur, peccatum sit, & nulli penitus peccare liceat,
 ut in minimis etiam rebus à peccato cauendum sit:
 hæc sanè omnia concedimus, quoniam & Socratica,
 et vera sunt. Sed ex his confici, ut omnia peccata sint
 equalia, nullo modo uolumus: quoniam nulla ratio est
 omnino, quæ nos id credere compellat: quin potius plu-
 rimæ sunt, quæ nos in contrariam sententiam addu-
 cant. At nobis histrionis & Poëtæ similitudinem
 adducis, qui exhibantur, & exploduntur, cum in vna
 syllaba peccauerint. Quid tum? concedam enim etiam
 ciuem accusari, atq; reprehēdi debere, qui in re quam-
 uis leui peccauerit. Sed erit ne ideo confectum, ut tan-
 tundem peccet, idemq;,, (ut ait Horatius)

Qui teneros caules alieni fregerit horti,

Et qui nocturnus diuum sacra legerit?

Sed huic tandem paradoxo coronidem imponamus,
 quod ita concluditur à Cicerone: Quicquid peccatur,
 perturb

perturbatione peccatur rationis, atq; ordinis: perturbata autem ratione semel, atq; ordine, nihil potest addi, quo magis peccari posse videatur. Qua in conclusione duo sunt effata, quorum neutrum à Cicerone confirmatur: sed illud primum concedimus, Quicquid peccatur, rationis perturbatione peccari: nihil est enim aliud peccatum, quàm quedam à ratione digressio: sed omnes animi perturbationes rationem quodammodo impediunt, et peccandi causam præbent. Verùm illud secundum omnino falsum est, Quòd perturbata semel ratione, nihil addi possit; quo magis peccari posse videatur: sunt enim & grauiore, & leuiore animi perturbationes, quod omnes Philosophi tradunt, atque etiam pluribus in locis Cicero testatur, & ipsa nos experientia, rerum omnium magistra, docet: videmus enim homines et leuiter, & grauius irasci, interdum parua, interdum magna cupiditate trahi: neq; dubiũ esse potest, quin leues perturbationes leuiter etiam rationem impediãt, graues verò grauius. Sed cum animi perturbationes peccatorum causæ sint, necessariò sequitur, vt grauior perturbatio, grauius etiam peccatum pariat, leuior autem leuius. At verò si plures ad vnum aliquod facinus causæ concurrant, quod fieri facile potest: hoc est, si quis pluribus animi perturbationibus commotus in aliqua re fuerit, necessariò fit etiam, vt in ea grauius peccet: vt si quis fortè filius

improb

improbis, molestū patrem habeat, qui nulla in re sibi indulgere velit, eum primò fallere incipiet, deinde si pater eum verberibus afficiat, etiam odisse incipiet, quòd si nullas à patre pecunias habere possit, quas arbitratus suo profundat, patris mortem concupiscet, neq; tamen fortasse offendet: quod si pater eum domo expellat, aut exhaeredet, quoniam rectè se gerere nolit, tunc incipiet de parricidio cogitare: deniq; si qua alia causa grauis accesserit, quæ ad furis scelesti illius filij animum impellat, quacūq; ratione poterit patrem interficere conabitur. Quid ergo? perturbata quidē erat ratio iuuenis illius, cū patrem fallere atq; odisse cœpit: sed non tamen vsq; eò, ut illum interficere veller: alie deinde perturbationes multæ, atq; graues accesserunt, quæ tandem scelestum filium ad parricidium impulerunt. Nequaquam igitur verum esse potest, quòd perturbata semel ratione, nihil addi possit, quo magis peccari posse videatur: nisi quis tam demens sit, ut par scelus esse putet, patrē fallere, atq; eundem interficere. Sed iam tempus est, ut ab hac disputationis parte discedamus, quoniam omnia Ciceronis argumenta dissoluta sunt: in quibus ideo fui longior, quoniam videbatur hoc in capite sibi multum Cicero placere, cū à Philosophis ea sumpsisse argumēta se prædicet, et Socratem ita disputare solitum affirmet. Sed cū perspicuum sit, nihil ab eo verè, nihil acutè conclusum,

clusum, qua reliqua mihi sunt, longè faciliora videbuntur. Restat enim ut ostendam, neq; Socraticam, neq; veram hanc esse sententiam. Neq; enim unquam Socrates, neq; Plato paria dixit esse peccata: & ipsa ratio, atq; veritas longè aliter nobis dictat. Quod autem inter peccata multum inter esse, atq; alia maiora, alia verò minora Socrates esse velit, infinitis penè in locis apud Platonem perspicui potest. Sed ne nimium longa sumatur oratio, paucis contentus ero. Ac primo in postrema Phædonis parte planissimè hoc Socrates demonstrat: ubi ostendit, peccata quædam esse sanabilia, quæ scilicet minora sunt: quædam autem insanabilia, quæ maxima sunt. Et eos, qui propter magnitudinem scelerum insanabiles sunt, qui vel sacrilegia multa & magna, vel cædes iniquas, vel alia horum similia perpetraverint, in Tartarum mergi, unde nunquam egrediantur: eos verò qui sanabilia peccata commiserint, aliquando liberari. Eadem ferè in postrema Gorgiæ parte repetit, ubi tradit, Tyrannos, & reges, et civitatum gubernatores, acerbissimis, gravissimisque poenis omni tempore cruciari. Quippe cum (inquit) hi ob ipsam peccandi licentiam gravissima prophanissimaque peccata committant. Videtis ne ut Socrates peccatorum gradus constituat? & alia sanabilia, alia insanabilia, alia levia, alia gravissima dicat esse: quòd si paria esse putasset, nunquàm hæc ita profectò dixisset:

nam

nam in eodem Gorgia dicit, Iniustitiam peccatorum omnium esse grauissimam. Quare necessario concludi ex Socratis sententia potest, alia omnia esse leuiora, atq; ideo non equalia. Quamuis autem hæc ad ostendendam Socratis & Platonis sententiam sufficere videantur, tamen ut res etiam manifestior euadat, alia quedam ex Platonis legibus addere constitui. Nono igitur de legibus libro, ita loquitur hospes Atheniensis, qui Plato est: ut quisquis iniurias, siue paruas, siue magnas commisit, corrigatur, à lege. Auditis ne paruas, & magnas iniurias? Eodem in loco tres peccandi primas causas ponit, Iracundiam, Voluptatem, Ignorantiam. Deinde ignorantiam bipertito distribuit, & aliam esse simplicem ait, aliam verò Duplicem: Simplicem quidem leuium peccatorum esse causam: Duplicem verò vocat, quando non ignoratione solum quispiam detinetur, sed etiam sapientiæ opinione inflatus, quæ omnino ignorat, ea se scire prorsus existimat. hanc ait, si robur, viresq; consecuta, fuerit, ingentium, turpissimorumq; scelerum causam esse. Decimo verò de legibus libro, quinq; peccatorum genera constituit, quorum ea maxima omnium dicit esse, quæ in Deos & res sacras publicas committuntur: Secundo loco ponit, quæ in patriam, & sacra priuata, atq; sepulchra: Tertio, quæ in parentes: Quarto, quæ in magistratus: Quinto, quæ in ciues aliquos, atq; homi-

nes priuatos perpetrantur. Hæc est Socratica doctrina, de peccatorum magnitudine, & paruitate: quam cum Cicero vel non aduertisset, vel non meminisset, ausus est literis mandare, Socratis fuisse sententiam illam, quã ab insanis Stoicis didicerat. Sed profectò verissimum illud est, quod his versibus scribit Horatius:

Quis paria esse ferè placuit peccata, laborant

Cum ventū ad verū est, sensus, moresq; repugnāt,

Atq; ipsa utilitas iusti propè mater, & æqui.

In hac igitur veritate requirenda, quæ disputationis huius tertia atq; vltima pars est, nullum alium mihi autorem, quàm ipsum Ciceronem libentius assumam, vt ipse contra se ipsum testimonium dicat. In omni enim iniustitia permultum interest, inquit ipse Cicero de Officijs primo, vtrum perturbatione aliqua animi, quæ plerunq; breuis est, & ad tempus: an consultò, & cogitata fiat iniuria. Leuiores enim sunt ea, quæ repentino aliquo motu accidunt, quàm ea, quæ meditata, & preparata inferuntur. Videtis ne, quanta vis sit veritatis? vt sese contra calliditatem hominum facillimè defendat? Quid ais Cicero? leuiores sunt peccata, quæ repentino aliquo motu accidunt, quàm ea quæ meditata, & preparata inferuntur? Sic est. Ergo ex peccatis alia leuiores, alia grauiora: quomodo igitur paria sunt? Repugnant enim hæc inter se omnino, vt paria peccata sint, & alia

k leuiores

leuiora sint, alia grauiora. Vel igitur hoc in loco falsum defendis, Cicero: vel in officijs falsa doces. Sed ea, quæ à te traduntur in officijs, vera sunt: quoniam & cum Socrate, & cum ratione maximè conueniunt. Igitur hoc falsum est. Idem Cicero, eodem libro Panetium reprehendit, qui triplicem tantùm consilij capiendi deliberationem statuit: quarum prima est, cùm honestum ne factu sit, an turpe dubitamus, id quod in deliberationem cadit: altera, cùm utile ne sit, an inutile: tertia, cùm pugnare videtur cum honesto id quod videtur utile. Nec enim solùm, inquit, utrum honestum, an turpè sit, deliberari solet: sed etiam duobus propositis honestis, utrum honestius: Itemq; duobus propositis utilibus, utrum utilius. Ita quam ille triplicem putauit esse rationem, in quinque partes distribui debere reperitur. Hæc certè Ciceronis ipsius verba sunt, ut non dubitandum sit, quin longè aliter ipse senserit, quàm quod hoc in Paradoxo probare conatus est: atque hoc ioci tantùm gratia fecisse videri posset: nisi addidisset, hæc Paradoxa Socratica esse, atque verissima, quod utrunque maximè falsum est. Sicut enim aliquid est honesto honestius, ita etiam turpius: ut si honestum sit amicum tueri, sed honestius patriam seruare: ita etiam turpe est amicum deserere, sed longè turpius patriam prodere. Rursum in postrema primi de officijs parte, Sapientiam illam,

illam, quam Græci Σοφίαν vocant, principem omnium virtutum esse dicit : & id officium, quod à communitate ducitur, hoc est à iustitia, cæteris omnibus anteponendum ostendit. Ex quo facillè potest intelligi, iustitiam longè maiorem esse virtutem quàm reliquæ sint : atq; ita fiet, ut iniustitia, quemadmodum Socrati placere diximus, sit omnium peccatorum maxima, neque ullo modo cæteris vitijs æquiparanda. Quin etiam in ipsa iustitia, in qua continetur Deorum atq; hominum communitas, & societas ipsorum inter ipsos, sunt gradus officiorum, inquit Cicero, ex quibus quod cuique præstet intelligi possit : ut prima Dijs immortalibus, secūda patriæ, tertia parentibus, deinceps gradatim reliqua reliquis debeantur. Quibus ex rebus breuiter disputatis intelligi potest, duobus propositis honestis, aliud alio honestius esse posse : atque eodem modo duobus propositis turpibus, aliud alio posse turpius esse. Quod idem est, ac si quis dicat, aliam virtutem alia maiorem esse : et peccatum aliud, alio maius.

Hæc cum dixisset Antonius, illud addidit, Hæc sunt, quæ pro collecta mea vobis affero : quæ si fortasse vobis horridiuscula visa sunt, quàm expectabatis, ignoscite : non enim alios fructus Stoicorum dumeta, ad quæ me compulit Cicero, producunt. A te verò Cardane, atq; ab Octauiano, & Constantino, longè politiora, atq; ornatiora expectamus. A me verò,

inquit Cardanus, qui iampridem medicam artem exerceo, neque has humaniores literas amplius attingo, vel certè rarissimè. Sed tamen quid possim experiri, quoniam inter nos omnia licet. Tunc Marcus: Tempus mihi videtur, inquit, ut etiam ventri satisficiamus, qui iamdudum obstrepat, & indignari quo tammodo videtur, quòd animum tantum oblectemus, sui verò non meminerimus. Scitum est enim illud Catonis Censorii, qui cum legem agrariam dissuasurus esset, orationem suam sic exorsus est, ut diceret, Arduum esse, ad ventrem verba facere qui auribus careat: & Seneca, Venter, inquit, præcepta non audit, poscit, appellat. Ut placet, inquit Cardanus: Verum scitote, sumpto prandio non satis esse salubre statim disputare atque mentem agitare, nisi de rebus tantum iocosis, & facilibus agatur. itaque totam hanc disputationem in pomeridianam horam, quousque sol a occasum spectet, reijciamus: & interim unà vivamus, non eo modo, quo Lucilius eo carmine præcipit,

Vivite Lurcones, comedones, vivite ventres.

Sed eo modo, quem Cato maior apud Ciceronem his verbis dilaudat: Bene enim maiores accubationem epularem amicorum, quia vitæ coniunctionem haberet, Conivivium nominarunt: melius quàm Græci, qui hoc idem tum *Compotationem*, tum *Concoenationem* vocant.

vocant. His dictis exurreximus, ut ad paratum iamdudum prandium veniremus: sed inter eundum, Cuius, inquit Antonius, partes erunt hodie disputandi? scire enim aueo, quis mihi successor futurus sit.

Quis alius, inquit Marcus, quàm hic Cardanus noster, cuius tanta facilitas est, ut nō dubitem, quin hanc dicendi provinciam libentiſſimè suscepturus sit, cū præſertim hoc ultro ipse pollicitus sit. Cras deinde duos hos mihi chariſſimos cōmilitones audiemus: manè Octavianum, vesp̄ri verò Constantinum.

M. ANTONII MA-
IORAGII ANTIPA-
RADOXON LIBER
QUARTVS.

*

PLACVERAT omnibus Marci ſententia, diſputationisq; diſtributio, cū lauti, atq; alacres vnà diſcubuimus, & varijs iocis, atque fabellis noſmet in eo conuiuiο mirificè delectauimus: cū tamē nihil à quo quam dictum fuerit, quod non ad eruditionem aliquo modo pertinere videretur. Itaque non ita multò poſt, quàm remota fuerunt epulae, cœperunt adoleſcentes ex Antonij diſputatione quedam repetere, quæ acutè

conclusa videbantur, & ad cœlum ea tollere: nonnulla etiam quæ defendi à Cicerone facillè possent dicere: nam Antonius ipse, & Cardanus, cum horam fere unam à prædio nobiscum fuissent, inter se nescio quid colloqui discesserant, vel ad cōmentandum, vel certè ad meridianum. Marcus autem quasi ludibundus ponere quæstiones iussit adolescentes de verbis, & dicendi generibus, atq; locutionibus, quæ apud Ciceronem legerentur, & quæ non: seq; ad omnia paratum esse respondere ostendit. Certatim igitur & Franciscus, & Octavianus, & Constantinus alternis interrogabant. Ego autem incredibilem animo voluptatem capiebam, cum Marcum meum viderem promptissimè non tantum ea reïcere, quæ Ciceronis non essent: sed etiam memoriter loca plurima citare, in quibus aliter Cicero locutus fuisset: quæ verò Ciceronis erant, ita accipiebat, ut statim ostenderet, quot modis illis, & quibus in locis eleganter Cicero uteretur. Itaq; tres amplius horas in ea re iucundè transigimus, donec Antonius & Cardanus redierunt: Et paratus sum, inquit Cardanus, cum me symbolam meam proferre volueritis: sed, ut verum fatear, hic tam immensus calor mihi molestus est: velim igitur, si fieri posset, ut in opacum aliquem locum, ubi spiraret aura, concederemus. Quam vellem, inquit Marcus, ut in Gynæceum ingredi possemus, in quo locus
quidam

quidam tam amœnus & iucundus est, ut ne antro quidem illi Nympharum cedat, quod multis carminibus ab Homero describitur. Sed vereor, ne secum mater eius loci claues in urbem attulerit, et statim quandam ad sese vetulam vocari iussit, quæ clauium custodiam habere consueverat: quæ cum tremulo capite se Gynecei claues habere annuisset, lati omnes eam secuti sumus. Quò postquam peruenimus, Dii boni quæ locum, quæ cœnationem, quàm aspectu delectabilem, quàm amœnam, quàm leni aura undiq; perflatam reperimus? erat enim opere quidem testudineo atq; fornicato constructa, sed ab omni parte ianuis atq; fenestris aperta, pavimento vermiculato, lacunari verò fulgentissimo, & varijs interlucente auro picturis distincto, parietes quadratis quibusdam partibus candidissimi, sed crebris atq; auratis columnis, variaq; pictura quasi striatis distinguebantur: quarum fastigia capitulis, atq; methopis ornata erant: verum cū ipsius lacunaris pictura, quadam quasi trabe perpetua atq; inaurata coniungebantur. Stylobatæ verò non ad pavementum usq; pertingebāt, sed erat quasi spiræ quædam variè picta, quæ ab inferiori parietum parte totam cœnationem cingebat, supra quam ad pictoris libramentum stylobatæ collocati fuerant. Fenestræ autem ita constructæ fuerant, ut alteram altera respiceret, ut ex omni parte perflari tota cœnatio facillimè

posset : ab ima verò fenestrarum parte marmorea sedilia consurgebant , in quibus coccinei atq; serici puluini erant appositi. extra cœnationem quaque versus humiles quædam atq; frondosæ arbores consitæ erant, quæ tamen ad cœnationis fastigium exurgerent , & omnem solis impetû penitus arcerent. In medio mensa erat pulcherrimo tapete constrata, circa quam undiq; visebantur coccineæ cathedræ, scabellâq; variè depicta, quibus in omnibus hæc erat inscriptio , quâ Marcus apponi iusserat , PRVDENS MVLIER FAMILIÆ CLAVVS. Quid multa? nympharum omnino domû diceres: nam in ea Marci mater lectissima fœmina Brigida , atq; eiusdem Marci soror doctissima , atque pudicissima Hippolyta , cum alijs honestissimis matronis plerumq; æstiuam auram captare cõsueuerant. Hunc igitur locum postquam Cardanus vidit, vehementer admiratus Vereor (inquit subridens) Marce , ne hic locus tam venustus, & ornatus, nos potius inuitet, vt aliquid de Amore, & de iucundissima mulierum consuetudine loquamur, quàm vt institutam disputationem perficiamus. Itaq; tua culpa sit Marce, si me tam acrem disputatorem, vt sperabas, hodie nō audieris, quem enim ferum atq; trucem animum locus iste non emolliat? Verum si libet, sedeamus, & (vt ait Poëta) quod nunc instat agamus. Hic omnes confedimus, & ad Cardanum conuersi

conuersi quæ dicturus esset expectabamus. Tum ille,
Nunquam profectò fore putassem, adolescentes opti-
mi, ut in Ciceronem coram vobis quodammodo mihi
declamandum, atq; dicendum esset. Sed quoniam ita
usu venit, ut vobis aliter satisfacere nō possem, omnē
saltem diligentiam adhibebo, ut apertissimè intelli-
gatis, & errasse grauissimè Ciceronem, & absurdis-
simè in hoc quarto Paradoxo disputasse. nam post-
quam à vobis (ut scitis) à prandio discessi, petiui ab
Antonio, haberet ne secum Ciceronis illud volumen,
in quo Paradoxa reperiuntur: qui cū ē Marci bi-
bliotheca se illud manè prompsisse diceret, accepi, &
totum illud caput quartum, de quo mihi disputandum
esse intelligebam, perlegi. Sed prò Dij immortales,
quàm mihi inepta visa est eius disputatio, quàm ab-
surda, quàm à veritate aliena: ut ne verbum quidem
in ea mihi esse visum sit, quod ad propositam quæstio-
nem facere videatur. Cū enim se proposuisset osten-
dere velle, Stultos omnes insanire: quod nequaquam
Socratis, ut ipse falsò asserit, sed Stoicorum potius de-
cretum est: expectabam sanè auidius argumenta ali-
qua, quæ refellerem, & falsa esse ostenderem: quippe
qui præclarè intelligerem, ipsam propositionem esse
falsam. Sed prò Deūm hominumq; fidem, quantopere
me fefellit expectatio mea: nam ne vnum quidem ver-
bum in toto capite reperi, quod cum ipsa inscriptione

conueniret : quod non tantum mihi , sed omnibus mirum videri debet. Itaq; prius ipsius Ciceronis verba (quid enim dicam argumenta, cum in toto capite nullum sit?) excutere, atq; refellere decreui. Deinde, propositum hoc neq; Socraticum esse, neq; verum, ostendam. Nam, audite obsecro diligenter quo modo procedat Cicero, primò conclusionem hanc proponit, Omnes stultos insanire: quæ nulla penitus ab eo ratione probatur. Deinde Clodium insanum esse ostēdit, ut omnino nobis illudere velle videatur. Itaq; urgendus est à me diligenter. Quid ais Cicero? Omnes stulti sunt insani. Audio : sed qua de causa? Quia Clodius est insanus. O mirabilem argumentationem. Ergo quia Clodius est insanus, ideo sequitur, ut omnes stulti sint insani? Quis te hoc genus argumentationum edocuit? est'ne hic modus disputandi, quo Socrates uti solebat? Audi quid valeat ista tua argumentatio. Si dixero ego, Philosophi omnes summum bonum in voluptate ponunt: & aliquis inficietur, petatq; à me ut hoc probem, atq; ego ita respondeam: Epicurus summum bonum in voluptate statuit, ergo omnes Philosophi idem sentiunt. An non putabit ille se à me derideri? qui quod in vno Philosopho, aut in aliquibus est, id omnibus attribuam? Quid ergo? non'ne vides Cicero, tuum hoc argumentum nihil ab eo differre? & nihil te pudet isto modo disputare? Quid, quod nihil in toto capite præter hoc

hoc primum dicis, quod ullo modo possit, vel benè vel malè cum proposita questione convenire? nam postea disputas, Romam non fuisse civitatem, quo tempore tu expulsus es: sed tunc demum fuisse civitatem, quando te revocavit: perinde quasi tu civitatem tecum abstuleris, atq; eandem tecum retuleris. sed cur non erat civitas Roma Cicero quo tempore tu pulsus in exilium fuisti? an quia te talem disputatorem amiserat, qui quoniam Clodius insanus erat, probare contenderes, omnes qui perfectam sapientiam adepti non sunt, quia stulti adhuc sunt, insanire? magna verò iactura propter quam Roma civitatis nomen amitteret. Sed libet aliquas huius capituli clausulas sigillatim examinare, ut apertè intelligatis, id esse verum, quod initio dixi, ne ullum quidem esse verbum quod ad propositum attineat. Ego verò, inquit, te non stultum, ut sepe, non improbum, ut semper: sed dementem, & insanum rationibus addicam necessarijs. Dic mihi Cicero, quæ causa fuit immutatae tue voluntatis? cur quem sepe stultum, semper improbum appellasti, nunc insanum potius appellare vis? aliquid omnino subesse oportet, quod te ista proferre compellat. Quæ tandem sunt istæ rationes necessariae, quibus insanus ille tuus inimicus dici debeat? equidem neq; causam ullam, neq; rationem, à te proferri video, cur ei nomen immutari oporteat: Tuo igitur arbitrio, sine ratione, nomina fingis?

hoc

hoc sanè modo posses eum Regem, posses Tyrannum; posses Deum appellare, cum nullam nominis eius probationem afferas. Sed mauius insanum appellare: cur obsecro te? Quia omnes stulti insaniunt. Proba igitur hoc mihi, non enim ita facilè credo, nisi rationes aliquas prius audiuerò. Verùm nulla est ratio, nullum argumentum: sed tanquam oraculum è tripode proferitur, Omnes stultos insanire, quod ideo nobis credendum est, non quia probetur à Cicerone, sed quia ipse dixit. Ego verò nequaquam ita credulus sum: perscrutari volo cetera ut tandem videam siquam huius conclusionis probationem ex Ciceronis verbis elicere possim. Sapientis, inquit, animus magnitudine consilij, tolerantia rerum humanarum, cōtemptione fortunæ, virtutibus deniq; omnibus ut mœnibus septus, vincetur & expugnabitur, qui ne ciuitate quidem pelli potest? Intelligo: rectè declamas Cicero, rectè sapientem laudas, scio te bonum esse Rhetorem, sed nunc non erat his opus: non enim id hoc tempore agimus, quàm belle tu declamare scias, aut quàm fortis sit, aut quibus laudibus dignus vir sapiens: non hoc loco quærimus, utrum vinci atq; expugnari possit sapiēs, nec ne: non est questio, utrum sapiens è ciuitate pelli possit: seruentur hæ quæstiones in aliud tempus, quoniam nihil ad propositum faciunt: nunc, obsecro te, proba quod proposuisti: nisi fortè hoc argumento probasse te putes, Sapiens quia

quia virtutibus omnibus, ut mœnibus septus est, neque
vinci, neque expugnari potest, neque etiam è ciuitate
pelli: ergo omnes stulti insanunt. Hôccine tibi vide-
tur esse confectarium? non hercle magis, quàm si quis
ita argumentetur, Animantes omnes quia mouentur,
& cum libet locum mutant, radices non habent, ergo
omnes arbores ficus ferunt. Quid enim simile habet
sapiens cum insano? Tuum istud argumentum for-
ta se probaret aliquid, si te proposuisses ostēdere velle
stultos omnes vinci, atque expugnari, & è ciuitate pelli
posse. sic enim à contrario procederet argumentatio:
Sapiens neque vinci, neque expugnari, neque è ciuitate
pelli potest: ergo quicumque vincuntur, & expugnan-
tur, & è ciuitate pelluntur, stulti sunt. hoc certè con-
sequens esset si prius illud effatum verum sit, utrum
autem vinci possit, aut è ciuitate pelli vir Sapiens, vi-
deris ipse Cicero, qui te sapientem profiteris, & tamen
victus, atque expugnatus, et è ciuitate pulsus es. Equi-
dem hanc questionem nihil ad institutam disputa-
tionem facere video. Quid enim prodest scire, utrum
sapiens vinci possit, ad hoc ut intelligas, omnes stultos
insanire? Fateor me nō esse tam acutum, ut argumen-
torum id genus vim penetrare possim: & qui totam
Aristotelis logicam, & legendo, & interpretando,
& etiam publicè docendo sepius contriui, & quasi
per dissectionem quādam singulas eius partes apertas
vidi,

vidi, nunquam tamen tale genus argumentationis ob-
seruavi: neq; etiam apud Platonem vidi quenquam,
qui hoc modo disputaret. Prò bone Iupiter, quid hoc
argumenti est, Sapiens vinci non potest, ergo omnes
stulti insaniunt? Sed reliqua rideamus. Quæ est enim,
inquit, ciuitas? omnis ne conuentus ferorum, atq; im-
manium, omnis ne etiam fugitiuorum, ac latronum
congregata vnum in locum multitudo? Certè negabis.
Negabo: quid deinde? quis à te petit vt ciuitatem hoc
loco definias? Non hoc à te querimus Cicero, vt ex-
planes nobis, quæ sit ea, quæ verè ciuitas appelletur:
sed expectamus vt id probes, quod proposuisti, Stultos
omnes insanire. Quid enim mihi prodest scire, vt
fugitiuorum ac latronum congregata vnum in locum
multitudo sit ciuitas nec ne, ad hoc vt sciam, an stulti
insaniant? Habeas per me sanè hæc omnia quæ dispu-
tari, & refelli possunt, viceris in hoc Cicero, quoniam
nihil ad rem propositam facit, non sit ea ciuitas in qua
leges nihil valent, in qua iudicia iaceant, in qua mos
patrius occiderit, in qua ferro pulsus magistratibus,
Senatus nomen non sit. Non sit (inquam) ea ciuitas,
sit potius prædonum concursus, & latrocinium: quid
hæc tibi, quæso, prodesse possunt ad tuæ cōclusionis ap-
probationem? Non enim video, quamuis concursus
prædonum non sit ciuitas, cur omnes stultos insanire
existimem. Sis ergo copiosus in verbis, valeas plurimū
in ling

in lingua volubilitate, fundas tota nugarum plaustra, modò intelligas, te nihil tot ambagibus concludere. At pulsus, inquit, ego ciuitate non sum, quæ tum nulla erat. Quid (malum) hoc ad me? quid est cur ego querere debeam utrum ciuitate pulsus sis, nec ne? de hoc ipse videris, qui cùm in eam calamitatem incidisses, tam abiecto et fracto animo fuisti, ut omnes tuam sapientiam desyderarēt. Non igitur ego quero, utrum Roma, quo tempore tu pulsus es, ciuitas fuerit, nec ne: quoniam hoc nihil ad versum, ut aiunt: sed quero, utrum omnes stulti insaniant, quemadmodum proposuisti. Accersitus sum, inquit, in ciuitatem, cùm esset in Repub. cōsul, qui tum nullus fuerat, cùm esset Senatus qui tum occiderat. Rursus ad ineptias redis. Mitte tandem de te loqui, & de re ipsa loquere. Quid enim hoc ad me, utrum in ciuitatem accersitus sis, an non? noli ista tua tantopere iactare: scimus quo te modo gesseris: recordare quid probandum suscepis, et illud tandem nobis explica. Sed verba fiunt mortuo, nihil audit Cicero, nihil intelligit. Sed pergit ineptire, & seipsum laudare, atq; extollere: nam se cum inimico suo Clodio comparat, & sapientem se esse probare contendit, illum verò dementem. Quæ omnia, quantum à proposita questione sint aliena, neminem vestrum esse opinor, quin intelligat. Quid enim prodest ad sciendum an omnes stulti insaniant, quòd Cicero
iactam

iactam et immissam à Clodio nefariam esse iniuriam
semper duxerit, peruenisse tamen ad se nunquam pu-
tarit? aut quòd cum Clodius Ciceronis parietes distur-
bat, aut cum tectis sceleratas faces inferebat, suo-
rum aliquid ruere, aut deflagrare arbitraretur? quis
tam rerum ignarus est, ut hæc non videat ab hac di-
sputatione longè esse aliena? Quid illud quod addit,
Nihil neq; meum est, neq; cuiusquam, quod auferri,
quod eripi, quod amitti potest. Quid tandem hæc tam
pulchra, tamq; vera sententia potest ad hoc, ut omnes
stulti insaniant? Quid quòd probare contendit, à Clo-
dio se nequaquam iniuriam accepisse: quoniam nō sibi
Clodius diuinam animi sui constantiam, nō curas, non
consilia, non mentem eripuerit? quo tandem hæc modo
cum quæstione proposita conuenire possunt? Profectò
aut ego nullam differendi rationem intelligo, in qua
tot labores & vigilias consumpsi: aut hoc in toto ca-
pite Cicero ipse egregiè insanit, dum omnes stultos in-
sanire per hæc quæ commemorat, probare se opinatur.
Sed nimium amor ille sui, qui non sine causa cæcus esse
dicitur, eum decepit. Quàm enim sibi placet, quātum
glorietur, quibus verbis suam sapientiam amplificat
hoc in loco: ut mihi quidem videatur quadam rerum
suarum dulcedine atque iocunditate captus, non satis
aduertisse, quid, aut quo modo diceret. Nam si quis re-
ctè consideret, nihil aliud in toto hoc Paradoxo repe-
riet

riet à Cicerone concludi, quàm, Ego sapiens, Clodius
 insanus: Ego ciuis, Clodius exul. Quare si quis esset
 paulò proteruior, qui Ciceroni vellet illudere, rectissi-
 mè posset huius capitis inscriptionem immutare, ut
 quæ nunc ita apponitur: Omnes stultos insanire.
 Ita ab eo conuersa, atque mutata poneretur: Cicero-
 nem esse sapientem & ciuem, Clodium insanum &
 exulem. Nam hæc omnino verior esset inscriptio, quo-
 niam nihil aliud probare conatur: quamuis etiam hoc
 imperitè faciat. Quid enim aliud hæc verba volunt,
 Ergo ego semper ciuis eram, & tum maxime, cum
 meam salutem Senatus exteris nationibus, ut ciuis
 optimi, commendabat: tu ne nunc quidem es ciuis, nisi
 fortè idem & ciuis, & hostis esse potest. Deinde
 ita progreditur ad finem vsq; , ut nihil aliud omnino
 dicat, quàm Clodium, & omnes impios, & scelera-
 tos, non ciues, sed exules esse. Quid autem opus est
 ut eius verba recenseam, in quibus tantum Clodij sce-
 lerata commemorat, & suum illud exilium, non exi-
 lium fuisse dicit? quamuis enim pluribus & grauibus
 verbis in Clodium inuehatur, tamen illud affirmo, ne
 vnum quidẽ ex tot verbis esse, quod ad primam qua-
 sitionem attineat. Quin etiam illud maxime ridiculũ
 mihi videtur, quòd cū proposuisset, Omnes stultos in-
 sanire, tandem concludit, Clodium non esse ciuem, sed
 exulem: quo quid ineptius dici, aut excogitari potest?

l longè

*longè enim hoc turpius est, quàm id quod reprehendit
Horatius:*

— Amphora cœpit

Institui, currente rota cur vrceus exit?

*Inuitus quidem feci, ut ita Cicronem deriderem. Sed
quid facerem, cùm tam absurdè disputare videatur?*

*Nunc, quoniam satis ostendimus, nequaquam à Ci-
cerone probatum esse, quod ab eo propositum fuerat,
nempe Stultos omnes insanire, videamus, an contrà
probare nos possimus, conclusionem hanc à Socratis
sententia penitus abhorrere, & omnino falsam esse.
Qua igitur potissimum ratione confirmare poterimus,
Socratem in ea sententia minimè fuisse, ut existima-
ret, Stultos omnes insanire? an non si ipsum aperte
clamantem, & clarissima voce testantè, nequaquam
eos qui stulti sunt, etiam omnes esse insanos, induca-
mus? Hic nulla circuitione verborum opus est, nullis
argumentis, nulla inductione. Socratem ipsum aperte
Ciceroni contradicentem, atq; illi mendacij notam im-
pingentem audite: nam in eo Dialogo, qui secundus
Alcibiades, vel de supplicatione, seu de voto inscribi-
tur, cùm dixisset Socrates quosdam esse homines, qui à
Deis immortalibus maxima sibi mala deprecantur:
respondet Alcibiades, eum omnino insanire, qui sibi
mala precetur. Tunc Socrates quasi dedita opera, ut
eos refelleret, qui Stultos omnes insanire dicunt (quod
omnino*

omnino Cicero non aduertit) ita progreditur: Dabitur enim profectò hanc mihi veniam, ut integram Platonis paginam vobis recitem, quò res hæc manifestior euadat: ait igitur Socrates: Insanire non'ne cōtrarium est ei, quod est prudentem esse? ALCIBIADES, Omnino. S O C. An non ex hominibus alij prudentes esse, alij Stulti videntur? A L C. Ita sanè est. S O C. Age ergo videamus, qui nã isti sint. Esse enim quosdam Stultos, quosdam prudentes, alios insanos, inter nos cōuenit? A L C. Conuenit. S O C. Præterea non'ne bene valentes aliqui sunt? A L C. Sunt sanè. S O C. Igitur etiam ægrotantes aliqui? A L C. Haud dubium id quidem. S O C. Non ergo ijdem sunt. A L C. Minimè verò. S O C. Sunt'ne alij quidam, qui neutrum istorum in se habeant? A L C. Nequaquam. S O C. Necesse est enim hominem vel ægrum esse, vel non ægrum? A L C. Mihi quidẽ ita videtur. S O C. Quid autem de Prudentia, atq; Stultitia, num eadem sentis? A L C. Quo modo hoc ais? S O C. Num videtur tibi necesse esse, hominem aut prudentem, aut stultum esse? an aliquid est horum medium, quod hominem neq; prudentem esse, neq; stultum efficiat? A L C. Nõ sanè esse arbitror. S O C. Meministi'ne igitur te confessum fuisse, prudentiæ insaniam esse contrariam? A L C. Memini. S O C. Et præterea nullum esse tertium in medio, quod neq; prudentem esse hominẽ, neq; stultum

l 2 effic

efficiat? A L C. Confessus sum. S O C. Sed qua ratio-
 ne fieri potest, ut uni rei duo contraria sint? A L C.
 Non fieri potest. S O C. Stultitia igitur, atq; insania
 idem esse videntur? A L C. Ita videtur. S O C. Qui-
 cunq; igitur ô Alcibiade dixerint, omnes stultos insa-
 nire, j rectè dicent? A L C. Ita est. S O C. Itaq; si qui-
 dam ex æqualibus tuis stulti sunt, ut profectò multi
 sunt, aut ex maioribus natu, nam per Deum immor-
 talem an non existimas ex eis, qui in ciuitate sunt, per
 quam paucos esse prudentes, stultos autem plurimos?
 Omnes igitur tales insanos appellas? A L C. Omnino.
 S O C. An censes nos inter tot insanos in Repub. secu-
 ros et letos diutius versari posse? quin percutiamur,
 & ejciamur, & ea omnia patiamur, quæ ab insanis
 hominibus fieri consueuerunt? Sed vide vir beate, ne res
 aliter se habeat. A L C. Quomodo sese hæc habent, ô
 Socrates? non enim ita esse videtur, quemadmodum
 ego existimaram. S O C. Neq; sanè mihi videtur ita
 esse, sed hoc fortasse modo considerandum. A L C.
 Quomodo? S O C. Ego tibi dicam. An non aliquos
 ægrotos esse existimamus? A L C. Sine dubio. S O C.
 Nunquid igitur tibi necesse esse videtur, ut quicumq;
 ægrotus est, ille podagra, aut febri, aut lippitudine la-
 boretur? an potius videtur tibi, etiam si nihil horum pa-
 tiatur, alia tamè posse ægritudine laborare? sunt enim
 aliæ multæ ægritudines, non autem hæc solæ. A L C. Ita
 mihi

mihi esse videtur. S O C. Videtur ne igitur tibi lippitudo omnis, esse ægritudo? A L C. Certè. S O C. Nunquid etiam omnis ægritudo lippitudo? A L C. Non sanè mihi: verùm incertus sum quid dicam. S O C. At si mihi mentem adhibueris, & ambo simul cogitauerimus, fortasse inueniemus. A L C. Attendo Socrates pro viribus meis. S O C. Constat igitur inter nos omnem lippitudinem esse ægritudinem, sed nõ contrà: non enim omnis ægritudo est lippitudo. A L C. Constat. S O C. Et rectè mihi sanè hoc dictum videtur: etenim febricitantes omnes ægrotant, non tamen quicunq; ægrotant etiam febricitant, vel podagra, aut lippitudine laborant: sed quicquid est eiusmodi communiter quidem ægritudo, vel morbus dicitur. Differre autem Medici dicunt eorum curationem: non enim omnes aut similes sunt, aut similiter pertractantur: sed secundum propriam vim singuli, cùm tamen omnes morbi dicantur: quemadmodum aliquos opifices esse dicimus. An non ita est? A L C. Verũ. S O C. & cerdones, & fabros, & sculptores, & quàm plurimos alios, quos referre singulos nihil opus est, qui partes opificij sui discretas habent: atq; omnes quidem opifices sunt, non tamen fabri omnes, neq; cerdones, neq; sculptores, sed cuncti generatim opifices. A L C. Ita est. S O C. Eadem quoq; ratione stultitiam inter se distributam habent, & qui maiorem eius partem

consecuti sunt, eos insanos vocamus: qui verò aliquantò minorem, fatui, atq; stolidi dicuntur: sed qui honestioribus eos nominibus appellare volunt, partim quidem magnanimos appellant, partim minimè morosos, alij verò simplices vocant, & imperitos, ac ignorantes, & stupidos. Quòd si querere volueris alia etiam plurima nomina reperies, quæ tamen omnia vno stultitiæ nomine comprehenduntur. Hæc sunt quæ Socrates eo quem citauimus loco de stultitia disputat. Ex quibus intelligi facillimè potest, ita statuisse Socratem, ut Stultitia genus quoddam sit, quod multas sub se species cõtineat, sicuti ægritudo, atq; opificium: Insania verò stultitiæ quædam species sit, quod omnino verissimum est: nam insanos eos tantum appellamus, qui omni ratione postrata, cum impetu quodam cæco atq; temerario omnia faciunt: & etiam qui furiosi sunt, insani dicuntur, ut in Academicis his verbis ostendit Cicero: Quod idem contingit insanis, ut & insipientes furere sentiant, & dicant aliquid quod non sit, id videri sibi. Ita imperiti, & fatui, & stupidi, & imprudentes, & meticulosi, & loquaces, & pleriq; alij, stulti dicuntur, cum tamen insani dici non soleant. Sunt enim plurimæ stultitiæ species ab insania distinctæ. Ipsa verò insania dupliciter in Phædro à Socrate distribuitur: quarum alteram ait esse, quæ ab humanis perturbationibus originem trahit: alteram verò,

verò, quæ à Deis ipsis immittitur, quæ Poëtas & Sibyllas, & Vates afflari putat. hanc in Apologia Enthusiasmum appellat: nostri verò hanc modò furorem diuinum, modò insaniam vocant: vnde Poëtas insanos appellare consueuimus, & Sibyllam insanam, vt *Æneidos* tertio *Vergilius*,

*Insanam vatem aspiciens, quæ rupe sub ima
Fata canit.*

Sed huius insanie causam atq; originem *Aristoteles* in problematibus non Deo tribuit, sed nature melancholicæ: probat enim omnes ingeniosos melancholicos esse. Quin etiam addit, vt primo de Diuinatione scribit *Cicero*, eos qui valetudinis vitio sunt, & melancholici sunt, habere aliquid in animis præsagens, atq; diuinum, & quia non nisi per insaniam hanc futura prædici censent, factum est, vt apud Latinos interdum vaticinari sit idem quod insanire. Quod pro *Sestio Cicero* docet his verbis: Qui hæc dicerent vaticinari, atq; insanire dicebat. Et in Epistolis: Sed ego fortasse vaticinor, & vtor ætatis vitio. Sed hæc insaniam diuinam, de qua & in *Phædro*, & in *Menonis* extrema parte, & in alijs locis, multa *Plato* disputat, ab omni stultitia remoueri debet. Illa verò quæ ab humanis perturbationibus nascitur, quemadmodum *Socrati* placere ostendimus, stultitiæ pars quedam est: vt omnino cum *Stoicis* grauissimè *Cicero* aberrarit,

qui omnes stultos insanire dicat. Idem est enim, ac si diceret, Omnis pars eadem cum toto est: & Omnis species eadem quod genus. Quod quàm falsum, et absurdum sit, quis tam imperitus est, ut non intelligat? Quis enim manum toti corpori æqualem esse existimet? aut hominem idem esse quod animal? Nihil enim omnino interest, utrum quis dicat, Omnis stultus est insanus: an dicat, Omne animal est homo. Sicut enim animal genus est hominis, ita stultitia genus est insanie. Possem hoc loco ex Medicis nostris multa recensere, quibus ostenderem, quot stultitiæ species reperiuntur, & quibus ex causis oriuntur, & quomodo ab alijs stultitiæ formis insania distinguatur: quod tertio libro de morbis Galenus eleganter & copiosè facit: nisi vereretur, ne me putaretis ab arte mea discedere non posse. Sed certè etiam eiusmodi commemorationem superuacaneam esse video: quoniam mihi satis probatum esse videtur, nequaquam eam Ciceronis conclusionem esse veram, quòd omnes stulti insaniant. Nam si vera sit, etiam omnis stultitia est insania. Sed hoc omnino falsum est: ergo illa vera esse non potest. Unde igitur tantus error Ciceronis originem habuit? Ab eo scilicet, quod in præcedenti Paradoxo disputarat. Cum enim se probasse crederet, peccata omnia paria esse, coepit ita colligere, Profectò rectè sentiunt Stoici: Omnes enim qui peccant, quatenus peccant, stulti

stulti sunt. Sed omnia peccata paria sunt: ergo etiam, ut omnes stulti pares sint, necesse est. Idem ergo stulti sunt & insani. Sed cum iam illud ab Antonio nostro copiosè refutatum sit, & probatum, nullo modo fieri posse, ut peccata sint paria: certè sequitur, ut neq; stulti omnes sint insani. Quàm enim imperitè hoc Stoici faciant attendite. Volunt enim sapientem solum esse sanū, eo quòd nulla penitus animi perturbatione quatiatur. Eum verò, qui non sit sapiens, esse stultum & insanum, quia perturbetur animo, neq; rationem sequatur. Talem autem sapientem, qui nullam omnino perturbationem sentiat, aut neminem esse, aut certè quàm paucissimos inueniri: ita concludebant, Omnes ferè homines stultos dementes, atq; insanos esse. Nos verò, qui Stoici non sumus, & Socratem potius, atq; ipsam veritatem sequimur, quamvis aliquis nondum perfectam sapientiam sit adeptus, non tamè eum stultum, nedum insanum appellamus. Multi enim sunt insipientes, qui non tamen omnino stulti dici possunt: ut ingeniosus puer, & virtutis cupidus, certè non sapiens dici potest, neq; tamen ideo stultus erit: quantò igitur magis ab insania distabit? quæ (ut Socrates ait) maxima stultitia pars est. Siquis autem in aliquos errores prolabitur, stultus ex ea parte sanè dicatur, quatenus peccat: non tamen statim insanus erit. At verò si maxima flagitia vel in Deos, vel in patriam, vel in

parentes perpetravit, tunc insanus rectè poterit appellari: quoniam hoc verbum insanie magnitudinem quandam, atq; immensitatem stultitiae declarat. Ex quo factum est, ut maiores nostri saepenumero verbis hoc insanum, pro magno usurparint: ut Cicero pro Milone, Substructionum insanis molibus oppresserat. Et alibi: Propter insanas illas substructiones, hominẽ mille facillè latere posset. Quòd autem insaniam maiorem quandam vim habeat, & maiorem mentis alienationem significet, quàm Stultitia generaliter sumpta, declarat his verbis in Eunuchò Terentius: Scitum hercle hominẽ, hic homines prorsus ex stultis insanos facit. Vnde miror, quid in mentem Ciceroni venerit, ut imitandorum Stoicorum studio, cùm rem aliter esse intelligeret, tamen etiam in Tusculanis contra veritatem, & quidem longè acrius, quàm hoc loco, disputaret. Ibi enim non ulla sanè firmissima ratione, sed verborum tantum captionibus ostendere conatur, omnem animi commotionem esse insaniam: quam & maiorum suorum, & Socratis sententiam fuisse falsò asserit. Quia nomen (inquit) insanie significat mentis agrotationem, & morbum, idest insanitatem, & aegritudinem animi quam appellant insaniam. Omnes autem perturbationes animi morbos Philosophi appellant, negantq; stultum quemquam his morbis vacare. Qui autem in morbo sunt, sani non sunt: & omnium insipient

insipientium animi in morbo sunt : omnes insipientes igitur insaniunt. Sanitatem enim animorum positam in tranquillitate quadam, constantiaq; censebant, his rebus mentem vacuum appellarunt insaniam, propterea quòd in perturbato animo, sicut in corpore, sanitas esse nò potest. His, atq; huiusmodi nonnullis alijs rationibus, probare se putat Cicero in Tusculanis, nullam esse animi commotionem, quæ non insania dicatur: ut si fortè Plato, aut Xenocrates, aut aliquis alius sapiens, ob illatam sibi iniuriam ingentem paulum ad iram se commouerit, statim ex Ciceronis sententia insanus sit futurus. Sed quid ait ad huius suæ sententiæ probationem Cicero? Totum, inquit, id quod quærimus quid et quale sit, verbi vis ipsa declarat : eos enim Sanos intelligi necesse est, quorū mens motu, quasi morbo, perturbata nullo sit: qui contrà affecti sunt, hos Insanos appellari necesse est. Ita'ne Cicero res ad verba deflectere contendis? sapientium autem rationes & autoritates negligis? Quæ res est, quæ perueriti non possit, si verborum vim, non autem rerum ipsarum naturam spectare voluerimus? Sed sequamur sanè, si ita placet, ipsa verba, quamuis hoc iniquissimum sit, ut ipse pro Cecinna copiosissimè, atq; elegantissimè disputasti : videamus quam vim habeat istud tuum argumentū, Cuius mēs nullo motu perturbatur, ille sanus est: ergo cuius mens aliquo motu perturbatur, insanus est.

Hoc

Hoc quidē consecrarium esse videretur, si tantū illē
sanus esset, cuius mens nullo motu perturbaretur. Sed
cū hoc longē & à sermonis consuetudine, & à ve-
ritate abesse videatur, (quoniā si ita sit, nullus omni-
no mortalium inuenietur, quin insanus sit) non est illa
conclusio concedenda. Quis est enim ex omnibus, cu-
ius mens non aliquo motu moveatur? Erat iracundus
frater tuus (ut accepimus) Q. Cicero: num igitur etiā
insanus, quoniam iracundia est animi cōmotio? Omni-
no tibi Cicero hoc fateri necesse est, qui omnem animi
commotionē insaniam esse putas. Cur igitur nusquam
eum insanum vocas? cū interim Clodij, Catilinæ, cæ-
terorumq; conscleratorum ubiq; insaniam consecre-
ris? Quòd si quis alicuius vel propinqui, vel amici, vel
fratris, vel filij morte doleat, erit ne insanus, quoniam
dolor est animi commotio? Quis hoc ferat, si insanum
(exempli gratia) Catonem dixeris, quod optimi, &
clarissimi viri filij sui morte tristitiam aliquam sen-
serit? An non vides, te non tantū contra omnium
sententiam, sed etiam contra naturam ipsam pugnare?
omnibus enim animantibus (ut primo Politicorum
preclare docet Aristoteles) natura iucunditatis, atq;
tristitiæ vim ingeneravit: neq; alia de causa vocem
eis natura dedit, nisi ut per eam animæ suæ motus in-
dicent. Quamobrem si omnis animi commotio insania
est, pessimè de nobis Deus, ac natura ipsa merita est,
quæ

que nos omnes insanos procreavit: nam omnino voluptas & tristitia, naturales animi motus sunt. Quod etiā in Philebo Socrates multis verbis disputat. Itaq; sublato eo fundamento tuo, quod nullo modo verum esse possit, omnem animi commotionem insaniam esse: vides, reliquas etiam omnes rationes tuas, Cicero, corruisse. Quid ergo, inquires: sanus ne est animus, cum dolet, cum metuit, cum cupit, cum gaudet? omnino si sanitatem mentis in eo constituis, cum nullo penitus motu ab illius sua tranquillitate mouetur animus, non poterit in aliquo dolore, aut metu sanus esse: sed cum in homine mortali nulla unquam huiusmodi sanitas reperiatur, quippe cum hominibus ab ipsa natura, Socrate, Platone, Aristotele testibus, hæ commotiones animi sint ingenerata, stultum est, aut insanum potius, homines insanos ideo iudicare, quoniam Gigantum more cum Deo non præliantur, hoc est nature non repugnant: aut quoniam id non habeant, quod habere nullo modo possunt. Sanus igitur ille est, non qui penitus omni animi perturbatione vacat, quoniam hoc fieri non potest: sed qui ita motionibus animi moderatur, ut obedire consilio, rationiq; possint. Quod si quando aut ægitudine, aut alia aliqua perturbatione tãquam tempestate quatiatur, & necesse sit animo commoveri, non statim insanus efficitur: nisi fortè prostrata ratione, atq; consilio, se totū appetitui tradiderit, neq;
amplius

amplius quicquam de honestate cogitet: tunc enim rectè poterit insanus appellari. Ac mihi quidem videtur, Cicero, cum mentis sanitatem in eo constituit, si nullo penitus motu perturbetur, idem efficere, ac si quis diceret, corporis firmitatem, & valetudinem in eo sitam esse, si nihil omnino corpus patiatur. Quis igitur meritò non rideat, si quis probare se putàret, omnes homines ægrotos esse, atque infirmos corpore, quoniam omnes aliquid in corpore patiuntur, ut famem, sitim, frigus, calorem? Possẽ enim hoc modo argumentari quemadmodum Cicero: Cuius corpus nihil omnino patitur, ille sanus est: ergo quicumq; aliquid patitur, est ægrotus, & infirmus. Sed Hercules famem patitur. Vides ne, ut tibi necesse sit confiteri, Herculem infirmo, atq; ægrotato esse corpore? Eodem modo, si quis in lapidem impegerit, si quis digitum leuiter percusserit, sicui colaphus impactus fuerit: hi omnes, quoniam aliquid corpore patiuntur, hac ratione necessariò dicuntur ægroti. Miseros homines, et calamitosos, qui Ciceronis sententia sunt omnes insani, infirmi, atq; ægroti. Sed vide Cicero, ne tu potius decipiaris, plurimi autẽ homines & sani mente sint, & firmo corpore. Non enim statim ægrotum corpus dicimus, si digitus, aut articulus aliquis indoluerit: sed tunc demum ægrotum dicimus, cum perturbatis humoribus, non amplius se cõmodè sustinere potest, neq; sua obire munia. Eodem modo,

modo, animus non statim insanus dicitur, cum leui aliqua commotione perturbatur, sed cum oppressa penitus ratione, atq; ordine, sine ullo discrimine in omne scelus prolabitur, verè tunc insanus appellari potest.

Itaq; (ut ad primam conclusionem redeam) minimè verum esse petest Stoicorum id decretum, quod hoc loco probare voluit Cicero. Licet enim concedamus, omnem stultitiam animi morbum esse: nò tamen ideo sequi dicimus, ut omnis stultitia sit insania. Multæ sunt enim stultitiæ species, quæ potius ignorantia, quàm insanie dicuntur. Sed ne meum hoc figmentum putetis, audite quid in Timæo de hac re Plato sentiat. Morbum quidem (inquit) animi stultitiam esse concedendum est, sed eius duo sunt genera, Insania & Ignorantia. Quibus ex verbis quis non intelligit, non omnem stultitiam insaniam esse? Nam imperitus quidem homo stultus est, non tamen insanus. Eum qui facile credit, qui facile decipitur, qui imprudenter res suas administrat, stultum quidem dicimus: insanum verò non dicimus. Qui verò propter immensam aliquam cupiditatem, vel dolorem, vel aliam animi perturbationem, quasi furibundus fertur, & impetu quodam scelus anhelando quiescere non potest: tunc ille iure optimo non tantum stultus, sed etiam insanus appellatur. Verum iam tempus est ut vela cōtraham. Non enim cuiquam vestrum dubium esse existimo,

quin

quin à me rectè Cicero reprehensus sit : vel siquid est, quod Maioragius contrà velit dicere, quoniam sapius iam Ciceroni patrocিনatus est, audiamus. An credis (inquam ego) Cardane, me insanum esse : qui cùm omnes vos in vnum Ciceronem Coniurasse videam, tot eruditis viris, & tam acribus in disputando me solùm opponere velim ? Cedam hoc tempore, quoniam ita necesse est : nam tempori cedere semper sapientis est habitum. Sed mihi credite, non diutius istam (quod pace omnium dixerim) proteruitatem vestram inultam feretis. Tunc videns Constantinus, Commotus est, inquit, Maioragius : & certè, si vera est Ciceronis sententia, insanus est : nam omnis animi commotio Ciceroni insania est. Itaque vel ei contra Ciceronem suum sentiendum est, vel si ei credit, insanum se esse fateatur oportet. Fatear (inquam ego) libenter, quoniam insaniæ meæ socios vos omnes habebo : nullus est enim, qui non aliqua in re insaniat. Postquam igitur hæc inter nos acta fuissent, in hortis proximis ad primam noctis horam inambulantes, et multis alijs colloctionibus animum nostrum oblectauimus. Sed antequam cubitum discederemus, data est Octauiano prouincia, ut postridie manè Paradoxum quintum euertere pro viribus aggredideretur.

M. ANTONII MA-
IORAGII ANTIPA-
RADOXON LIBER
QVINTVS.

*



V *M* igitur exorto iam sole tertio die, quo in suburbanum illud animi relaxandi gratia concesseram, Marcus qui à latere meo, quo ad ei licebat, nunquam discedebat, iam ad me venisset, paulò pòst Octavianus & reliqui socij omnes affuerunt. Tum Antonius ad Cardanũ conuersus, Quid est Cardane, inquit, imus ne sessum? non enim tantum te admonitum venimus, sed etiam flagitatum. Imò verò (inquit Cardanus) flagitare nihil opus est me, qui libentissimè sim Octavianum auditurus. Sed hunc fortasse Maioragium non tantum flagitare, sed etiam obsecrare oportet, ut se nobis alacrem hodie præbeat, et æquo animo quæcunque dicentur accipiat: nam heri vesteri visus est oratione mea nonnihil commoueri. Non ita est (inquam ego) Cardane: non enim tam faciliè moueri soleo, præsertim ijs in rebus, quæ sanè mihi quàm leuissimæ videntur, & ioci tantum gratia dicuntur. Iocì ne tantum gratia (inquit ille) me & Antonium heri disputasse credis? Imò ne erres, scito me ex animo

m locut

igitur ostendere tentabo, non omnino cum Socratis doctrina, neq; cum veritate Paradoxon hoc conuenire: deinde Ciceronis argumenta resellere corabor. Constat autem nullam aliam admirabilitatem quintum hoc caput habere, neq; alia de causa Paradoxon appellatum, nisi quia Seruitutis & Libertatis nomina à vulgari atq; propria significatione ad animum transfert. Nam si verborum proprietatē sequi voluerimus, quam omnes & Latini & Græci scriptores sequuntur, præter unicam Stoicorum sectam, Seruus ille propriè dicetur, qui in alterius omnino potestate est, cuius vis, & fortune cōditio infima est, qui sui iuris non est, qui libertatem perdidit: atq; hac in significatione falsum est hoc Paradoxon. Non enim omnes improbi, qui stulti à Stoicis nuncupantur, corpore serui sunt: et præterea multi qui sapientes habiti sunt, seruitutem seruierunt, ut Diogenes Cynicus, Aescopus fabulator, epictetus Stoicus, multiq; præterea alij, de quibus in Epistola quadam ita Seneca: Nescis qua ætate Heclaba seruire cœpit? qua Cræsus? qua Darij mater? qua Plato? qua Diogenes? Liber autem is propriè dicitur, cuius corpus nemini mancipatum est, sed sui iuris, atq; potestatis est, & qui nemini est addictus in seruitutem. Atque hoc sanè modo pleriq; improbi liberi sunt, ut Dionysius Tyrannus, Phalaris, Archelaus, cæteri q; innumerabiles: qui cū essent improbißimi,

m 2 tamen

præterquam hoc in loco, aut ubi Stoicorum portenta recitat, observavi. Nam apud hos autores ubicunque servorum, atq; liberorum mentio fit, de ijs intelligitur, qui corpore serviunt, & qui suæ sunt potestatis, quos aliqui volunt ita natura generari: aliqui verò, quod mihi certè verius esse videtur, iure gentium servos esse factos. Nam Aristoteles, Politicorum primo, multis verbis probare contendit, esse quosdam à natura liberos generatos, quosdam servos, quibus & vilis sit, & iusta servitus. Duobus enim (inquit) modis Servire dicitur, et Servus. Est enim quidam servus, quem leges faciunt. Lex enim convèntum est quoddam, quo bello capta victorum esse dicuntur. Sed aliqui servitutem hanc iniustam esse existimant: nam isto pacto fiet, ut nobilissimus quisq;, & clarissimus sit servus. Et ex servis, si accadat ut captus vendatur, est etiam servus, quem natura procreavit. Itaq; vult Aristoteles eam solam servitutem esse firmam, & stabilem, quæ naturalis sit: eam verò, quæ iure quodam civili, atq; legibus fit, infirmam esse, quoniam est contra naturam. Quin etiam quorundam sententiam recitat, qui virtute et vitio libertatem & servitutem distinguunt: ut videatur hæc sententia nonnullorum etiam antè Stoicos fuisse, qui dicerent, Virtute præditos esse liberos, vitiosos autem servos. Volebant enim, ut ex homine homo, et ex bellua bellua nascitur: sic ex bonis

nasci bonos. Atqui hoc (inquit) natura vult, & con-
 natur efficere, sed tamē saepe non potest. Ergo hoc qui-
 dem apparet, diensionem hāc quadā ratione nixam
 esse, aliosq; esse natura seruos, alios liberos. Et paulò
 post ostendit, neq; dominum, neq; seruum, neq; libe-
 rum quenuquam ex scientia nominari, sed quia natura
 tales sint. Ex his igitur perspicuum est, longè diuer-
 sam Aristotelis à Stoicorum opinione fuisse senten-
 tiam: quippe qui non virtute, & vitio, neq; ex scien-
 tia, sed natura potius seruos à liberis distingui velit.
 Ac mihi quidem licet à natura nequaquam seruos ge-
 nerari placeat, tamen ea sententia verissima videtur,
 quòd non ex sapiētia serui aut liberi debeant homines
 appellari. Cur enim ille seruus dici debet, qui in nobi-
 lissima atq; amplissima familia natus, non tamen ad-
 huc sapientiam adeptus sit? Aut cur liber ille sit, qui
 Domino suo paulò sapientior habetur? An non hac
 ratio non tantum domos & familias, sed etiam ciui-
 tates & regna perturbaret? Nam cum quis seruus do-
 minum suum in aliquo esse vitio videret in quo ipse nō
 esset, statim se liberum esse clamaret, dominum verò
 seruum: atq; ita iam infinita bella seruilia concitaren-
 tur. Neq; apud Platonem vnquam tale dicendi genus
 reperi, ut sapientes solos ciues, solos reges, solos liberos
 appellaret. Quare nequaquam verè dicere Cicero po-
 test, hoc Paradoxon esse Socraticum, cum potius So-
 crates,

crates, ut paulò pòst apertè declarabo, mortales uniuersos tam sapientes, quàm insipientes, Deorum esse possessionem velit, atq; Deorum seruituti addictos, ut hac ratione nemo prorsus liber dici possit: quin potius, si quis se in libertatem vendicare uoluerit, et Deo non parère, statim improbißimus efficitur. Illud quidem verum est, quòd improborum hominum mores Socrates aliquando seruales appellat: sicuti contrà, bonorum hominum liberales. Sed hoc quadam similitudine fieri perspicuum est: quoniam serui, fortasse quia nò tam diligenter educantur ut ingenui, plerunq; ratione carent, atq; improbi sunt. Atq; hoc est quod Homerus dixit, Iouem optimum Maximum eis hominibus, quos seruos effecit, dimidium mentis abstulisse. quemadmodum Plato de legibus sexto scribit. Ingenui verò homines longè commodius bonis artibus, & uirtutibus, quàm serui, possunt incumbere. Atq; hoc est quod pleriq; dicunt, Nobilitatis propriam esse uirtutem. Ita Socrates in Alcibiade primo, Vitiositatem rem seruilem esse ait, uirtutem autem virum ingenuum maxime decere. Quo ex loco fortasse Cicero suspicatus est, Paradoxon hoc esse Socraticum, quòd omnes stulti serui sint, sapientes verò soli liberi. Quod (ut dixi) nusquam, quod sciam, aut meminerim, apud Platonem reperitur. Nam quoties de seruis, atq; de seruitute Plato verba facit, semper eos, qui in Dominorù potestate

m 4 sunt,

sunt, intelligit: nisi sortè per similitudinem aliquant
loquatur, ut sexto de Legibus, Nos eadem servitute
legibus adstrictos esse debere dicit, qua Deis immor-
talibus sumus. & decimo de legibus ait, Homines in
Deorum atq; Dæmonum esse potestate. Sed profe-
ctò natura liberos omnes homines procreavit, quem-
admodum Vlpianus noster affirmat: Iure enim natu-
rali (inquit) omnes homines ab initio liberi nasce-
bantur. Servitutem autem volunt Iurisconsulti iuri
naturali contrariam esse. Vnde etiam Libertatem Iu-
stinianus Imperator ita definit, ut dicat esse natura-
lem facultatē eius quod cuiq; facere libet, nisi siquid
vi, aut iure prohibetur. Servitutem autem esse consti-
tutionem iuris gentium, qua quis dominio alieno con-
tra naturam subijcitur. Quod idem affirmat Pompo-
nius iureconsultus, digestis de verborum significatio-
ne, & Florentinus digestis de statu hominis. Servos
autem ex eo appellatos quòd imperatores captivos ven-
dere, ac per hoc servare, nec occidere solerēt, qui etiam
Mancipia dicti sunt, eo quòd ab hostibus manu cape-
rentur. Ex quo perspicuum est, servitutem eo tempore
inuentam esse, cū inter se homines bellare, atq; aliud
aliud sibi subijcere cœperunt: cū antea omnes natu-
rali libertate fruerentur. Hac igitur ratione, omnes
tam stulti, quam sapientes, liberi sunt, qui per servitu-
tem nulli mancipati sunt. Contrà verò siue sapiēs, siue
stultus

stultus fuerit, cum ita in alterius est potestate, ut ei
 parere necesse sit, seruus est. Sed hæc facile concedet
 Cicero, quoniam non de corporis, sed de animi seruitu-
 te atq; libertate loquitur. Esto igitur, ne de verbis
 inter nos contentio sit: possem enim in hoc immorari,
 & pluribus exemplis ostendere, Seruitutem & Li-
 bertatem propriè de corpore dici, ut Cicero, Qui à ve-
 stro corpore iugum acerbissimum repulit seruitutis, et
 alibi: Populus Rom. pro turpi stupro datus in seruitu-
 tem. pro Domo sua: Ciuitas seruitute oppressa. de Offi-
 cijs: Mors seruituti anteponenda. in Antonium: Ser-
 uitus est postremum malorū omnium, non modò bello,
 sed morte etiam repellendum. Verum à Socrate Ma-
 gistro didici, nō oportere de nominibus esse sollicitum.
 Nā in eo Dialogo qui Politicus inscribitur, ita inquit:
 Si verborum curiositatem vitaueris, euades in sene-
 ctute sapientior. Quare verborum proprietatem, quæ
 tota pro nobis contra Ciceronem est, relinquamus, &
 rem ipsam potius videamus. Dico igitur primò, natu-
 raliter omnes homines tã corpore, quàm animo liberos
 esse, neq; ullum omnino seruum à natura procreatum.
 Atq; hac ratione, falsa erit omnino Ciceronis senten-
 tia, quòd soli sapientes sint liberi. Satis enim constat
 inter omnes qui rectè sentiunt, liberas omnium esse vo-
 luntates, ut vel virtutes amplecti, vel vitia sequi si
 voluerint, suo arbitrio possint: ut etiam qui improbus
 m s est,

est, eam habeat libertatem, ut relicta mala viuendi consuetudine, possit ad honestatem animum applicare, quod in categorijs Aristoteles his verbis præclare docet: Ex bono etiam improbus, & vicissim ex malo probus effici potest. Prauus enim si ad meliorem usum, rationemque, ex mala deducatur, iam habeat ad virtutem progressionis aliquantum: cum autem semel vel parum in virtute processerit, profecto aut perfectam sapientiam mutatione morum consequetur, aut certe magnam in virtute faciet progressionem: semper enim aptiores animos habet ad virtutem, quamuis parum initio in ea processerit: ut verisimile sit, eum maiorem progressum esse facturum. Quod si sit sempiternum, tandem certe aliquando nisi tempus impediat, perfectam sapientiam consequetur. Quare contra Cicero- nem ita concludi potest: si improbi potestatem eam in se habent, ut abiecta animi prauitate, virtutem, atque honestatem sequantur, nequaquam serui sunt dicendi: si enim eorum animus seruus esset, nullo modo libertatem eam haberet, ut viuendi consuetudinem immutaret. Sed quamplurimos legimus, cum longo tempore vitijs omnibus sese dedidissent, postea viros optimos esse factos. Sic C. Valerius Flaccus, cum luxu perditam adolescentiam egisset, postea quantum prius luxurie fuerat exemplum, tantum modestiae, & sanctitatis specimen enasit. Sic Q. Fabius Allobrogicus,
cuius

cuius adolescētia nihil infamius, senectute verò, nihil ornatius, aut honestius. Quid de Themistocle dicam? quē propter ingentia vitia pater abdicauit, cuius mater ob immensam filij turpitudinem suspendio vitam finiuit: sed quis eo postea virtute, & sapientia clarior extitit? Nihil de Polemonis adolescentia dicam, qui non tantum flagitiosis ac turpissimis voluptatibus, sed etiam ipsa infamia gaudere videbatur: verum postea grauissima Xenocratis oratione commotus, ex infami Ganeone maximus & sapientissimus Philosophus euasit. Sed tempus mehercle deficeret, si omnes, quorum mihi exempla succurrūt, commemorare vellem, qui ex improbissimis & pessimis, sapientissimi atque optimi facti sunt. Quæ res omnino declarat, eos liberam habuisse voluntatem, ut eam à vitijs ad honestatem inclinarent. Quin etiam contrà, uir probus & honestus, quemadmodum in Protagora Socrates ait, impius & sceleratus fieri potest: quod infinitis exemplis facile potest intelligi. Quot enim in literarum monumentis reperiuntur, qui cū honestissimè longo tempore vixissent, postea flagitijs omnibus dediti, turpissimè vitam egerunt. Quorum exempla, ne videar historiam contexere, non disputare, prætermittam. Patet igitur, liberum esse nostræ voluntatis (ut Theologi nostri vocant) arbitrium: quod etiam Cicero multis in locis ostendit: sed in eo præcipuè libello, quem de fatq
contra

contra Stoicos conscripſit: in quo reprehendit eos, quòd mentem hominis voluntate libera ſpoliatam neceſſitate fati deuinciant: probatq; eſſe debere motum animi voluntarium. Nam quod Theologi noſtri Liberum arbitrium, Cicero Voluntatem liberam, & Motum animi voluntarium appellare ſolet. quod in omnibus hominibus eſſe tam ſeruis, quàm liberis: tam fœminis, quàm maribus: tam improbis, quàm probis, Chriſtianæ nobis inſtitutiones perſuadent. Neq; enim opus eſt, vt hoc loco recenſeam ex ſcripturis ſacris ſanctiſſimorum hominum autoritates, quibus voluntatem hominum omnium eſſe liberam comprobetur. Nam neque ego id commodè præſtare poſſem: quippe qui per ætatem nondum ſatis illi ſtudio nauare operam potui: nec ſi poſſem, opportunum hoc tempore putarem eſſe. Satis enim mihi videtur ad inſtitutam diſputationem, id vos admonuiſſe, quod ſapientiſſimi homines ſentiunt, & nobis credere neceſſe eſt: ſiquidem Chriſtiani eſſe volumus, neq; hæreſis (vt vocant) nomine condemnari. Liberos eſſe animos noſtros, & ſuo arbitratu, vel honeſtatem, vel vitia complecti poſſe. Quæ cùm ita ſint, iacet omnino Ciceronis ſententia, Niſi ſapientem liberum eſſe neminẽ. Nam hac ratione mortales vniuerſi liberi ſunt, quatenus motus animi voluntarios, & liberæ voluntates habent. Repugnant enim hæc omnino inter ſe, cùm de animo ſolo loquamur, Seruos eſſe,

esse, et Liberam habere voluntatem. Quare nullo modo fieri potest, quod ad hanc rationem attinet, ut improbi serui sint. Verum quia negare non possumus, quin à sanctissimis viris, & nostræ religionis antistitibus dictum sit, Sceleratos homines peccatorum suorum esse servos: Nam etiam ipse nostræ salutis autor & parens Christus, diuinam eam sententiam, quæ in Ioannis Euangelio legitur, sua voce protulit, Quicumque (inquit) peccatum committit, is peccati seruus est, quod eleganter sanè Claudianus his versibus explicuit:

Si metuis, si praua cupis, si duceris ira,
Seruitum patiēre iugum, tolerabis iniquas
Interius leges. tunc omnia iura tenebis,
Si poteris Rex esse tui.

Videamus quid de hac animi seruitute sentiendum sit: nam illud, quod prius diximus, immotum omnino, atque inconcussum manere oportet, Animum omnium natura liberum esse. Neque enim aliquid per se deliberationis inire, nihil statuere, nihil consultare posset. Verum quamuis hoc ita sit: tamen omnes, siue stulti, siue sapientes sint, sua sponte se in seruitutem tradunt: non alia sanè de causa, nisi ut siquo modo fieri potest, feliciter, ac beatè uiuant. Natura enim omnibus beatitudinis cupiditatem ingenerauit: quam ut aliquando assequantur, nullam conditionem recusant durissimæ seruitutis. Sed in hoc à stultis intelligentes differunt: quod

quòd intelligentes rectam felicitatis viam ingressi,
virtuti atq; honestati seruire incipiunt : vel (ut me-
lius dicam) per virtutem atque honestatem Dei im-
mortalis serui efficiuntur : atq; isti sunt, qui sapientes
appellantur. Stulti verò, quia summū in corpore, atq;
in voluptatibus, bonum esse putant, improbiſſimis do-
minis de decori, atq; turpitudini se in seruitutem tra-
dere non dubitant. Atque hac sanè ratione mortales
omnes iure optimo serui dici possunt. Sed boni viri,
atq; sapientes, Dei immortalis serui sunt : improbi au-
tem, atq; stulti, peccatorum suorum imperio, ac pote-
stati, tanquam vilia atque abiecta mancipia, subditi
sunt. Quòd autem sapientes Dei serui dicantur, pluri-
mis exemplis declarari potest : sed adeo manifestum
est, ut ferè probatione non egeat. Illud tamen silentiò
præterire non possum, quod ad Dionis propinquos, atq;
amicos, in epistola quadam Plato scripsit : Seruitus
(inquit) & libertas si modum excedat, utraq; mala
est : si modum obseruet, utraq; bona. Moderata qui-
dem seruitus est, quæ Deo exhibetur : immoderata ve-
rò, quæ hominibus. Hac de causa Socrates aiebat,
Magis Deo, quàm ceteris omnibus parendum esse.
Nam in Apologia sua his verbis utitur : Ego quidem
vos Athenienses veneror, ac diligo : sed mihi certum
est, magis Deo, quàm vobis obedire. Quin etiam idem
Socrates in Phædone, Rectissimè (inquit) hoc mihi di-
ctum

Etum videtur, Quòd Dei nostri curam agant: & quòd homines una quædam Deorum possessio sunt. Et paulò pòst, hoc siquid aliud (inquit) affirmando ego contenderem, morientes nos ad Deos, tanquam ad optimos Dominos accedere. Huc accedit, quòd non tantum Dei, sed etiam iustitiæ & legum viri boni serui dicuntur: atque ideo pro Cluentio inquit Cicero, Legum ideo omnes serui sumus, ut liberi esse possimus. Atq; etiam in commune consuetudine, cum aliquem maximè religiosum, & optimum atq; sanctissimum hominem significare volumus, cum Dei seruum appellamus. Quamobrem & sapientes, & improbi serui sunt: sed in eorum dominis maxima differentia est. Nam sapientum Dominus, ipse Deus omnium bonorū autor & largitor est, qui seruos omnes suos æterna beatitudine donare solet: improborum autem Dominus, ipsum est peccatum, miseriarum omnium, atq; calamitatum pelagus, quod seruos suos in sempiternas ærumnas, & perpetuos cruciatus præcipitat. Quamuis igitur omnes tam animo quàm corpore, natura liberi sint: tamen quia hominis natura priusquam finem suum sortiatur, quæ felicitas est, quodammodo manca atq; imperfecta est: ideo necessitas cogit, ut se omnes in seruitutē ei dedant, à quo se beatam vitam adepturos sperant. Plerique autem deprauato animi iudicio, quia beatos se fore existimant, si libidines suas omnes
explere

explere potuerint, peccatorū omnium nequissimi serui efficiuntur. At verò nonnulli Delphico illi oraculo parentes, quo iubetur unusquisq; se ipsum noscere, diuinam originem suam intuentur: atque ita præclare intelligentes, non aliunde se posse felicitatem assequi, quàm ab immortali Deo, rerum omnium parète optimo, suas omnes cogitationes, suum studium, suas curas, mentem deniq; omnem ei quasi mancipio tradūt: atq; hoc modo Dei immortalis optimi serui efficiuntur. Sed hæc omnino seruitus, qua viri boni Deo mancipati sunt, sola vera libertas appellari potest. Cur enim ea, quæ manifestissima sunt, & rationi maxime consentanea negemus? Vera (inquam) & sola libertas est, Deo fidelissimè seruire, atq; eius præcepta diligentissimè custodire. Non enim vereor, ne in propria causa præuicator esse videar: cùm præsertim alijs rationibus ostendere possim, falsum hoc esse Paradoxom. Quamuis enim concedam, nullam aliam esse malorum fugam, quemadmodum in Phædone Socrates docet, nullam rationem qua possimus à calamitatibus liberari, nullam viam qua nostros animos in libertatem vindicare possimus, nisi pro uiribus nostris enitamur Deo quàm simillimos fieri: non tamen ideo Ciceroni concedam, solos sapientes esse liberos: aut solos stultos seruos. Tamen si facile illud etiam concesserim, omnem animi fractam atq; obiectam obedientiam, qua quis dedec

dedecori atq; turpitudini mancipatur, pessimam esse
 seruitutem. Quid ergo? An non soli sapientes sunt li-
 beri? soli stulti serui? Minimè verò, si hoc absolutè in-
 telligas. Naturaliter enim omnes (ut diximus) liberi
 sunt. Sua verò sponte se etiam omnes in seruitutem
 dedunt. Itaq; quodammodo sine discrimine omnes li-
 beri sunt, quodammodo serui. Verùm quoniam dixi-
 mus, veriſsimam esse libertatem Deo quàm fidelissi-
 mè seruire: videamus, an hoc illius tantùm sapientis
 sit, quem Stoici confingunt, qui nullus omnino esse po-
 test. Volunt enim illum tandem sapientem appellari,
 qui nulla penitus animi perturbatione concuti possit,
 (nam omnem animi commotionem, ut doctè sanè Car-
 danus heri contrà disputauit, in saniam appellant) qui
 nunquam vlla re doleat, nunquam lætetur, nihil omni-
 no speret, nihil extimescat. Hic est sapiēs Stoicorum,
 qui nihil à stipite, atq; trunco, mihi sanè differre vi-
 detur. Sed nullus est omnino mortalium, qui vel possit,
 vel debeat his animi motionibus penitus carere. Pro-
 deſt enim aliqua in re dolere, prodeſt sperare, prodeſt
 extimescere. Vnde nostris legibus, idest Christianis,
 optimè institutum est, ut quoniam nemo perfectè sa-
 piens esse potest, sed ut omnes in re aliqua peccēt, atq;
 in errorem incidāt necesse est, quotannis publico quasi
 dolore quodam, et tristitia declāremus, peccatorū no-
 strorum nos poenitere: credimusq; dolorem illum, atq;

n illam

illam trīstitiā nos à peccato liberare. Quin etiā vera sapientiæ principium, non in nihil pertimescendo, sed potius in Dei timore collocamus. Tātum autem abest, ut nihil sperandum dicamus, ut etiam firmam spem, unam è summis virtutibus esse statuamus. Lati-
tiam verò non tantum non fugiendam censemus, sed etiam ipse nostræ salutis autor Christus, nobis præci-
pit, ut letemur, & exultemus quoties intelligimus laborum nostrorum quasi mercedem in cælo nobis esse repositam. Non tantum igitur nullus est sapiens, qualem Cicero cum Stoicis fingit, sed nec esse debet. Nam istud Nihil moueri, non sine magna mercede contingit immanitatis in animo, stuporis in corpore. Quare si nullus sit eiusmodi sapiēs, nullus erit omnino liber. Sed omnes tanquam in ergastulo seruitutis cō-
stricti vitam agent. Quòd autem nemo talis sapiens reperiatur etiam ipse vidit Cicero: ut maximè mihi mirum videatur, quòd cum se non esse sapientem in-
telligeret, tamen eam sententiam secutus sit, ut qui-
cunq; non esset sapiens reum & stultum & seruum nequissimum existimaret: nam libro de Divinatione secundo eius hæc sunt verba: Nam si quod rarò fit, id portentum putandum est, sapientem esse portentum est: sepius enim mulam peperisse arbitror, quàm sapiētem fuisse. Quin etiam de Officijs tertio, perfectum id offi-
cium, quod omnes virtutis numeros habet, in sapiētem
solūm

solum ait posse cadere : pauloq; post ostendit, neminem esse eorum, qui sapientes videntur, qui verè sapiens dici possit, his quidem verbis: Nec verò cum duo Decij, aut duo Scipiones fortes viri commemorantur, aut cum Fabricius, aut Aristides iustus nominatur, aut ab illis fortitudinis, aut ab his iustitiæ, tanquam à sapiente petitur exemplum. Nemo enim horum sic sapiens, ut sapientem intelligi hic volumus: nec ij, qui sapientes habiti sunt, & nominati M. Cato, et C. Lælius sapientes fuerunt, nec illi quidem septem: sed ex mediorem officiorum frequentia similitudinem quandam gerebant, speciemq; sapientum. Hoc idem etiam Socrates attestatur in Apologia sua: Deus (inquit) solus est sapiens: humana verò sapientia parui cuiusdam, vel potius nullius pretij est. In Hippia verò minore Socrates idem inquit: Hominum sapientissimum, si cum Deo conferatur, tanquam simiam quandam esse. Præterea in extrema Phædri parte, Magnum quiddam, inquit, mihi certè videtur, ò Phædre, sapientem appellari, nomenq; hoc Deo soli conuenire: ipsum autem hominem, vel sapientiæ amatorem, vel aliquid eiusmodi potius conuenit appellare. Satis igitur constat, nullum penitus hominem rectè sapientem appellari posse. Quod etiam vulgari prouerbio iactari solet, Neminem esse mortalium, qui omnibus horis sapiat. Quod etiam septimo libro Plinius usurpat. Nam quis

homo reperiri potest, qui ita liber sit, ut secundo sermonum libro, Stoicos secutus, Horatius depingit his versibus:

Quis nam igitur liber? sapiens, sibi qui imperiosus,
 Quē neq; pauperies, neq; mors, neq; vincula terrēt,
 Responfare cupidinibus, contemnere honores,
 Fortis, & in se ipso totus teres, atq; rotundus,
 Externi nequid valeat per leue morari.

In quem manca ruit semper fortuna. aut qualem in epistola quadā his verbis Seneca describit: Sapiens ad omnem incursum inuictus, & interritus est: non si paupertas, non si luctus, non si ignominia, non si dolor impetum faciat, pedem refert, interritus contra illa ibit, & inter illa sapiens plenus est gaudio, hilari, & placidus, & inconcussus cum Dūs ex pari viuit. Nemo igitur talis reperitur: sed nobiscum præclare agitur, si à peccatis illis grauioribus abstinere poterimus, nedum speremus ab omni nos crimine liberari posse: rectè enim dixit Horatius:

Nam vitys sine nemo nascitur: optimus ille,
 Qui minimis vrgetur. Et secūdo libro Propertius:
 Vnicuiq; dedit vitium natura creato. Et Catullus: Suus cuique attributus est error. Quod etiam in Alcibiade primo Socrates ostendit, cū apertissimis rationibus probat, nullum esse hominem qui curatione non indigeat. Quamobrē ex his omnibus id conficitur,
 Nullum

Nullum esse mortaliū, qui verè sapiens dici possit.

Quod si vera est hæc Ciceronis & Stoicorum sententia, Nisi sapientem liberum esse neminem: nullus erit ex omnibus, qui liber vocari possit: sed servorum, & stultorum erunt omnia plena. Atq; ita fiet, ut animal hoc prouidum, sagax, multiplex, acutum, memor, plenum rationis & consilij, præclara quadam conditione generatū, quod à Deo solū ex tot animantium generibus, atq; naturis, particeps rationis & cogitationis, cū cætera sint omnia expertia, formatum est: nihil aliud sit, ex hac Ciceronis & Stoicorum sententia, quàm vile quoddam, & stultum, & abiectum mancipium. Quod si hoc prorsus absurdum est, nequaquam vera potest hæc esse sententia. Sed certè quicunq; se honestati, atq; virtuti tradunt, quamuis sapientes non sint, nihilo tamen minus liberi dicuntur: et quamuis in aliquem errorem aliquando labantur, non tamē statim libertatem amittunt, aut dementes fiunt. Quod si diligenter hoc admirabile Stoicorum effatum considerare voluerimus, certè aut indignari, aut ridere necesse nobis erit. Quid enim hoc quæso est? Nemo nisi sapiens liber est. Quid tum postea? Omnes stulti serui sunt. Audio: sed quis est sapiens? Qui omnibus virtutibus instructus est, qui omni prorsus vitio caret, qui nunquam animo commouetur. Rectè sanè, nam talem esse Deum censemus, aut quicunq; Deo quam similli-

mus est. Sed est ne aliquis ex mortalibus eiusmodi
Nemo sanè. Cum ergo nemo sapiens sit, ne liber qui-
dem quisquam erit? Esto. Quid ergo? qui sapiens non
est, quo cum nomine appellabis? Sultum, inquit. Et qui
liber non est? Seruum. Sed nullus homo sapiens: ergo
omnes stulti, atq; serui. At verò in superiori Parado-
xo concluderat, Omnes stultos insanire. Quo fit, ut tan-
dem concludendum sit, Mortales omnes & stultos,
& seruos, & insanos esse. Quo quid ineptius concludi
potest? Nos igitur, qui nequaquam Stoici volumus
esse, quamuis neminem esse sapientem statuamus: non
tamen ideo concedimus, omnes esse stultos. Nam inter
veram sapientiam, & stultitiam, multos esse gradus
intelligimus: ut ille stultus dicatur, qui nihil cum ra-
tione, nihil cum virtute agit: sed libidini tantum, atq;
appetitui pareat. Qui verò videt quidem quid ratio
postulet, quid virtus sit, neq; tamen pro virili nititur
honestè se gerere, sed interdum rationem, interdum
appetitum sequitur, is nequaquam penitus stultus est,
sed tamen nondum bonus dicitur. At qui quantum
facultas sua fert, honestati dat operam, & quicquid
agit, quicquid cogitat, id ad vnum rectè viuendi fi-
nem refert, quamuis in aliquos errores vel per impru-
dentiam, vel propter humanam imbecillitatem pro-
labatur: nihilo tamen minus vir bonus, & quodam-
modo sapiens appellatur. At verò Stoici cum primum
in err

in errorem aliquem homo vel leuissimum incidit, cum subito stultum, seruum, insanum proclamant: quoniam nullum inter peccata discrimen statuunt: ut tam improbus sit, & stultus, & insanus, qui per iniuriam seruum suum leuiter percussit, quam qui parentem suum nefarie strangularit. Hæc cum intelligerem Stoicorum dogmata inepta esse atq; ridicula, non dubitavi contra Ciceronem sententiam meam, quæ cum Socrate, & cum veritate conuenit, coram vobis proferre. Reliquum est, ut ipsius Ciceronis argumenta diluamus: quæ tamen pleraq; potius cum nostra sententia conueniunt, ut intelligetis, quam Stoicorum dogma confirmant: nisi forte quis vestrum aliquid ad hæc amplius requirit. Nihil sane, inquit Marcus: nam ita dilucide, atq; aperte disseruisti: ut non dubitandum sit; quin pessime cum Stoicis Cicero senserit. Itaq; facillimam tibi video ad eius argumenta destruenda viam esse premunitam. Perge igitur, ut coepisti, & institutam disputationem tuam perface: nam si Constantinus etiam (ut spero) recte se gesserit, cui Paradoxon ultimum euertendum obtigit, omnino magna res à nobis erit acta, quam nullus unquam tentare ausus est. Enitar (inquit Constantinus) pro viribus, ne vobis inferior in hac parte videar. Quamuis enim neque doctrina, neq; eloquentia cum ullo vestrum comparandus sim: efficiam tamen profecto, ut omnes intel-

ligant, non rectè à Cicerone probatum esse, Solum sapientem esse diuitem. Sed prius Octavianum pensum suum absoluentem audiamus. Tum ille: Primum est hoc (inquit) Ciceronis argumentum: Non est imperator ille laudandus, neque hoc nomine dignus, neque cuiquam imperare libero potest, qui non potest cupiditatibus suis imperare. Primò si tibi hoc concedam Cicero, nequaquã tamen id quod vis efficies. Licet enim ille non rectè Imperator appellari possit, non tamen ideo rectè sequitur, ut seruus sit, aut stultus. Et quamuis hoc etiam concedatur, nequaquam tamen erit conclusum, solum sapientem esse liberum. Verùm si communem loquendi sermonem sequi volumus, ille verè dicitur Imperator, qui belli gerendi bonus est administrator, & cuius officium est, summæ Reip. consulere, & pro salute patriæ, vel pro imperij amplitudine bellare. In quo si scientia rei militaris, si bellica virtus, si autoritas, si felicitas insit, rectissimè summus Imperator appellatur, qualem Pompeium pro lege Manilia fuisse probat Cicero. Nec in eo quæritur, ut eo modo, quo Stoici volunt, sapiens sit, ad Imperatoris nomen obtinendum. Licet enim aliquando irascatur, & alicui se voluptati dedat, tamen si rectè exercitui præest, & adeo callidus & peritus sit, ut ab hostibus non facile circumueniri possit, Imperatoris summi nomen obtinet. Nisi fortè Annibalem, quem toties summum

Imperat

Imperatorem & à Cicerone, & ab alijs plerisq; scriptoribus appellatum legimus, nos quia crudelis, atque impius erat, non Imperatorem fuisse, sed inertissimum seruum existimare volumus. Aut Cæsarem, qui virtute bellica mortales vniuersos antecelluit, quia cupiditates suas refrænare fortasse nesciebat, aut nolebat, indignum Imperatoris nomine censeamus. Quis igitur erit Imperator? certè neq; Themistocles, neq; Conon, neq; Miltiades, neq; Scipiones, neque Pompeius: quoniam nullus horum sapiens fuit, sed aliquis fortè Græculus summa loquacitate præditus ex Stoicorum schola delectus, qui longo otio penè marcidus sit, & qui nūquam gladium vagina vacuum viderit, si Dÿs placet, summus erit Imperator. Itaq; quoties de bello deliberandum est, non in cōsiliū C. Marius admitteatur, non L. Sylla, quoniam isti sapientes non fuerunt: sed excitabitur aliquis ex diuturna garrulitate sua Barbatus, qui (vt ait Persius) exporrecto trutinetur verba labello: atq; hic rectè summa Reipub. præficietur, quoniam scilicet optimus est Imperator: didicit enim famem & sitim tolerare, quia nihil erat, quod ederet: didicit voluptates & diuitias cōtemnere, quoniam summa paupertate premebatur: didicit iracundiam cohibere, quoniam omnibus ei blandiendum, atque adlaudandum fuit, vt ventri satisfaceret. Hæc summi sunt Imperatoris officia. Sed extra

iocum, certè mihi videtur non rectè fecisse Cicero, què spoliavit eos Imperatorum nomine, quicunq; non omni animi commotione carent: non enim hoc loco disputabo. Peripateticis, atq; Academicis ita visum esse, ut animi perturbationes utiliter à natura datas existimarent, & iracundiam fortitudinis cotem esse dicerent. Illud dicam ineptè penitus concludi, quòd solus sapiens sit Imperator: nisi fortè nova aliqua nomina fingenda nobis sunt, quibus illos appellemus, qui bellicis rebus præficiuntur. Hos enim passim apud scriptores & antiquos, & recentiores, Imperatores appellari video: cum neminem tamen unquam ex tot summis Imperatoribus, qui post hominum memoriam floruerunt, sapientem eo modo, quo Stoici volunt, fuisse compertum sit. Itaq; cõcludendum est, laudari posse eum Imperatorem, & eo nomine dignum censei, qui rei militaris scientiam habeat, qui bellica virtute cæteris antecellat, qui magna sit autoritate præditus, cui prosperè res illæ, quas gerit, plerunq; succedunt, etiam si non omnibus cupiditatibus suis imperet. non enim ideo Pompeius, cum in Asia bellaret, summi Imperatoris nomen amisit, quia quedam nimis cupidè atque insolenter ageret, & invidia quadam inductus de Luculli fama, qui antè illum in ea provincia nomen Imperatoris summa cum laude ac celebritate tenuerat, assiduè detraheret. Quid Alexander ille Macedo?

quantus

quantus Imperator ab omnibus semper iudicatus fuit? ut post hominū memoriam nullus unquam tam breui tempore tantam gloriam in bello sit adeptus, & tamen pluribus vitijs Imperatorias eas laudes inquinavit. Quid ergo? dicet aliquis, an non præstantior esset Imperator, si summam esset adeptus sapientiam? Quis de hac re dubitare potest? imò potius omnes eum, si quis eiusmodi reperiretur, non tanquam aliquem natum, sed tanquam è cœlo delapsum Deum intuerentur. Sed quis ille fuit unquam, aut esse potuit, qui cum summa bellica laude, perfectam etiam sapientiam copularit? Itaque si plurimi fuerunt Imperatores eximij, nec eorum quisquam verè sapiens unquam fuit, omnino distincta est à summa sapientia laus Imperatoria. Quare poterit esse: aliquis Imperator summus, aut saltem magnus, etiam si cupiditatibus suis, eo modo, quo sapientes solent, imperare nesciat. Falsum est igitur quod ait Cicero, dum aliquis cupiditatibus suis obedit, neq; Imperatorem, neq; liberum appellari posse. Sed dictum est ab eruditissimis viris, Nisi sapientem liberum esse neminem. Sit ita sanè, quoniam Stoici dementes prorsus homines tibi videntur eruditissimi. Sed quibus id rationibus probant? Quoniam (inquit) libertas, potestas est vivendi ut velis. Hæc sanè definitio verissima, nam libentissimè quæ vera mihi videntur Ciceroni concedo: quoniam non contra dicendi studio, sed

verit

veritatis indagandæ gratia, tota hæc à nobis suscepta, disputatio est. Itaq; non in eam disputationem descendam, quæ maximè probabilis esse videretur, quòd omnes principes atq; reges, quamvis improbi sint, tamen ex hac definitione omnium essent liberrimi, quoniam eam potestatem, & quidem summam, habere videntur, ut vivant quomodo velint. Nam ab optimo præceptore Socrate in Gorgia didici, Scelestos homines, quâvis ea faciant, quæ sibi bona atq; utilia videntur, non tamen ea facere, quæ volunt: quoniam omnes naturaliter, tantum quæ verè bona sunt volunt, licet plerunque fallantur. Totam igitur hanc disputationis partem prætermittam, Ciceroniq; cōcedam, scelestos, atq; improbos homines, nequaquam vivere ut volunt: & tantum eum vivere ut vult, qui recta sequitur, qui gaudet officio, & quæcunq; sequuntur, nam copiose sanè, atq; eleganter sapientem describit hoc loco Cicero: quæ concedenda illi sunt omnia, præter eam conclusionem, Nisi qui talis sit esse liberum neminem. Sed fortassè vestrum aliquis admiratur, quomodo hoc fieri possit, ut quamvis libertatis definitionem veram esse concedamus, & solum sapientem ut velit vivere, negemus tamen conclusionem, quæ necessario consequi videtur, si ita conformetur argumentatio, Libertas est potestas vivendi ut velis, solus sapiens vivit ut vult, ergo solus sapiens est liber. Atq; hæc sanè
mihi

mihi ratiocinatio duobus modis peccare videtur: primo quoniam in maiori propositione rei natura ponitur, quæ per definitionem explicatur: in minori verò non natura rei, sed effectus hominum ponitur, atq; ita non idem de eodem dicitur. Non enim ab hominum effectui rei natura penditur: quoniam vel rarò, vel nunquam accidit, ut in homine aliquo perfecta sit alicuius rei natura, quamvis alius alio magis eam participet: atq; ideo fit, ut quoties multi rei naturam alicuius participant, quamvis alius alio magis, tamẽ omnes ab ea nomen habent, atq; appellationem. Ut artis oratoris vis & natura ea est, ut persuadere possit quæ velit: nemo tamen fortasse reperietur tam excellens orator, qui quæcunq; voluerit ea persuadeat, licet artem oratoriam plurimi participant. Quòd si fortè aliquis, ut Demosthenes, quæcunq; velit persuadeat: ineptè tamen faciet, quisquis eum solum oratorem esse cõcludere voluerit: cùm etiã alij pleriq;, licet non omnia quæ velint, tamen plurima persuadeant. Concedemus igitur maiorem quidem, & meliorem oratorem esse Demosthenem: sed solum esse oratorem, non concedemus. Ita cùm sapientia sit humanarum ac diunarum rerum cognitio, quis nõ videt, nullum esse mortaliũ, qui res omnes diuinas atq; humanas cognoscat? Et tamen cùm eam cognitionem plerique participant, sapientes meritò vocantur: quoq; maiorem habent di-

uinarum atq; humanarū rerum cognitionē, eò sapien-
 tiores dici solent. Eodem igitur modo, cū libertatis
 natura ea sit, ut quocunq; modo voluerit, viuere pos-
 sit: fortasse nemo reperitur, qui sibi plenē in omni vita
 satisfaciat, licet omnibus naturaliter sit ingenta li-
 bertas. Quod si sapiens aliquis reperiatur, qui rebus in
 omnibus uiuat ut vult: non tamen solus ipse liber dici
 potest, quoniam etiam alij quamplurimi, quamuis non
 in omnibus rebus, tamen in pluribus, viuunt ut vo-
 lunt. Sit ergo per me sapiens ceteris longē liberior,
 modò intelligatur, nequaquam solum esse liberū, quo-
 niam homines omnes libertatis naturam participant:
 Et quò quis melior & sapientior per virtutem effici-
 tur, tantò etiam liberior euadit: atq; ita qui omnium
 est sapientissimus, est etiam omnium liberrimus. Sed
 quia nemo perfectē sapiēs esse potest, ideo neq; undiq;
 absolutam libertatem nemo consequitur. Atq; hic
 est primus modus quo peccat hæc Ciceronis ratiocina-
 tio: quòd scilicet à rei natura procedit ad hominum
 effectus, qui nunquam perfectē rei naturam exprime-
 re possunt. Alter est captionis modus longē apertior,
 quem à Cicerone non animaduersum esse vehementer
 admiror: cū enim omnis recta definitio, quemadmo-
 dum Dialectici volunt, ex genere constet, atque suis
 differentijs, & libertatis definitio sit hæc, quam affert
 Cicero, potestas viuendi ut velis: Potestas erit liber-
 tatis

tatis genus: ipsum verò, *Viuerē ut velis*, differentia. Et quoniam genus de suis formis omnibus generatim dicitur, verum erit dicere, *Omnis libertas est potestas*. Sed quia nequaquam hæc ratio reciprocatur, neque enim species de generibus dicuntur, non erit verum dicere, *Omnis potestas, est libertas*: contrahitur enim libertatis nomen ad vnā quandam potestatis speciem. Constat igitur, omnem libertatem in potestate sitam esse, quoniam omnes species in suis generibus sunt: sed potestas & actus, ut Aristoteles, & ceteri omnes Peripatetici docent, inter se plurimū differunt: ut quæ sunt in potestate, nequaquam tamen statim in actu sint: et præterea quæcunq; naturam suam habent in potestate, nequaquam ex actu denominantur, sicuti neque actus à potestate denominatur: ut homo, quamquam semper ridere possit, non tamen semper ridet, neque ridens ideo dicitur, quia ridere possit, sed ab ea proprietate non ridens, sed aptus ad risum dicitur. Cū igitur libertas in potestate naturam suam habeat, quia potestas est viuendi ut velis, certè non ab actu viuendi denominari debet. Itaque quamuis nullus in omnibus rebus omnino viuat ut vult, possunt tamen omnes esse liberi, quoniam viuendi ut volunt potestatem habent, quæ libertatis definitio atque natura est. Non enim dicit Cicero libertatem esse viuere ut velis: sed potestatem viuendi ut velis. Quare cū omnes homines (ut
alibi

alibi diximus) liberam habeant voluntatem, etiam ad honestatem animum applicare possunt, & vivere ut volunt: quò fit, ut omnes liberi sint. Decipitur autem in minori propositione Cicero, quoniam à potestate ad actum transit, cum ita format argumentationem, Libertas est potestas viuendi ut velis: Solus sapiens viuit ut vult. Oportebat enim hoc modo assumere, Solus sapiens potest vivere ut vult: quæ apertè falsa assumptio est, cum omnes liberam animi voluntatem habeant. Quòd si rectè velit argumentari, quæcunq; pro assumptionis approbatione sumuntur ab eo, in quibus rectè sapientem describit, falsa erunt. Non enim verum est, quòd tantum ille possit vivere ut vult, quicunq; recta sequitur, & qui gaudet officio, & quæ sequuntur. Quod autem ait Cicero, Igitur omnes improbi serui: facile concedimus, quatenus improbi sunt, eos esse peccatorum seruos: sed non tamè necessarium est, ut animi libertatem penitus amittant: quoniam quotiescunq; voluerint à peccatis se liberare, id in sua positum est facultate: quoniam ab immortalì Deo libertatem eam omnes consecuti sunt. Et quamuis omnes improbi serui sint, quoniam hoc negare non possumus: non tamen rectè concluditur, Omnes stultos esse seruos, quoniam non omnes stulti sunt improbi: licet contrà rectè dicatur, Omnes improbos esse stultos. Est enim stultitia genus quoddam, quemadmodum ex

Socratis sententia rectè Cardanius heri declarauit, cuius vna magna species est Improbitas. Sed improbitatem eam intelligimus, quæ à deprauato animo profiscitur: ut enim si Phalaris, aut Dionysius Tyrannus aliquid fortè iustè ac moderatè fecerit, non tamè ideo iustus, ac moderatus dicitur, quoniam nequaquam à iusto, ac temperanti animo, neq; ab habiturationi consentaneo; sed casu, & fortuita quadam animi inclinatione, actiones illæ proueniunt. Ita si quis vir iustus, ac temperans, in aliquam fortè iniustitiam, atq; libidinem inciderit, non tamen debet illico seruus, atq; improbus appellari: alioquin quis seruitutis nomen effugere poterit? cum nemo tam religiosus, nemo tam sanctus inueniatur, quin in aliquod aliquando peccatum incidat. Clamat enim ille sapiens Hebræus, Septies vno die peccabit iustus. Quòd si vera esset hæc Ciceronis sententia, septies vno die seruus fieret, atque ita nemo penitus mortaliū esset, quin graui seruitute præmeretur. Sint ergo hæc distincta, ut qui prauitate animi virtutem omnem, atq; honestatem negligit, & in omne scelus prolabitur, is omnino seruus appelletur: qui verò studio virtutis inuigilat & omnia honestatis adipiscendæ, fugiendæq; turpitudinis gratia facit, etiam si sæpenumero propter humanā imbecillitatem peccet, is liber est existimandus. Nam si seruitus est, ut ipse definit Cicero, obedientia fracti animi, & ab-

iecti, & arbitrio carentis suo, certè nemo, nisi vehementer improbus, & qui iam in vitijs ita callum obdlexerit, ut vel nullo modo, vel summa cū difficultate possit emendari, seruus dicetur: homo enim eiusmodi penè totum arbitrium suum amisit, & à vitijs ita obstrictus tenetur, ut nullam honestatis partem intueri possit. Cuius verò animus nondum ita fractus, atque abiectus est, ut arbitrio suo careat: sed ad honestè quidem viuendum est inclinatus, verum interdū in vitia aliqua prolabitur, quæ causa est, ut hic seruus dici debeat? Sint ergo serui illi, quicunq; signis, tabulis, calato argento, Corinthijs operibus, edificijs magnificis delectantur, si ijdem etiam sint improbi: quod si ceteris in rebus honestatem colant, nō video cur eos, qui Echionis tabula stupidi detinētur, aut aliquo signo Polycleti, debeant à te Cicero ineptiarū omnium serui iudicari. Quæ enim improbitas est, aut quæ malicia, tabulis & signis delectari? Profectò facere non possum, quin mecum aliquādo suauiter rideam, cū hæc Ciceronis argumenta perlego: cū enim proposuisset, improbos omnes esse seruos: quod quidē nos, etiam si non probet, facile cōcedimus: magnā deinde huius capituli partem in eis vituperandis consumit, qui tabulis, signis, & piscibus delectantur: perinde quasi hæc ea sint, quæ hominem improbum & seruum efficiāt. Sed tandem ad auaros reuertitur, qui cupiditate pecuniæ nullam

condie

cōditionem recusant durissimæ seruitutis: qui sine controuersia non tantum serui sunt, sed etiam nequissimi serui: quin etiam ambitiosos & nocentes, quibus magnus exoritur ex cōscientia peccatorum timor, seruos esse nequissimos cōcedimus. Sed quæ causa est, ut eam eloquentissimi viri L. Crassi orationem vituperes Cicerone, qui populum Ro. rogabat, ut se ex seruitute eriperet, his quidem verbis: Eripite nos ex seruitute, nolite sinere nos cuiquam seruire, nisi vobis vniuersis, quibus et possumus, & debemus. Quæ causa, inquam, est, cur hanc orationem vituperes? Quia, inquit, dominum mutare, non liber esse vult. Quid ergo? vis omnes ita liberos esse, ut nemini seruiant? an non vides quantam rerum omnium confusionem inducas? ita enim neq; filius patri, neq; vxor marito, neq; populus magistratibus obediens, ne in seruitutem incidat. Sed nimirum, Cicerone, ludis in ambiguis, & verbatantum consecrari videris, rem autem ipsam negligere. Nam quis non intelligit, aliam animi, aliam corporis esse seruitutem? & aliam qua uitiorum serui dicuntur homines, aliam qua legum, populi, senatus, magistratuum serui quodam modo vocantur? potest enim vir probus animo liber esse, corpore autem seruus: & præterea debent omnes (ut ais) quod est turpe non reddere, & in libertatem à vitijs sese vindicare: non tamen ideo quisquam debet in libera ciuitate, qualis erat Roma populi

quoddam imperium detrectare, neq; Senatus, neque eorum, qui sunt in aliquo magistratu, præsertim si nihil imperent, quod ab honestate sit alienum: non enim idem est, vitij, & populo Rom. servire. Quamobrem eos reprehende Cicero, qui vitiorum servi sunt, qui virtutem omnem atq; honestatem negligunt, qui libidini atq; turpitudini parent: nam isti rectè reprehenduntur: L. autem Crassum cur accusas? qui se non turpitudini, non dedecori, sed populo Romano, hoc est ei populo, cui tu semper serviisti, servire velle dicit. Atq; hoc quidem ita commodè facere potest, ut animi sui libertatem semper inuiolatam conseruet, modò se nulli vitio mancipauerit. Hic dicendi finem fecit Octavianus, cuius orationem omnes, & præsertim Marcus, mirificè laudauit: quòd tam ingeniosè verba fecisset, ut & quæ verisimilia essent Ciceroni concessisset, & tamen eum multis in locis errasse non leuiter ostendisset: quodq; ea rerù varietate suam orationem illustrasset, ut quamuis acutè disputasset, magnam tamen in dicendo, perpetuamq; oblectationem auditoribus attulisset. Tum Antonius, Illud magis, inquit, admiratus sum in Octauiano Marce, quòd cū ita exorsus fuisset, ut quid diceret habere non videretur, tamen ita postea copiosè locutus est, ut me certè mea facultatis in dicendo poeniteret. Gaudeo, (inquit Octavianus) ut Hector ille Neuianus laudari me à

me à laudatis viris, quamuis à vobis istas laudes sanè non sperabam: satis enim me affecuturum initio putabam, si non omnino malè dicere viderer. Nunc eo maior est lætitia mea ex laudatione vestra, quò minus sperata fuit. Sed quid ait Maioragius noster. Ego ne (inquam) te ingeniosum, & acutum adolescentem, quòd semper iudicavi: non ita tamen, ut speres à te refutatum esse Ciceronem. Tuæ igitur, inquit Cardanus, erunt partes, Ciceronis sententiam tueri. Verùm iam mihi tempus esse videtur, ut exurgamus: et quoniam satis animos oblectauimus, suam etiam corpori temporis partem tribuamus. Vnum autem tantum caput superesse video, quod (ut spero) Constantinus hodie subuertet.

M. ANTONII MA-
IORAGII ANTIPA-
RADOXON LIBER
SEXTVS.

*



AC ab omnibus approbata sententia, nos ad paratum prandium, in gynecæo, quo in loco pridie eius diei Cardanus disputauerat, alacres propter summam loci amœnitatem contulimus: cumq; ibi multas
o 3 horas

horis varijs de rebus inter nos collocuti fuiffemus, inclinato iam in pomeridianum tempus die, Velim (inquit Cardanus) ut hæc noſtra diſputatio perficeretur, quoniam in urbem redire hodie veſperi mihi neceſſe eſt. Itaq; tempus mihi videtur Conſtantine, ut in arenam deſcendas, & ſapientem illum Stoicorum, quem ſolùm diuitē eſſe Cicero vult, ſuis diuitijs ſpolies. Nam te diuitem eſſe ſcimus omnes, quamvis eo modo ſapiēs non ſis, quo Stoici ſapientem fingunt. Præſtabo (inquit ille) quod pollicitus ſum: ſed ſcito Cardane, me ferè animo cecidiſſe, poſtquam copioſam, & elegantem Octaviani orationem audiui. Nam præterquam quòd me video nullo modo parem in dicendo illi eſſe poſſe, multa etiam dixit, quæ ego in hac mea parte dicere præmeditatus fueram: quæ ſi repetere voluero, ineptus videar: ſi relinquo, vereor ne oratio mea, in quâ de Diuitijs locuturus ſum, inops, atq; adeo mendicæ eſſe videatur. Verùm tamen quo ad facultas mea feret, enitar, ne cùm cæteræ partes huius diſputationis benè peractæ ſint, extremus hic actus tanquam ab inertī poëta neglectus eſſe videatur. Quid igitur ait extremo in Paradoxo Cicero? Solùm ſapientem eſſe diuitem. hoc ſanè ab eodem fonte manauit, unde cætera omnia, quæ hoc in opere diſputantur: itaque non difficilius, ut ſpero, ſubuertetur, quàm cætera ſubuerſa ſint. Primum igitur oſtendam, Paradoxon hoc eſſe

esse falsum, & alienum à Socratica doctrina. Deinde
 Ciceronis argumenta nullius esse ponderis ad id quod
 proposuit ostendendum. Atq; ut ab ipso Diuitiarum
 nomine proficiatur oratio mea, nemini dubium esse
 potest, quin eo nomine res illæ tantum (si propriè loqui
 volumus) intelligantur, quæ ad usum corporis neces-
 sariæ sint. Et hoc est, quod nono de Repub. libro Plato
 dixit: Diuitias corporis gratia constitutas esse, corpus
 autem ipsum animi gratia. Et ipse Cicero primo de
 Officijs, Expetuntur autem, inquit, diuitiæ tum ad usus
 vitæ necessarios, tum ad persfruendas voluptates. Et in
 libro de Amicitia, Cæteræ res quæ expetuntur, inquit
 opportuna sunt singula rebus ferè singulis, diuitiæ ut
 utare, opes ut colare, honores ut laudare. Quin etiam
 hoc in Paradoxo, quasi veritate coactus, quod scilicet
 non ad animum, sed ad corpus diuitiæ referantur, di-
 uitem ita definit, ut eum dicat esse, cui tanta possessio
 sit, ut ad liberaliter viuendum faciliè contentus sit.
 Quod si quis maxima virtute præditus sit, ut cæteris
 omnibus sapientia præstet, tamen nisi adsint aliquæ
 diuitiæ, nullo modo liberaliter viuere poterit. Atque
 ideo quoniam sine diuitijs commodè nemo viuere po-
 test, eas pleriq; viri doctissimi magnis laudibus extu-
 lerunt: adeo ut Theognis dicere sit ausus, Etiam si-
 quis Rhadamanti sapientiam, & Sisyphi scientiam
 exuperaret, nullam tamen earum virtutum illi usum

fore, nisi adessent diuitiæ. Et Euripides, Diuitias idē
 pretiosissimas esse dixit, quoniam maximam homini-
 bus potentiam præstant. Quod idem affirmat etiam
 Theognis. Nam Hesiodus, atq; Timocles, Sanguinem
 & vitam hominibus esse diuitias asserunt. Magnus
 autem orator ille Demosthenes, summa quadam cum
 orationis gravitate clamat, atq; aperta voce testatur,
 Necessarias esse pecunias, & sine illis nihil omnino
 geri posse quod præclarum sit. Quin etiam interroga-
 tus aliquando Simoniades, utrum magis eligendum
 esset, Diuitias ne possidere, an Sapientiam? Nescio,
 inquit: Sapientes enim ad diuitum ianuas frequenter
 accedere video. Sed nusquam sanè clarius expressum
 466. legi, quantæ sint utilitatis diuitiæ, quàm apud Stobæum,
 qui plurimas ex Græcis autoribus sententias, & præ-
 clara dicta collegit: ibi enim Pluto Diuitiarum Deus
 inducitur, qui pluribus verbis potētiam suam extollit,
 & iactat se solum hominum necessitatibus subuenire,
 atq; illas emendare, cupiditates explere, damnis resi-
 stere, curare corpus, animo gratificari, in pace splen-
 descere, militiæ sumptus suppeditare, ægrota corpora
 planè confirmare, singulis anni temporibus adiuven-
 ta reperire: nam hyeme calorem, æstiuo tempore fri-
 gus præstare: familias amplificare, magnarumq; co-
 gnationum successines: nuptias præterea magnificè
 preparare, liberorum generationem promouere. Quid
 autem,

autem, inquit: an non Deorum immortalium templa
solus ego exornare soleo? an non ciuitates omnes opera
mea pulchriores efficiuntur? opera mea sunt moenia,
portus, classes: ego profundos amnes pontibus instruo,
terrasq; diuulsas atq; disſitas facile coniungo, mea praesentia negotiatores indigent, ex arario meo sumptus agricultura sibi depromit, nihil enim ex se terra producit, nisi prius aliquid à me receperit, unde enim aliunde accipiat, cum ego solus omnia possideam? neq;
est ex alijs omnibus quicquam cui non ego plurimum commoditatis impertiam: hominũ enim formam atq;
pulchritudinem ornamentis meis non mediocriter augeo, disciplinis omnibus praeceptores exhibeo. unde autem sibi mulieres ad lanificium vellera comparare possunt, unde arma viri? Ebur, aurũ, ceteraq; omnia, quibus vel Deorum simulachra conſtantur, vel quae in templis reponuntur, mea sunt: propter me ciuitates magnae sunt, propter me regna potentiora. Ego dies festos cum iucunditate celebro, mihi mensa semper est hospitalis, à me prompta beneficia proficiſcuntur, à me remunerationes amplissima: quicunq; me possidet, nõ solum ipse fortunatus vitam agere, sed alijs etiam fortunas suas communicare potest. Ego artes omnes meliores efficio, quoniam eis magnam mei spem atq; expectationem concito: fouentur enim mercedis magnitudine, quam illis suppeditare soleo. Atqui tu certè

summe Iupiter diuitiarum vsum mortalibus necessarium effecisti: corpus enim eis dedisti, quod non ut reliquis animantibus pilis ac pellibus munitum est, sed omnino vestibus indiget: deinde non alimentum eis herbas, neq; cetera id genus, quæ ex terra sua sponte gignuntur produxisti, sed aliquid ad victum quotidie coemendum, atq; præparandū esse voluisti. Idem ipse domos construī, & ciuitates habitari necessitate quadam constituisti: morbis quoq; tentatur hominum corpora, quibus sanandis pecunia opus est. Cur igitur non me felicem vocas, cū per me rerum omnium vñibus fruaris? Hæc sunt quibus verissimè Pluto gloriatur, qui solus verè diues, quamuis non sit sapiens, etiam ex Stoicorum sententia vocatur. Nam secundo de natura Deorum Cicero Stoicorum sententiā secutus, ait: Diti, qui Græcè Pluto dicitur, ideo terrenam omnem vim, atq; naturam esse dedicatam: quoniam diuitiæ omnes è terris oriuntur, & in terras recidunt. Quod etiam in Cratylo Plato affirmat, cuius hæc verba sunt: Plutonē vocant quasi diuitiarum datorem, quoniam diuitiæ ex terræ visceribus erūntur. Quæ cū ita sint, quid in mentem venit Stoicis istis nominum captatoribus, ut à propria significatione verba transferentes, in sapiente suo, qui nusquam reperitur, ut Octavianus egregiè docuit, omnia esse velint? Non enim tantū diuitem, sed Regem, sed Imperatorem, sed solum liberum,

solum

solum honoratum, solum verum omnium opificem optimum sapientem esse dicunt: ut rectè luserit Horatius in eum, qui dixerat, Sapientem regum esse regem:

— Vellunt (inquit) tibi barbam

Lasciui pueri: quos tu nisi fuste coërces,

Vrgeris turba circum te stante, miserq;

Rumperis, et clamas, magnorum maximè regum.

Sed certè illud perspicuum est, quòd si propriè loqui volumus, ut sibi ipse cōtradicat Cicero necesse est. Nam in primo Paradoxo diuitias in bonis non esse numerandas persuadere conatur: quippe quæ neque meliorem, neq; laudabiliorem virum efficiant. In hoc autem extremo, solum sapientem esse diuitem vult. Ita fit, ut quoniam omnia, quæ veræ bona sunt, sapiens possidet, in veris bonis diuitiæ numerandæ sint. Sed dicent aliqui, in primo capite de his, quæ propriè diuitiæ dicuntur, verba fecit: hoc autè loco de animi diuitiis. Quid igitur tibi faciam Cicero? si nouo quodam more atq; inusitato cum Stoicis loqui velis? nam ego Socratem, Platonem, Aristotelem, quos vehementer autores sequor, non ita loquentes video: sed quories de Diuitiis verba faciunt, eas intelligunt, quæ ad usum corporis comparari solent, quas qui possident, diuites ab eisdem appellantur, etiam si minimè sapientes sint. Quæ sint autem veræ diuitiæ, primo de Repub. docet Aristoteles: nam ibi diuitiarum duo esse genera tradit, quorum alterum
natur

naturale sit, alterum artificiosum: quæcunq; enim in
 terris gignuntur, ad usum hominum omnia creari exi-
 stimat. Itaq; agriculturam, pastorem artem, vena-
 tionem, piscatû, aucupium, ceteraq; id genus, ex qui-
 bus vite commoditates, opportunitatesq; capiuntur,
 diuitias naturales appellat. Et certè, inquit, his veræ
 diuitiæ contineri videntur. Alterum autem genus di-
 uitiarum est in pecunijs, hoc est in nummis, qui non ad
 usum corporis adhibentur, sed in rerum commutatio-
 nibus, hoc est emptionibus, & venditionibus plurimû
 valent: qua quidem (inquit) arte factum est, ut diui-
 tiarum, & possessionum, neq; modus ullus, neq; finis
 esse videatur. Diuitiæ igitur naturales certæ sunt,
 atq; definite, quoniam ad usum tantû corporis ac-
 commodantur, non aliter atq; instrumêta quædam ad
 usum suum. Artificiosæ verò diuitiæ sunt eiusmodi,
 ut qui eis deditus sit, nunquam expleri aut satiari pos-
 sit. Vnde mater omnium malorum (ut eam Bion ap-
 pellare consueuerat) nata est Auaritia. Iure igitur
 optimo damnatur eorum cupiditas, qui propter pecu-
 niam nullum quæstum turpem putant: qui quotidie
 fraudant, decipiunt, auferunt, eripiunt, quoniam non
 ad usum vite necessarium querunt diuitias, neq; illas
 quæ veræ diuitiæ nominantur. Quòd si vera est Ari-
 stotelis sententiâ, ij certè verè diuites appellari possunt:
 non qui magnum pecuniarum numerum congestum
 habent.

habent, ut vulgus existimat: neq; qui cœlo & terra
 frui possunt & sapientes sunt, ut Stoici nugantur, de
 quibus in epistola quadam ad Trebatium ita scribit
 Cicero: Ballus mihi confirmavit, te diuitem futurum: “
 id utrum Romano more locutus sit, benè nummatum “
 te futurum: an quomodo Stoici dicunt, omnes esse diui- “
 tes, qui cœlo & terra frui possunt, postea videro. Sed “
 ij, qui res eas possident, quæ sibi ad usum vitæ necessa-
 riæ esse videantur: hi (inquam) verè diuites appellan-
 tur, quos in hoc Paradoxo describit rectè Cicero, cùm
 se probare putet solum sapientem esse diuitem: de qua
 re postea diligentius verba faciemus, cùm Ciceronis
 argumenta discutiemus. Nunc autem tantum decla-
 ratum sit, duobus modis hominem posse diuitem ap-
 pellari: vel, ut vulgò existimant, qui pluribus pecu-
 nijs, & possessionibus abundat: vel, ut Aristoteles,
 & reliqui sapientes credunt, qui veras diuitias possi-
 det: hoc est, ea quæ ad usum vitæ accommodantur, ex
 quibus victus & vestitus constat: atq; hic solus verè
 diues nominatur, quæ quidē etiam apud antiquos La-
 tinos appellatio fuit, ut ij tantum diuites vocarentur,
 qui vel agros, vel pecudes possiderent: quod Ovidius
 in Fastis attestari videtur his quidem verbis:

diuites
vere

Aut pecus, aut latam diues habebat humum.

Hinc etiam locuples, hinc ipsa pecunia dicta est.

Iam igitur inuenimus eum, qui verè diues sit; nempe,
 qui

qui tantas habeat facultates, ut ei ad victum & vestitum nihil desit. Videamus nunc, an solus sapiens sit eiusmodi. Quo in loco possum à Cicerone iure optimo petere, an sapientia sit ad corporis usum necessaria? Quod cum mihi responderit, ad animum tantum, non ad corpus sapientiam pertinere: statim contra eum concludam, nihil igitur sapientie cum diuitijs, neque quicquam sapienti cum diuite est: quoniam ad corpus diuitia, ad animum sapientia refertur. Quod si dicat, eundem & sapientem & diuitem esse posse: quoniam nihil prohibet, eum qui sapientiam adeptus est, etiam ea possidere, quæ ad usum vitæ necessaria sint. Id facile concedam: sed non tamen ideo sequetur, ut solus sapiens diues sit: quoniam hæc inter se distingui, atque separari possunt. Sunt enim quamplurimi verè diuites, quibus nihil ad victum atq; vestitum deest, et qui nullas amplius pecunias quærunt, qui tamen sapientes non sunt, sed stulti potius, atq; insipientes. Contrà verò facile fieri potest, ut aliquis magna sapientia præditus sit, & tamen nihil habeat unde vitam sustentare possit: quin potius fame, atq; siti laboret, & nihil illi sit, quo suum à frigore corpus defendat. Quod si vera esse hæc Ciceronis sententia, necessitas cogeret, ut etiam vicissim hæc ratio retrò commearet hoc modo: Solus sapiens est diues: ergo quicumq; diues est, ille etiā est sapiens, ut si quis dicat, solus homo ridet: necessario sequitur

sequitur, ut quodcūq; rideat, illud sit homo. Cū enim solum sapientem esse diuitem dicimus, alios omnes à diuitijs expellimus: itaq; fit, ut quicūq; diuitias possidet, eum inter sapientes numeremus: perinde quasi diuitiae sint effectrices sapiētiae, quas in octauo de Rep. Plato plurimum à virtute discrepare tradit, cuius haec verba notauimus: Ita virtus à diuitijs discrepat, quasi utraq; in lance statera sint posita, semperq; in contrariam partem declinent. At verò quinto de legibus, idem Plato non solum sapientem (quod ait Cicero) diuitem esse solum non vult: sed neq; etiam valde diuitem bonum virum esse posse ostendit. At qui (inquit) honestè sumptum facit, & iustè solum acquirit, neq; facillè diuitijs excellere vnquam, neq; premetur inopia. Rectè itaq; sermo noster asserit, valde diuites bonos viros non esse. Quòd si boni non sint, felices quoq; non erunt. Ad Dionis autem propinquos atq; amicos scribens, quadam in epistola, Diuites, inquit, beatos appellare, sermo amens est. Non igitur sapientiam afferunt diuitiae: sed potius (ut ait Aristophanes) tanquam improbus quidam medicus, cū ad nos videntes & sanos accesserint, statim occaecare solent. Atque hac de causa dixit Euripides, Res quidem grauis est et mala, stolidum esse, atq; improbè viuere: sed quae tamen diuitibus sit innata. Sed quae huius rei causa est? an quia caecae diuitiae, cū eius consuetudinē habent, ipsi quoq;

mentem

mentem propter fortunas occacatam habet? Nec male
sanè dixit Socrates, Diuitiæ non tam honestati, quàm
improbitati seruiunt: quoniam hominum ignauia, atq;
socordia licentiam parant: & iuuenes ad voluptates
instigare solent. Sed hæc sanè vitia (decet enim inge-
nuè loqui) non in ipsis diuitijs sunt, sed in hominũ ani-
mo deprauato. Nam, vt Elenchorum secũdo rectè ait
Aristoteles, diuitiæ simpliciter, ac per se, bonæ sunt:
sed insipienti homini, qui illis vti nesciat, non amplius
bonæ, verùm malæ potius efficiuntur. Itaq; si dixisset
7 Cicero, Solum sapientem rectè diuitijs vti, fortasse to-
lerari potuisset, quoniam in eo: quod rectè facit, nõ im-
merito quilibet sapiens appellari potest. Sed cùm solum
sapientem velit esse diuitem: non video, quomodo hoc
defendi possit. Quod si viderem eum de bonis tantum
animi verba facere, & diuites eos solos appellare, qui
maxima virtute, atq; honestate præstarent etiam si
8 nullas omnino diuitias possiderent: improprie quidem
eum locutum fuisse iudicarem: sed tamẽ intelligerem,
ab eo diuitias non eas appellari, quæ ad vsum corporis
necessariæ sunt, sed quæ animum bonis moribus exor-
nant. Video enim hoc & à Latinis, & à Græcis scri-
ptoribus aliquando fieri, vt diuitiarum nomen ad ea
quæ sunt animi bona transferant: vt in primo de Ora-
tore Cicero ipse, In oratione Crassi, inquit, diuitias ac
ornamẽta eius ingenij per quedam inuolucra, atq; in-
regum

regumēta perspexi. Et Ovidius de Tristibus secūdo:

Diuitis ingenij est, ingētia Cæsaris acta Scribere.
 Et Plato septimo de Repub. libro: In ea siquidē sola, cic. 2. 7. 14.
 inquit, verē diuites dominabuntur: non auri dico, sed
 cuius oportet virum beatum diuitem esse, vitæ probæ,
 atq; prudentis. Atq; ex hoc fortasse loco (ut opinor)
 Cicero putauit, solum sapientem à Socrate diuitem ap-
 pellari: nec vidit hanc allusionem quādam esse ad id,
 quod passim fieri solet. In omnibus enim ferē ciuitati-
 bus ditiores dominari solent. Hac de causa dixit Pla-
 to: Volo ut hæc vulgaris consuetudo immutetur in ci-
 uitate mea. Nam quemadmodum in alijs diuites do-
 minantur, hoc est qui magnas, & amplas possessiones
 habent: ita in ciuitate mea diuites quidem domina-
 buntur: sed non auri, neq; argenti diuites, verū ea-
 rum rerum, quæ beatum hominem efficiant, quæ rectē
 animi diuitiæ possunt appellari. Verū Cicero passim cic.
 hæc in toto capite confundit, ut nunc de corporis, nunc p. 2. 1. 2.
 de animi diuitijs loquatur. Itaq; nullo modo potest id
 quod vult efficere. Nam cū diuitem eum esse defi-
 niat, cui tanta possessio sit, ut ad liberaliter viuendum
 facilē contentus sit: qui nihil quærat, nihil appetat, ni-
 hil optet amplius. Hac certē ad corporis diuitias ora-
 tio pertinet. Quare plures eiusmodi diuites reperiri po-
 terunt, qui nequaquam sapientes sint. Neq; enim hæc n. cic.
 ratio concludit, Contentus est ad liberaliter viuendum,
 p nihil

nihil appetit, nihil optat amplius: ergo sapiens est. Neq;
hac est vera sapientis definitio. Alioquin hac ratione
plurimi adolescentes, atq; adeò pueri sapientes essent.

Quot enim stulti? quot adolescentes? quot pueri reperiuntur, qui de congerendis diuitijs nihil cogitant? qui contenti sunt ijs quæ habent? nihil appetunt amplius, nihil optant? Sed concedamus sanè eum esse diuitem

(non quidem, ut vulgò existimant, atq; ut ipsum verbum propriè capitur, sed translatione ad animum facta) qui magna virtute atque sapientia præditus est.

Quid tibi hæc nostra cōcessio proderit Cicero? an ideo confectum esse putabis, solum sapientem esse diuitem?

sic enim diues iste tuus sapiens, qui nusquam reperitur, quoniam etiam à Platone nōnunquam, qui probus vir sit, & prudenter viuat, diuitem appellari video. Sed eum solum esse diuitem, non cōcedo. Nam si de ijs, quæ

veræ diuitiæ vocantur, quæ ad vsum vitæ necessarium pertinent, verba facimus: perspicuum est, ab eis excludi sapiētem: neq; enim eas solus possidet, sed etiam

aliij multi, qui nequaquam sapientes sunt. Sin autem de animi diuitijs loquamur, quantò quisq; sapientior erit,

tantò etiam ditior appellari poterit. Verùm si tantum eum sapientem appellare voluerimus, qui virtutibus

omnibus instructus sit, in quem nulla penitus animi commotio cadat, qualem in Tusculanis ex Stoicorum

sententia depingit Cicero: cum nullus homo talis sit,

aut esse possit, ne ullus quidem erit, aut esse poterit diues. Si verò sapientem eum existimemus, qui pro viribus suis sapientiam amplexus, ceteros homines, aut vniuersos, aut plerosq; saltem exuperat: non tamen ille solus diues erit animo, quamuis sit omnium ditissimus: sed etiam omnes alij, quicunq; virtutem atq; honestatem participant, animi diuitias habere rectè dici poterunt. Sed quid multis opus est? cum satis probari possit, si de animi diuitijs loquamur, eos potius sapientes appellari: qui pauperes sint, quàm qui diuites. Nam si velim ego Paradoxon hoc Ciceronis alio Paradoxo, longè veriori, atq; Christiano tanquam clauum (quod aiunt) clauo trudere: facile probare possem, solum sapientem esse pauperem. Nam in sacris literis ubiq; ferè diuites ab aeterna vita, atq; beatitudine repelluntur, omni virtute spoliuntur, inanes dimittuntur: Pauperes verò contrà beati nuncupantur, eis solis aeterna fœlicitas, & cœleste regnum promittitur, esurientes veris bonis implentur. Dicuntur autem illi animo pauperes, qui sapientiæ studio, atq; siti, nunquam expleantur, aut satiantur: qui se imperitos, atq; insipientes semper existimant: qui nullam discendi occasionē prætermittunt: qualem Socratem fuisse legimus, qui se tantum vnum scire prædicabat, quòd nihil sciret: qui in Apologia sua Sapientiam humanam ait nullius esse momenti, solum autem Deum esse sapientem. Talis fuit Py-

thagoras, Plato, Democritus, Anaxagoras, alijq; penè innumerabiles, qui sapientiæ desyderio atq; amore capti, suas etates in perpetua peregrinatione consumpserunt. Nam de nostris religiosissimis, atq; sanctissimis viris, quorū maxima fuit copia, nihil dicam: ne sacra (quod aiunt) profanis immiscere videar. Itaq; non alia de causa celebratum apud Græcos illud fuisse prouerbium existimo, quod sola paupertas sapientiam sortita sit, nisi quia nullus omnino sapiens fieri potest, nisi qui sit animo pauper: quamuis apud Græcos omnis paupertas miris laudibus exornetur: nam eam morū Magistram esse Menander dixit: & præterea pauperes in tutela Deorum semper fuisse existimatos. Diphilus autē, homine paupere nihil fortunatius esse, scriptum reliquit. Quin etiam Altianus in historia sua tradit, pauperrimos fuisse Græcorum optimos, Aristidem Nicomachi filium, Phocionem Phoci, Epaminondam Polymodis, Pelopidam Thebanum, Lamachum Atheniensem, Socratem Sophronisci filium, & Ephialtem Sophonidæ. Sed in hac parte nequaquam longior esse volo, quoniam nō de corporis, sed de animi paupertate loquimur, quæ vera est sapientia: neq; enim quisquam ullam sapientiæ partem acquirere poterit, nisi prius ea se egere cognoscat: quoq; magis aliquis sapiens fit, tantò pauperior animo fieri solet: & tunc appellari sapientissimus meritò potest, cū se pauperrimum esse

esse cognouerit. Non enim alia de causa Socrates (ut ipsemet fatetur) omnium sapientissimus ab oraculo iudicatus fuit, nisi quia nihil omnino se scire profitebatur, hoc est animo pauperrimum esse. Quod nisi viderer, ne mihi Maioragius succenseret, mysterium quoddam è Platonis disciplina, quod ab eo nuper didici, vobis patefacere non dubitarem: ut intelligeretis, unde natus sit amor sapientiæ, neminemq; mortalium posse rectè diuitem appellari. Hic ego, Nihil est, inquam, quod vereare Constantine, quæcunq; didicisti liberè pronunciare. Licet enim ego soleam ea vocare mysteria, quæ apud Philosophos cum religione nostra conuenientia quodam arcandò modo reperio: non tamen eiusmodi ea esse existimo, ut enuntiare nefas sit. Dicam igitur (inquit ille) quod in conuiuio suo Plato scribit de cœlestis amoris ortu, qui nihil aliud est, quàm æternæ pulchritudinis atque sapientiæ desiderium. Ait enim, diuinum hunc Amorem in hortis Iouis, in natali die Veneris, è Paupertate natum esse, cum qua Porus Consilij filius, nectaris ebrius, rem habuerat. Quibus in verbis licet multa mysteria sint, illud tamen solùm patefaciam, quod ad hanc disputationem pertinere videatur: atq; illud primo dicam, Porum nihil aliud significare, quàm rerum omnium pulcherrimarum copiam. Quòd autem Porum velit Plato Cōsilij filium esse: idem est, ac si diceret, Dei filium:

nam Consiliū pro Deo ipso, etiam apud Theologos nostrōs, aliquando reperitur, qui Christum Dei filium magni consilij Angelum appellare quādoq; solent. Est igitur Porus Consilij filius: hoc est, à Deo rerū omnium pulcherrimarum copia provenit. Sed hic Porus cum Penia, hoc est cū Paupertate cōmiscetur, ut Amorem generet. Penia igitur, quæ Paupertas est, nihil aliud apud Platonem significat, ut summis Platoniorum placere video, quā mentem eam, quæ diuinæ illius copię particeps fieri concupiscit: quæ cū Porū videt, hoc est diuinas diuitias, mirifico statim eius amore capitur. Nascitur ergo sapientiæ studiū ex eo, quod mens nostra paupertatem suam agnoscit, & in Deo bona omnia esse intelligit, quorum particeps fieri vehementer exoptat: quoq; magis eorum bonorū amore inflammatur, tātō magis virtuti, atq; honestati dat operam, ut eis possit aliquando perfrui. Sed ea bona nemo, nisi qui sapiens esse incipiat, agnoscere potest, neq; desiderare omnino. Quò fit, ut iure optimo solus sapiens pauper appellari possit: quoniam sicut ij, qui se corpore pauperes esse cognoscunt, & ea sibi decesse, quæ ad vsum vitæ necessaria sunt, semper habere desiderāt: ita qui vident animū suum diuina illa sapientia ad benè beatq; viuendum indigere, ad eam acquirendam omni studio cōtendunt. Nam (ut argumēto Ciceronis utar) cui quæsito opus sit, nemo vnquam hunc verè dixerit diuit

diuitem: est enim diuitiarum animi fructus in copia, copiam autem declarat satietas, quam quoniā in hac vita sapiens nunquam assequitur, quippe qui nunquam discendo, atq; proficiendo, studium sapientiæ remittit, nunquā omnino, dum uiuet, est futurus diues. Improbi autem, atq; insipientes, qui vera bona non agnoscunt, ea nunquam desyderant, atq; ideo nequaquam animo pauperes appellantur: quin potius se probos, atq; sapientes viros nominari volunt. Hi sunt diuites illi, de quibus in Euangelio legimus, Facilius esse rudētem, atq; funem nauticum per foramen acus transire, quā eiusmodi diuitem, beatorū sedes ingredi, atq; æternam consequi beatitudinem. Sed iam satis (ut opinor) declaratum est, nulla ratione verū esse, quod ait hoc in Paradoxo Cicero, Solum sapientem esse diuitem. Reliquum est, ut ipsius Ciceronis argumēta diluamus: nisi fortē quis vestrum, aliquid adhuc hac in parte desyderat. Tunc Octauianus, qui plurimū Ciceroni sauebat, Rectē sanē, inquit, Constantine & Historicū, & Philosophum, & Theologum egisse mihi videris, atq; omnem mouisse lapidem, ut Ciceronis sententiam euerteres: quæ tamen (ut mihi quidem videtur) si non omnino vera, tamen omnino probabilis est: siquidem sole animi diuitiæ, veræ diuitiæ debēt appellari. De hoc, inquit Constantinus, viderit Maioragius, quem credo nobis omnibus propediem responsurum, cum ut

Ciceronem suum ab hac nostra accusatione liberet: tum etiam, ut nobis auditoribus, atq; discipulis suis, veritatē aperiat: atq; doceat, quibus in rebus decepti fuerimus. Faciam (inquam ego) Constantine, longeq; libentius posthac vos docebo, quoniam video labores meos non interire: neq; enim unquam existimassem, quemquam vestrum me præceptore tantum profecisse, ut tam copiosè, & tam argutè, præsertim contra Ciceronem disputare possentis. Sed absolue, quæso pensum tuum, ut in urbem hodie redire possimus. Tunc ille, Pauca sunt, inquit, quæ mihi restant: nam in superiori disputatione mea ferè omnia dixi, quæ contra hæc Ciceronis argumenta dici possunt. Sed illud mirum mihi maximè videtur, quòd cum sapientem solum esse diuitem Cicero probare velit, auaritiam tantum insectatur, perinde quasi qui non sit auarus, ille statim sapiens sit. Perlegite totum hoc ab initio caput ad finem usq;: & si vitium aliud præter auaritiam damnari videritis, tunc me fallacem, & captiosum existimate. Nam principio diuitem auarum interrogat, an solum se diuitè existimet: deinde ex definitione diuitis probare contendit, eum, qui sit auarus, diuitem non esse: quod etiam nos facile concedemus, qui veras diuitias ex Aristotelis sententia diximus eas esse, quæ tantum ad usum corporis necessariae sunt: nam postea mihi Cicero præuaticari videtur, cum ait, Si tibi nihil deesse putas,

putas, nihil curas amplius, satiatus es, aut contentus
 etiam pecunia, concedo diues es. Quid ais Cicero? an
 non plurimi & adolescentes, & etiam seniores repe-
 riuntur, qui nihil sibi deesse putant, quoniam ditissimi
 sunt, nihil diuitias curant, quin potius eas profundunt,
 dilapidant, abijciunt: ergo isti tuo iudicio sapientes
 erunt? quia concedis eos esse diuites, & solum sapien-
 tem esse diuitem vis? Quid igitur attinet pecuniarum
 auiditatem solam improbare, cum videas plurimos ho-
 mines, imò potius omnes prodigos, quàm diuites sint,
 nequaquam tamen esse sapientes? Quare disertus sis,
 & eloquens in eis improbandis, qui nullum quæsum
 turpem putant, qui quotidie fraudant, decipiunt, spo-
 liant, testamenta supponunt, ceteraq; infinita flagitia
 propter inexplebilem habēdi sitim perpetrant: modò
 intelligas, te his rationibus quod proposuisti probare
 non posse. Nō erat diues Crassus, ut ipse existimabat,
 quoniam ex suis possessionibus non tantum reficieba-
 tur, ut ex eo tueri sex legiones, & magna equitum, ac
 peditum auxilia posset. At erat fortasse diues Lucul-
 lus, cuius domus (ut scribit Plutarchus) literatis omni-
 bus patebat: qui post Mithridaticam pugnam nihil
 amplius curabat, satiatus erat, atq; cōtētus pecunia:
 non tamen cum tunc sapientem fuisse dices, cum è po-
 testate mentis exhibat, et insaniebat. Eiusdem generis
 sunt reliqua omnia argumenta, quare omnia illa facile

concedo, & prætereo, quæ contra me nihil facere videantur. Ad illud venio, quod ait: Hæc profectò, quæ sunt summarū virtutum, pluris æstimanda sunt, quàm illa, quæ sunt pecuniæ. Verissimè Cicero: quis enim, nisi improbus, de hac re dubitare possit? quare totū etiam illud concedo, quòd nulla possessio, nulla vis auri, & argenti, pluris quàm virtus æstimanda sit: verū quid hæc tibi prosunt ad id probandū, quod suscepisti? quamvis enim pluris æstimanda sit virtus, quàm pecunia, non ideo tamen efficitur, ut solus sapiens dives sit, aut ut penitus negligenda pecunia sit, quam ipsemet aliquo pretio æstimandā esse confiteris, cū pluris virtutem æstimari velis. Rursus ad ineptias redis: improbas eos, qui tecta aurea in villis, & sola marmorea faciunt, & signa, tabulas, suppellectilem, & vestem infinite concupiscunt: quos etiam ego tecum, si volueris, condemnabo. Verū illud mihi respondeas velim, utrum censeas eum, qui cū habeat quæ necessaria sunt ad commodè viuendum, neq; plura desideret, esse sapientem? Hoc sanè tuo iudicio verissimum est. Sed ego certè non video, qua ratione verum esse possit: nisi fortè eundem stultū, & sapientem esse posse censeas. Facile enim fieri potest, ut qui stultus est, habeat omnino quæ ad usum vitæ necessaria sint, neque plura concupiscat: qui certè dives dici poterit: tu vide, an hunc etiam sapientem velis appellare. Ego certè nō

tam

tam insanus sum, ut qui stultus est, eum sapientem existimem. Sed virtutem laudas, quæ nec cripi, nec surripi potest unquam, neq; naufragio, neq; incendio amittitur, nec tempestatum, nec temporum permutatione mutatur. Rectissimè sanè, poteras etiam ea commemorare, quæ à Platone, & Aristotele, cæterisq; sapientissimis viris de virtute celebrata sunt: nam omnia tibi concederem, & facile paterer, multa te dicere, quæ nihil ad causam hanc faciant: verum id quod addis, Qua præditi qui sunt, soli sunt diuites: vide ne fortasse negetur à nobis, quoniam rationes illæ, quæ adduntur, nō tantam vim habent, ut hoc probent: quamvis enim soli virtute præditi res fructuosas, et sempiternas animo possideant: tamen si tanta paupertate premantur, ut nec victum, nec vestitum habeant, eos quomodo diuites appellabis? & si nihil isti tui sapientes habuerint, quomodo suis rebus poterūt esse cōtenti? potest ne satis esse putare quod est, qui fame cruciatur? qui vestem mendicare cogitur? potest ne nihil appetere, nulla re egere, nihil requirere, qui nesciat unde surdo ventri, cū inanitate laborat, satisfacere possit? an fortasse Stoicas illas sententias eo tempore proferet, atq; inquiet: Tace mi venter, noli cōqueri, quoniam ego diues sum, solus enim sapiens est diues, atq; ego sapiētia sum refertus: quin etiam reges ipsos diuitijs supero, nullus est qui mecū rerum copia contendere possit, nihil mihi
appet

appetendum est, meis rebus me cōtentum esse oportet:
 nihil est autem meum, nisi quod animo possideo. Hac
 ille fortasse dicet: sed interim ieiunus venter, qui non
 audit verba libenter, latrare non desinet. Quòd si cor-
 pus etiam penetrabile frigus adurat, necesse erit ut
 quāvis sapiens sit, aliquid appetat, aliquid quærat am-
 plius: quare nullo modo diues appellari poterit. Crede
 mihi Cicero, quamvis rectè concludas, Improbos, &
 auaros, non modò non copiosos, ac diuites, sed etiam in-
 opes, & pauperes, existimandos esse: nunquam tamen
 efficies, quin sapiens aliqua re, sicuti alij homines, in-
 digeat: quamvis animo res fructuosas, & sempiternas
 possideat. Itaq; necessariò concludendum est, Diuitias
 à sapientia distinctas, atq; separatas esse: quoniam in
 usu corporis diuitiæ consistunt, sapientia verò sedem
 habet in animo. Neque enim negare quisquam potest,
 tempus huiusmodi posse contingere, in quo sapiens ali-
 quis vir nihil habeat omnino, quo vitam sustentare
 possit: sed extrema inopia, atq; paupertate prematur:
 quo sanè tempore diues non erit, quamvis sit sapiens,
 Quemadmodum igitur sapientes aliqui reperiri pos-
 sunt, qui minimè diuites sint: ita etiam contrà, diuites
 inueniri poterunt, qui minimè sint sapientes. Atq; ita
 tandem concludetur, nequaquam hanc sententiam esse
 veram, quòd solus sapiens diues sit. Hæc postquam
 dixisset Cōstantinus, magna omnium approbatio sub-
 secuta

secuta est: & Octavianus, Siccine mecum egisti Constantine? nam initio tuæ orationis, cùm à me multa, quæ tu præmeditatus fueras, dicta fuisse simulasses, quamuis non verebar, ne tibi verba essent defutura, quippe qui tuum nouissem ingenium: tamen (ut ingenue fatear) sperabam me superiorem abiturū. Nunc, ut video, nō tantum orationem meam adæquaisti, sed etiā longo intervallo superaisti: quod equidem non moleste fero. Cogit enim me singularis meus in te amor, ut non minus tuæ doctrinæ, quàm meæ faueā. Velim quidem ita esse, inquit Constantinus: sed satis ipse vires meas noui. Nam de amore certè in me tuo nihil dubito: in quo tamen non concedo tibi, ut tu me plus diligas, quàm ego te: verum de oratione mihi satis illud est, si nō omnino vobis rudis, aut impolita visa est. Imò verò, inquit Cardanus, ita rectè ambo vos gessistis, ut difficile sit, vter vtri præstiterit, iudicare. His dictis, ad me omnes conuersi, rogare cœperunt, ut cùm primum daretur otium, defendendi Ciceronis prouinciam susciperem. Quod ego liberaliter sanè pollicitus sum: nisi quis eam prius arripuisset. Habes Alciate, quæ tribus illis diebus, quibus in Fannianorum suburbano cum Marco meo fui, disputata fuerunt: quo tempore tu iam annum vnum ius ciuile summa cum celebritate Ferrariæ publicè professus, Mediolanum reuertisti: in quibus quamuis multa ingeniosè, atque acutè

*acutè dicta fuisse iudicaui, tamen in eam opinionem
disceſſi, ut credere, multa etiam eſſe, quæ reſelli haud
difficiliter poſſent. Licet omnino negare non poſſim,
quin Cicero Stoicorum ſententiam ſecutus, nonnulla
dixerit, quæ & à Socratis ſententia, & à veritate
ſint aliena.*

FINIS.

IVLII SOCCIAGHI

Tetraſtichon.

*Antiqua ingenio quamvis tibi ceſſerit ætas,
Par noſtræ Tulli non tamen eſſe potēs.
Nam te ſi iuvenes penitus ſtrauere iocantes,
Quid grauium efficiant ſeriatela virūm?*



m
d
n,
la
re





BIBLIOTECA NAZ.
ROMA
VITTORIO EMANUELE.